

UNIVERSITY OF EDUCATION, WINNEBA

**AKAN ATAM EDZIN HO MP{NSAMP{NSAMU W} KASA MBRA NA
SOHYIOLENGWESTEKS KWAN DO**

AUGUSTINA SYLVIA MYRES-CANN



MASTER OF PHILOSOPHY

2021

UNIVERSITY OF EDUCATION, WINNEBA

**AKAN ATAM EDZIN HO MPENSAMPENSAMU WO KASA MBRA NA
SOHYIOLENGWESTEKS KWAN DO**

AUGUSTINA SYLVIA MYRES-CANN

(200003274)

**Nhwehw[mu dwumadzi a medze ama Esuap]n yi ne fa a]hw[kasa ho
adzesua do ne fa a]hw[Akan-Nzema kasasua a]w] Simpa Esuap]n mu dze
ama Esuap]n yi mu “School of Graduate Studies” so.**

**Iyi b]boa ma esuap]n no ama me
“Master of Philosophy”
(Ghanaian Language Studies-Mfantse)
w] University of Education, Winneba**

FANKWA, 2021

PAEMUKA

Osuanyi ne Paemuka

Emi, Augustina Sylvia Myres-Cann, pae mu ka dɛ, dɛm nhwehwɛmu yi mu nsem nyina, sɛ woyi dza nkorɔfo a mabobo hɔn edzin wɔ dwumadzi yi mu no nyina si nkyɛn a, dza aka nyina yɛ marankasa me nsaano edwuma, mboa aminyaa no nyina mada no edzi asa da ho ase wɔ mo dwumadzi no mu.

Ɔdabaa.....

Da.....



Ɔhwɛfo ne Paemuka

Mepae mu ka dɛ, emi na mohwɛɛ nhwehwɛmu dwumadzi yi do tsentsen no dɛ mbre Simpa Esuapɔn akwankyerɛ na nhyehyɛɛ wɔ nhwehwɛmu dwumadzi tse ara pɛr. Dza otwar dɛ ɔyɛ ma dwumadzi yi mu biara no, mahwɛ ma ɔayɛ.

PROF. CHARLES OWU-EWIE (Ɔhwɛfo)

Ɔdabaa.....

Da.....

DZINTO

Moto me dwumadzi yi dzin ma me mba, me maame nye mo nuanom nyina wo nkuranhye
a wodze mame wo m'adzesua yi mu.



NDAASE

Medze ndaase a onnyi kabea dze ma Twerammpɔn Nyankopɔn wɔ nhwedo pa a ɔdze hwɛ me wɔ me nhwehwemu dwumadzi yi mu ma asem bɔn biara annto me. Nyame n'adom no ntsi dwumadzi yi akɔ do asomdwee mu. Medze ndaase a ɔtɔ do no ma Prof. Charles Owu-Ewie a wɔ abotar na ɔdɔ soronko a onyaa dze ma me wɔ dwumadzi yi ho. Meda no ase bio wɔ n'akwankyerɛ pa a ɔdze ma me wɔ mo dwumadzi yi mu. Meserɛ nkwa tsentsen na ahoozen fi Twerammpɔn nyame nsa mu dze ma wo. Meda Dr. Caesar ase wɔ nkuranhyɛ a ɔdze maa me wɔ me nhwehwemu dwumadzi no mu. Bio, medze ndaase ma m'akyerekyerɛfo a wɔwɔ Winneba Esuapɔn no nkor bata ɔwɔ Edwumako mu, Bɔadze Nyame nhyira hom nyina na ɔmma hom nkwa tsentsen ama hom etum aboa afofor so.

Meda me maame Maria Consolata Cann ase wɔ ne nkuranhyɛsem na tsipia a ɔdze ma me wɔ m'adzesua mu.



Bio, meda mo nuanom ase wɔ mboa a wɔdze boa me wɔ mo skulkɔ mu, meserɛ Nyame ne nhyira dze ma hɔn nyina. Meda me mba Clifford, Ewurama na Jerome ase pii wɔ abotar a wonyaa dze ma me ma mutumii toaa m'adzesua do, Nyame nhyira hom na ommbuei kwan pa mmfa mma hom. Medze ndaase kɛse dze ma Owura Timothy Eshun, Fakyɛ Ampah, Peter Esuon, Amos Tettey na Ewuraba Rose Arthur-Mensah ase pii wɔ nkuranhyɛ soronko a wɔdze ma me wɔ dem dwumadzi yi, Nyame ntsew n'enyim nkyerɛ hom.

Afei meda obiara a ɔboa me ma dwumadzi yi wie yie ase pii, Nyame nhyira hom.

DZA ƆWO MU

| | |
|---------------------------------|----------|
| Paemuka | iii |
| Dzinto | iv |
| Ndaase | v |
| Dza Ɔwo mu | vi |
| Mfonyin Ahorow | xii |
| Pon Ahorow | xiii |
| Nsenkyeredze bi nkyerɛasee | xiv |
| Nhenmu | xv |
| ƆFA A ODZI KAN: NYIENYIM | 1 |
| 1.0 Nyienyim | 1 |
| 1.1 Nhwɛhwɛmu no ne Ngyinado | 1 |
| 1.2 Ɔhaw no edzida | 4 |
| 1.3 Nhwɛhwɛmu no Botae | 5 |
| 1.4 Nhwɛhwɛmu no noho Nsɛmbisa | 6 |
| 1.5 Nhwɛhwɛmu no ho mfaso | 6 |
| 1.6 Beebi a Nhwɛhwɛmu no Pem | 7 |
| 1.7 Ɔhaw a Mihyiae | 8 |
| 1.8 Dwumadzi no ne Nhyehyɛɛ | 8 |
| 1.9 Tɔwbo | 9 |




| | |
|---|-----------|
| ƆFA A ƆTƆ DO EBIEN: DZA ENYIMDZEFO AKA AFA ATAM HO | 10 |
| 2. 0 Nyienyim | 10 |
| 2.1 Akanfo Abakɔsem | 10 |
| 2.2 Tam ne nkyerɛase | 13 |
| 2.3 Tam n’abakɔsem na ne farbaa | 14 |
| 2.4 Kwan a atam fa do nya hɔn edzin | 16 |
| 2.5 Dza enyimdzefo aka afa atam ho | 18 |
| 2.6 Atam no dwumadzi de ɔye anomu kasa nkitahodzi | 19 |
| 2.7 Atam ne dwumadzi de ɔye ɔnnye-anomu kasa nkitahodzi | 20 |
| 2.8 Atam mu nsɛnkyerɛdze | 21 |
| 2.9 Siantisir a yefura tam | 22 |
| 2.10 Kwan a Akanfo fa do fura hɔn tam | 23 |
| 2.11 Akan atam ahorow | 24 |
| 2.11.1 Kente | 24 |
| 2.11.2 Adinkra | 25 |
| 2.11.3 Brɛbetse (velvet) | 25 |
| 2.11.4 Daa daa tam | 26 |
| 2.12 Akanfo hɔn tam furabew | 27 |
| 2.12.1 Nkitahodzi a wɔdze tam dzi | 28 |
| 2.12.2 Abɛbu tam | 32 |
| 2.12.3 Ekutsiabo | 33 |
| 2.13 Nsusuando ahorow a atam enya no wɔ nyimpa do | 34 |
| 2.14 Atamfura ho mfaso | 35 |



| | |
|---|----|
| 2.15 Kasa ho mbra | 36 |
| 2.15.1 Dzin | 36 |
| 2.15.1.1 Nyimpa edzin | 37 |
| 2.15.1.2 Nkurow edzin | 38 |
| 2.15.1.3 Mbowa edzin | 40 |
| 2.15.2 Asemfua | 40 |
| 2.15.3 Asempruw | 41 |
| 2.15.3.1 Asempruw-tsir | 41 |
| 2.15.3.2 Asempruw mfemfamho | 42 |
| 2.15.4 Asentɔw | 42 |
| 2.15.4.1 Asentɔw nkyekyemu | 43 |
| 2.15.4.2 Asentɔw no dwumadzi | 43 |
| 2.15.4.2.1 Nhyɛ | 44 |
| 2.15.4.2.2 Asembisa | 44 |
| 2.15.4.2.3 Asentɔw a ɔyɛ asɛnka anaa anomusem | 45 |
| 2.15.5 Asentɔw ne nhyehyɛ | 45 |
| 2.15.5.1 Asentɔw tsiaba | 46 |
| 2.15.5.2 Asentɔw tsentsen / mboho | 46 |
| 2.15.5.3 Asentɔw kuntann | 47 |
| 2.16 Nkyerɛwee ahorow no bi | 47 |
| 2.16.1 Fiadze ho nkyerɛwee | 49 |
| 2.16.2 Hɛn ho nkyerɛwee | 50 |
| 2.16.3 Kwan ho nkyerɛwee | 51 |



| | |
|--|-----------|
| 2.16.4 Hɛmba Ho Nkyerewee | 52 |
| 2.17 Nhyehyɛɛ yi mu adwenmusɛm | 52 |
| 2.17.1 Kasa Mfeefeemu Mpɛnsampɛnsamu (Critical Discourse Analysis / CDA) | 53 |
| 2.18 Tɔwbo | 55 |
| ƆFA ƆTƆ DO EBIASA: NHWEHWEMU AKWAN | 57 |
| 3.0 Nyienyim | 57 |
| 3.1 Nhwɛhwɛmu no su | 57 |
| 3.2 Beebi a nhwɛhwɛmu no kɔr do | 58 |
| 3.3 Nyimpa dodow a menye hɔn yɛɛ nhwɛhwɛmu no | 59 |
| 3.4 Kwan a mefaa do yii nkorɔfo a menye hɔn yɛɛ nhwɛhwɛmu no | 60 |
| 3.5 Akwan ahorow a mefaa do nyaa nsem yɛɛ nhwɛhwɛmu no | 61 |
| 3.3.1 Nwoma akenkan | 62 |
| 3.5.2 Nkɔmbɔtwɛtwɛ | 62 |
| 3.5.3 Ahwɛɛ | 63 |
| 3.6 Kwan a mefaa do dze nhwɛhwɛmu yi ho nsem too gua | 63 |
| 3.7 Ɔhaw a mefaa mu | 64 |
| 3.7 Tɔwbo | 64 |
| ƆFA A ƆTƆ DO ANAN: MBOANOSɛM NO MU MPɛNSAMPɛNSAMU | 66 |
| 4.0 Nyienyim | 66 |
| 4.1 Akan atam edzin ho nhyehyɛɛ wɔ kasa mbra kwan do | 66 |
| 4.1.1 Akan atam edzin a ɔkyerɛ asentɔw no dwumadzi | 67 |
| 4.1.1.1 Atam edzin a ɔyɛ asɛnka | 68 |
| 4.1.1.2 Atam edzin a ɔyɛ nhyɛ | 70 |



| | |
|---|-----|
| 4.1.1.3 Atam edzin a ɔye asemɓisa | 71 |
| 4.1.2 Asentɔw Nhyehyee ahorow | 73 |
| 4.1.2.1 Akan atam edzin a ɔye asentɔw tsiaba | 73 |
| 4.1.2.2 Atam edzin ahorow bi a ɔye asentɔw mboho | 74 |
| 4.1.2.3 Atam edzin ahorow no bi a ɔye asentɔw kuntann | 75 |
| 4.2. Akan atam edzin ho mpensampensamu wɔ sohyiolengwesteks kwan do | 76 |
| 4.2.1 Akan atam edzin a ɔye abebu | 77 |
| 4.2.2 Akan atam edzin a ɔye ekutsiabo | 80 |
| 4.2.3 Akan atam edzin a ɔye afotu | 82 |
| 4.2.2.2 Ber potsee a Akanfo dze fura tam bi | 84 |
| 4.3.2.2.1 Akan atam edzin a ɔfa owu ho (Eyiyeber mu tam) | 85 |
| 4.2.2.1.1 Owu see fie | 86 |
| 4.2.2.1.2 Owu atwer baako mmfow | 87 |
| 4.2.2.1.3 Ntsetsew mudzi ye yaw | 88 |
| 4.2.2.1.4 Afe bi ye esian | 89 |
| 4.2.2.2 Atam a wotum dze ko abadzinto ase | 90 |
| 4.2.2.3 Atam a wotum dze ko awargye anaa ayeforhyia ase | 92 |
| 4.2.3.1 Atam edzin a ɔye nyimpa dzin | 94 |
| 4.2.3.2 Atam edzin a ɔye mbowa edzin | 96 |
| 4.2.3.3 Atam edzin a ɔye nduadzewa | 98 |
| 4.3 Tam edzin na ahosu dza ɔwo hen na no ho hia | 100 |
| 4.4 Atam ahosu ahorow | 101 |
| 4.4.1 Ahosu ahorow | 104 |

| | |
|--|------------|
| 4.4.1.1 Fufuw | 105 |
| 4.4.1.2 Tuntum | 107 |
| 4.4.1.3 Kɔben anaa kɔkɔ | 108 |
| 4.4.1.4 Sika | 109 |
| 4.4.1.4.1 Ebeka mo ho asem a, fa egua tsena do. | 109 |
| 4.4 Siantsir a nyimpa binom fura tam a onnyi dzin | 110 |
| ƆFA A ƆTƆ DO ENUM: EWIEI: MBUBUDO NA ADWENKYERE | 113 |
| 5.0 Nyienyim | 113 |
| 5.1 Nhwewemu no mbubudo | 113 |
| 5.2 Dza ɔtɔɔ gua | 115 |
| 5.3 Adwenkyere | 116 |
| 5.4 Nsusui | 117 |
| 5.5 Ewiei | 118 |
| 5.6 Tɔwbo | 118 |
| MBOAYE MBUUKUU | 119 |
| NKEKAHO 1 | 125 |
| ATAM EDZIN AHOROW | 125 |



MFONYIN AHOROW

| | |
|--|-----|
| 1: Muoko nyina mmpetu mmember mbom | 78 |
| 2: Dua kor gye ehum a, obu no mfonyin | 79 |
| 3: Kora tse de nantwi bin | 81 |
| 4: Awar tse de nkatse a, nkye mobobo ahwe | 81 |
| 5: Aban nkaba | 83 |
| 6: ABCD | 83 |
| 7: Owu see fie | 87 |
| 8: Owu atwer baako mmfow | 88 |
| 9: Afe bi ye esian | 89 |
| 10: Afa me nwa | 91 |
| 11: Bonsu | 91 |
| 12: Obaa pa | 94 |
| 13: Okun pa woana benya? | 94 |
| 14: Angelina | 95 |
| 15: Nkroma pensel | 96 |
| 16: Akyekyerε ekyir | 97 |
| 17: Sika tu de anoma | 98 |
| 18: Kwadu saw | 99 |
| 19: Ahwerpɔw | 100 |
| 20: Senkye bregye | 106 |
| 21: Enyiber a onnsɔ gya | 108 |
| 22: Beka mo ho asem a, fa egua tsena do | 112 |



PON AHOROW

1: Pon a okyere nyimpa dodow a menye hon yee nhwehwemu no

60




NSɛNKYERɛDZE BI NKYERɛASEE

| | |
|-------|----------------|
| Ny | Nyɛɛ |
| DzAs | Dzin Aɛmfua |
| Dzhy | Dzinnhyaɛnanmu |
| Dz | Dzin |
| NyAs | Nye Aɛmfua |
| ɔyDz | ɔyɛfo Dzin |
| Oyi | Oyikyere |
| NyT | Nyɛɛ-Tamsi |
| ɔytDz | ɔyɛtsia Dzin |



NHɛNMU

Nhwehwɛmu yi no botae nye dɛ ɔtwe adwen si Akan atam edzin ho nhwehwɛmu wɔ Kasa mbra na Sohyiolengwesteks kwan do. Nhwehwɛmufo dze praemari mboanosɛm a minyaa no wɔ atamtɔmfo hɔ na sɛkɛndari mboanosɛm a minyaa no wɔ nwoma ahorow mu dzii dwuma. Nhwehwɛmu yi kɔr do wɔ mansin ebien a ɔwɔ Mfinimfin Mantɔw mu. Mansin no nye Mfantseman Mansin na Assin Central Mansin mu. Nkurow a nhwehwɛmu yi kɔr do wɔ mu no yɛ ebien; Mankɛsemu na Assin Foso. Nhwehwɛmufo no gyinaa nhwehwɛmu kwan a ogyina botae do paaw nyimpa dze dzii dwuma yi. Nyimpa a medze hɔn dzii dwuma no yɛ atantɔmfo, mpanyinfo a wɔdze tam dzi hɔn daa daa dwuma na ndɛ mber yi mu mba. Mepaaw nyimpa du (10), mbasiafo beesia (6) na mbanyin baanan (4). Adwenmusɛm a medze piaa mpɛnsampɛnsamu no ekyir nye kasa mfeefeemu mpɛnsampɛnsamu a Fariclough (1995) dze to gua. Adwenmusɛm yi aboa ada no edzi dɛ twaka bi da Akan atam edzin na amambra mu. Nhwehwɛmu yi da no edzi dɛ Akan atam edzin no mu bi yɛ sentase nhyehyɛɛ a ɔyɛ asɛntɔw tsiaba, asɛntɔw mbɔho na asɛntɔw kuntann. Atam edzin no bi so yɛ asɛnka, asɛmbisa na nhyɛ. Sohyilengweks kwan do no so ɔda edzi dɛ Akan Atam edzin no bi yɛ ekutsia, afotu na abɛbu. Atam no bi yɛ dza wotum dze kɔ ayeforhyia ase, eyi na abadzinto. Nhwehwɛmu yii san da no edzi dɛ Akanfo hwɛ tam ahosu ho ana wɔdze edzi dwuma. Atam ahosu a ɔda edzi wɔ nhwehwɛmu yi mu nye sika, fufuw, tuntum na kɔkɔɔ.



ƆFA A ODZI KAN

NYIENYIM

1.0 Nyienyim

Ɔfa odzi kan wɔ dwumadzi yi mu no bɔhwɛ Akanfo hɔn amambra na ndzɛmba etsitsir a ɔda amambra edzi a atamfura dzi mu akotsen. Ndzɛmba etsitsir a mobɔhwɛ wɔ ha no bi nye nhwehwɛmu no ne ngyinado. Iyinom nye tam n'adzeban, tam n'abakɔsem na ne farbaa. Ɔtɔ do bio, mobɔhwɛ ɔhaw a ɔnam do ma mereyɛ dem nhwehwɛmu yi; ɔno nye atam edzin a ndɛ yɛnnhwɛ ansaana yefura ho. Mobɔhwɛ atam edzin, na ne nhyehyɛɛ, nkitahodzi a yɛdze atam dzi, siantsir a binom fura tam a onnyi dzin na m'ahwɛ atam ahosu na atam edzin dza noho hia yie.

Dem ɔfa yi ara so na mobɔhwɛ nhwehwɛmu no no botae, nhwehwɛmu no ho nsembisa, nhwehwɛmu no ho mfaso, bea a meyɛɛ nhwehwɛmu no, beebi a nhwehwɛmu no pem, dwumadzi no ne nhyehyɛɛ na no tɔwɔ.

1.1 Nhwehwɛmu no ne Ngyinado

Amambra yɛ kwan a nyimpakuw bi bɔ mu tsena wɔ fakor na wɔyɛ hɔn adze nyinara de ebusuakuw. Ndzɛmba etsitsir a ɔda nyimpakuw yi hɔn amambra edzi bi nye kasa a wɔka, edziban a wodzi, hɔn asaw, hɔn gyedzi na atam ahorow a wofura (Salm & Falola, 2002). Atamfura yɛ kwan tsitsir kor a Akanfo fa do da hɔn amambra edzi. Wiadze yi mu mba runntum ntoto atamfura ase koraa, osiandɛ ebibifo, aborɔfo, mbofra, mpanyin, mbasiafo na mbanyin nyinara dze atam yɛ hɔnho. Yɛdze atam kata hɛn adagyaw do. Yɛdze siesie hɛnho


na hen adan mu so. Nkorɔfo fa afadze (atam) pɔtsee bi kɔ dwumadzi bi tse de eyiye, abadzinto, ayeforhya, afahye na dza ɔkeka ho. Onam tam no bo a ɔsom hen ahosiesie mu ntsi na mpanyin ebu be esi amandze ano de, “Se ɔka nyia onnyi tam nko a, nkye wɔgor Asafo a wɔmmpon”.

Ndzemba bi tse de kristosom, enyibuei mbordo na abaefer nwomasua enya nsusuando bon wo hen amambra do. Mber tsentsen ara a hen kusum amambra reyew no, demara so na hen atam so reyew. Tamfura reye aye mpanyimfo nko dze, osiande nde mber yi mu mba pii na wonnyim tam no bo a ɔsom. Dza megynado yee dem nhwehwemu nye de, mubohu mbre tam faa do baɛ, atam edzin na ne nhyehyee, bea wɔdze tam kɔ, siantsir a nyimpa binom fura tam bi. Bio, dwumadzi yi bohwe atam edzin na ahosu dza noho hia na eben kwan do na atam fa do kasa kyere hen.

Akanman mu no, tam ye biribi a ɔsom bo yie, osiande nyia ɔdze tam aye no ho no nam do kasa kyere nkorɔfo. Atam edzin, nsɛnkyeredze ahorow na ahosu a ɔwo atam no mu no kasa na ne nyinara so wo hon nkyereasee.

Tam a obi fura no tum kyere tsebea (awerɛhow anaa enyigye) a ɔwo mu. Edzin na ahosu a ɔwo atam mu wɔmmfa no efurado ara bi, na mbom wɔnam abakɔsem, abebu, tsebea ahorow, gyedzi, nyimpa ntamu nkitahodzi na esuahuhw ahorow do na wɔdze fa dem ndzemba yi.

Nhwehwemu ama yehu de edzin ho hia papaapa, osiande oboa ma nyimpa na ndzamba na mbowa nyinara da nsew. Dem nkyeremu yi da no edzi pefee de dzin ye ahyensewdze a wodze ma nyimpa, mbowa na ndzamba. De mbre nyimpa edzin ho hia no demara so atam edzin ho hia. Siantsir nye de, atam edzin boa ma yehu tam a ofata de yedze ko beebi. Nnye mbea nyinara na yetum dze tam bi ko. Annhwe no yie a nna obi rebeye enya amandze. Krampah (1997) na Agyekum (1995) kyere de yemmfa kente nnko eyiase anaa yemmfa nnkɔgor asafo, Hon siantsir nye de, kente ye mpanyin anaa etsisir tam a osom Akanfo bo, Onam de osom hon bo no ntsi wonntoto no famu koraa. Wo kor do kyere mu de oye tam bi wodze ko afahye anaa dwumadzi soronko bi ase. Iyi kyere de oye tam bi a wofura no enyigye ber mu.



Atam ahorow dodow noara wo hon edzin osian dwuma potsee a wodze dem atam no dzi no ntsi. Atam no bi ye daadaa tam a dwumadzi yi mu nhwehwemu yi fa ho. Daadaa tam yi bi edzin ye abebu na bi so ye ekutsia bo. No mu bi tum ye nsembisa, afotusem na dza okeka ho.

Akanfo nam dem kwan yi ara so do da hon gyedzi na tsebea a wowo mu wo aber potsee bi mu edzi. Dem ndzamba yi boa ma wotum dze atam no dzi dwuma potsee bi wo aber bi. Mbaabun no dodowara nnyim kwan a atam fa do kasa kyere ankorankor, ne dem no ntsi ama wonnhwe dza otum ka no do mmfa nnto tam. Oba no dem so a, nna hen abakosem na amambra ahorow no reye ayew. Se yenya nyimdzee wo atam edzin no dwumadzi ho na adwen a otaa dem edzin yi ekyir a nkyirma runntum nnya abakosem biara mmfi atam ho.

Ma obeyɛ ma nkyirmba enya nyimdzee afa atam edzin ho na ne hyehyɛ ntsi na dem dwumadzi yi rokɔ do. Bio, ama yeehu bea a ɔwɔ de yedze tam bi kɔ.

Dem ara so na edzin ho wɔ mfaso dze ma nyimpa, osiande oboa ma nyimpa da nsew. Iyi ma oda edzi de dzin ye ahyensewdze a wodze ma nyimpa, mbowa na ndzɛmba. Onam de dzin ho hia na oboa ma yehu nsonsonɛe a oda nyimpa, mbowa na ndzɛmba mu no ntsi, biribiara a ɔwɔ asaase yi do biara wɔ dzin. Dem no ntsi atam edzin so hia papanara wɔ hen daadaa abrabɔ mu. Mber pii no atamtɔmfo no dodowara dze atam edzin na wodze twe atɔfo. Wɔyɛ dem ama woehu nsonsonɛe a ɔwɔ atam no mu. Otɔfabi a, nsenkyerɛdze a ɔwɔ atam no mu bi dzi nse ntsi edzin no boa hon ma wuhu nsonsonɛe a ɔwɔ mu. Edzin ahorow a Akanfo dze ma hon atam no tum da hon gyedzi na tsebea bi a wɔwɔ mu wɔ hon abrabɔ mu. Dem dwumadzi yi botum aboa ma nde mber yi mu mba na nkyirmba ehu mfaso na hia ohia de wobohu atam edzin na mbrɛ osi boa wɔ nkitahodzi mu a onkefa asem abre obiara. Obotum so aboa ma woehu lengwesteks nhyehyɛ a ɔwɔ atam edzin no bi ho.

1. 2 Ohaw no edzida

Akanfo mmfura tam wɔ aber a wonndwen asem a tam no reka ho anaa odze roto gua. Wofura tam wɔ aber a ohia mu. Atam ho dwumadzi a enyimdzezo ayɛ no dodowara no fa nsenkyerɛdze a ɔwɔ atam mu na nkitahodzi a wodze dzi. Bi so hwe biribi fa aborɔfo dwuma a wodze ebibirmu atam dze dzi. Dwumadzi anaa nhwehwemu no bi so fa atam ahosu ho na ne nkitahodzi. Dwumadzi no dodowara fa Kente na Adinkra ho. Onyimdzezo bi tse de Sakyi-Baidoo (2000) ayɛ nhwehwemu afa mbrɛ wodze onnye-anomu kasa nkitahodzi bi tse

dɛ nsɛnkyɛrɛdɛ dɛ dzi nkitaho. Ɔkyɛrɛ mu dɛ Akanfo tum dɛ atam kyɛrɛ hɔn adwen, hɔn nsusui, atsenka anaa enyidoadzɛhu bi a obi wɔ.

Yankah (1995) so dzii dwuma bi dɛ faa atam ahosu na nsɛnkyɛrɛdɛ a wotum dɛ dzi nkitaho. Ne dwumadzi no mu no ɔdaa no edzi pefɛe dɛ obi tum dɛ nsɛnkyɛrɛdɛ ahorow no tum dɛ kyɛrɛ tsebea biara obi wɔ mu dɛ ɔyɛ enyigyɛ anaa awɛrɛhow mu.

Duje (2019) yɛɛ atam ho nhwehwɛmu dwumadzi faa mbrɛ atam ahosu tum da obi no su wɔ ndzɛmba a ɔyɛ fɛw anaa ahomka ho. Frank na Gilovich (1998) hɔn nhwehwɛmu no kyɛrɛ tum a atam ahosu wɔ no obi do. Enyimdzɛfo yi hɔn dwumadzi yi annka biribiara ammfɛ kasa mbra nhyɛhyɛɛ anaa lengwestɛks nhyɛhyɛɛ ho.

Dwumadzi ahorow a enyimdzɛfo yinom nye pii a wɔkɛka ho no ada no edzi no boa ma hɛn nyimdɛɛ a ɔwɔ atam edzin ho no mu dɔ. Mprɛmprɛ dwumadzi yi so dɛ nyimdɛɛ rotow nyimdɛɛ a enyimdzɛdo edzi kan ada no edzi no do. Kasa mbra afa mu no dwumadzi yi bɔhwɛ kasa mbra ho nhyɛhyɛɛ na sohyiolengɛstɛks afamu no so bɔhwɛ nkitahodzi na dwuma wɔdɛ atam dzi wɔ daadaa abrɔbɔ mu.

1.3 Nhwehwɛmu no Botae

Dɛm dwumadzi yi no botae no na nhwehwɛmufo no begyina do dɛ ayɛ ne nhwehwɛmu no. Nhwehwɛmu no no botae na odzidzi do yi:

1. Kasa mbra nhyɛhyɛɛ ahorow a Akan atam edzin no bi wɔ

2. Kwan a Akan atam edzin fa do kasa kyere ankorankor (sohyiolengwesteks)
3. Hu atam edzin na ahosu dza noho hia

1. 4 Nhwewemu no noho Nsembisa

Nhwewemu yi beyiyi nsembisa a odzidzi do yi ano.

1. Eɛn kasa mbra nhyehyɛ na atam edzin no bi wo?
2. Eɛn kwan na atam edzin fa do kasa kyere ankorankor?
3. Atam edzin na hon ahosu, dza wo hen na no ho hia?

1. 5 Nhwewemu no ho mfaso

Nhwewemu yi beda adwen fofor edzi wo dwumadzi ahorow a enyimdzeɛfo aye afa atam ho. Nhwewemu yi ekyir no, nyimpa dodow biara a wobekenkan no benya adzesuadze pii efi mu. Dza wobonya no bi nye atam edzin ahorow. Wobohu mbre atam edzin ne kasa mbra nhyehyɛ no si da edzi wo Akan atam edzin ho. Kasa mbra nhyehyɛ mu no akenkamfo no bohu nsentow ahorow a ye wo. Onam de kasa mbra kyere mbre nkasafua tum bo mu ye asentow ntsi, obiara odze dem dwumadzi yi bedzi dwuma biara bohu dwuma a kasafua biara dzi wo asentow mu. Nsentow no nye asentow tsiaba, asentow mboho, asentow kunntan. Bio, akenkamfo no bohu nsentow ahorow no so hon dwuma a wodzi, de woye nsembisa, asenka anaa ohye. Oboboa so ma obiara ehu siantsir a nyimpa binom mmfura tam a wo dzin. Bio, oboboa ma yeehu kwan a nyimpa fa do dze tam dzi nkitaho wo ne daadaa abrabo mu. Nhwewemu yi botum aboa ma yeehu atam edzin na ahosu dza no ho hia papaapa. Oboboa ma yenya buukuu a ofa Akan atam ho aka dza wo ho no ho.

Nye iyi nkotsee na mbom ɔbɔboa ma esuafo anaa obiara a ɔbɔhwɛ dwumadzi yi mu dze aye ne nhwehwɛmu no ehu amambra a ɔwɔ atam ho. Bio, nhwehwɛmufo anaa ɔkenkamfo biara bohu mbrɛ wɔdze Kasa Mfeefeemu Mpɛnsampɛnsamu (Critical Discourse Analysis) esi akyerɛ atam edzin mu. Nhwehwɛmu yi dwumadzi yi bɔboa na abɔ kwan ato ho ama obiara a ɔpɛ dɛ ɔyɛ nhwehwɛmu fa atam ho.

1. 6 Beebi a Nhwehwɛmu no Pem

Dem fa yi kyere bea a me yɛɛ me nhwehwɛmu no. Nhwehwɛmu no kɔɔr do wɔ nkurow ebien a ne nyinara wɔ finimfin mantɔw mu. Nkurow yi nye Mankessim na Assin Foso. Dem nkurow yi nyinara wɔ Mfinimfin Mantɔw mu. Mankessim wɔ Mfantseman mansin mu nna Assin Foso wɔ Assin North mansin mu. Siantsir a nhwehwɛmufo anaa ɔkyerɛwfo faa nkurow a ɔtse dem nye dɛ efiadze akɛse a wɔtɔn atam wɔ mu wɔ ho na dza ɔkyerɛwfo no hia no nyinara obenya efi dem bea no. Nhwehwɛmufo anaa ɔkyerɛwfo no nye atamtɔmfo na adzɛpamfo a wɔwɔ nkurow a oedzi kan abobɔ hɔn edzin no nyaa nkitahodzi. Obehiaa so dɛ ɔkyerɛwfo no nye mpanyimfo kakra so twetwe nkɔmbɔ fa atam ho osiandɛ hɔn na osusu dɛ wɔwɔ nyimdzee wɔ atam n'abakɔsem na ne fura na pii a ɔkeka ho ho. Dwumadzi yi fa kasa mbra nhyehyɛɛ wɔ Atam edzin ho. ɔhwɛ biribi fa asentɔw ahorow ho dɛ ɔyɛ asentɔw tsiaba, asentɔw mbɔho, kuntann na mbɔho-kuntann. Bio so ɔhwɛ sohyiolengwesteks mpɛnsampɛnsamu wɔ atam edzin no bi ho.

1.7 Ohaw a Mihyiae

Biribiara ne yɛ mu wɔ ohaw. Dwumadzi yi a ɔfa kasa mbra na sohyiolengwesteks mpensampensamu wɔ Akan atam edzin ho no, mehyia ohaw pii. Dza odzi kan, nna atamtɔmfo a mepɛ dɛ menye hɔn nya nkitahodzi wɔ mo dwumadzi yi mu no mmpɛ dɛ wɔ yɛ ntsi nna ɔwɔ dɛ sɛ moko obi ne nkyɛn a moto tam beyɛ sin bi na modua do nye no twetwe nkɔmbo fa mo dwumadzi no ho. Dza obenya mber ama me no so ɔnam dɛ ɔrotɔn adze no ntsi nkɔmbɔtwetwe no nntum nnyɛ esawdo esawdo.

Ɔtɔ do bio no, mber so beyɛɛ ohaw ma me ara yie, osiandɛ ber a mibenya dze ako bea a merekyɛ nhwehwɛmu no nna onyia no nnyi hɔ. Iyi ma ahokyer baa m'akwantu no ho. Edwumayɛ so beyɛɛ akwansiwdze dze ma me.

1.8 Dwumadzi no ne Nhyehyɛ

Dwumadzi yi wɔ nkyekyɛmu enum. Ɔfa odzikan no yɛ nyienyim a ɔkyerɛ dwumadzi no mu. Iyi hwe dwumadzi a ɔfa Akanfo abakɔsem ho, tam n'abakɔsem ho, nhwehwɛmu no ne ngyinado, ohaw no, nhwehwɛmu no botae, nhwehwɛmu no ho nsembisa Akanfo abakɔsem, ohaw a mefaa mu, nhwehwɛmu no ho mfaso, bea a nhwehwɛmu no kɛpemee na tɔwɔ.

Ɔfa a ɔtɔ do ebien no bɔhwɛ biribi afa dza enyimdzefo anaa nwomanyimfo binom akyerɛw afa atam ho wɔ amanandze na Akanfo atam ho. Bio, mobɔhwɛ biribi afa adwensu ngyinado na adwenmusɛm ho akwankyerɛ.

Dza ɔto do ebiasa no so kyere akwan ahorow a mefaa do yee nhwehwemu no na mpensampensamu wo atam edzin ahorow a menyae fii atamtɔnfo nye mpanyimfo nye nde mber yi mu mba ho a medze ridzi dwuma no. Ɔfa yi mu mpensampensamu no begyina atam edzin ne kasa mbra ho nyehyee na Sohyiolengwesteks kwan do.

Dza ɔto do bio no nye ɔfa a ɔto do anan. Ɔfa ha yi na merebkyerkyere Akan atam edzin no ne nyehyee no. Bio, mebkyere sohyiolengwesteks mpensampensamu wo atam edzin ho a bi nye, siantsir a nyimpa binom fura tam a onyi dzin. Dem fa yi kasa fa tam ahsu na ne dzin dza no ho hia yie. Mebesan so akyerɛ mbrɛ atam edzin na ahsu si kasa kyere ankorankor.

Ɔfa a ɔto do enum no na odzi mo dwumadzi no nyinara ewiei. Dem ɔfa yi mu na mobobo dwumadzi yi nyinara toɔ na medze mo nsusui a ɔfa nhwehwemu no ho no boto gua.



1.9 Tɔwbo

Ɔfa yi hwɛ nyienyim, dza nhwehwemu no gyina do potsee a oye Akan atam edzin. Ɔsaneɛ so hwɛ nhwehwemu no ne ngyinado, kwan a mefaa do hun ɔhaw no, nhwehwemu no no botae, nhwehwemu no ne nsembisa na nhwehwemu no ne mfaso. Ɔto do bio ɔsaneɛ hwɛ bea a nhwehwemu no pem, ɔhaw a mehyiae na dwumadzi no ne nyehyee.

ƆFA A ƆTO DO EBIEN

DZA ENYIMDZEFO AKA AFA ATAM HO

2.0 Nyienyim

Atam ho nhwehwemu dwumadzi pi na enyimdzefo binom aye. Ɔfa yi ye nhwehwemu a Ɔfa ndwuma ahorow a nyimpa binom aye a ɔnye dwumadzi yi nam kwan kor do. Ɔfa yi so bɔhwehwe atam edzin ne kasa mbra nhyehyee, dza ɔye asemfua, asempruw, asentɔw tsiaba, dza ɔye asentɔw mboho, dza ɔye asentɔw kuntann na sohyiolengwesteks mpensampensamu wɔ atam edzin ho bi tse de, siantsir a nyimpa binom fura atam bi. Bio, Ɔfa yi so bɔhwe atam ahosu na ne dzin ma no ho hia ankorankor. Ɔfa yi mu no, ɔkyerewfo no besan ahwe dwuma a enyimdzefo binom aye afa edzin ho na nkyerewee ahorow a yewɔ.



2.1 Akanfo Abakɔsem

Agyekum (2006) kyere de. Akan ye kasa a Akanfo a wɔye nyimpakuw a wɔwɔ ɔman yi mu a hon dodow beye ɔha ne nkyemu eduonu-akron ekyir pɔw kor (49.1%). Enyimdzefo ama yeehu de Akan ye kasa ahorow a ɔye kɛse wɔ ebibiman yi mu ha. Akan kasa ye kasa a wɔka no wɔ mantɔw du ne nyinara mu. Asante, Finimfin, Bono Ahafo, Epuei, Atɔe na firaw mantɔw mu. Cote d'Ivoire ne fa binom so ka Akan kasa no. Akan kasa no ka Kwa kasa ebusuakuw noho. Akan kasa no gu mu ahorow pii a bi nye; Mfantse, Esuantse, Assin, Bono, Akyem, Agona na pii a ɔkeka ho.

Amoako-Asare (1998) so kyere de, Akanfo ase fi Sudan na hon amambra na amandze dzi nse. Ɔko do kyere de, Esuantsefo na wɔye Akan kuw no mu mba kɛse a wodzi honara

hɔn do. Hɔn ahendzi ahyɛnsewdze ye sikagua. Akanfo nkaa no nyinara a wɔwɔ sikambew do a ndɛ wɔfrɛ no Ghana yi mu. Akanfo hɔn dodow seseiara no bor ɔpepe eduonu (20 million) na wɔye nyimpakuw a wɔ dɔɔ so wɔ Ebibir Atɔree afamu.

Demara so na Dolphyne (1998) so ama ada edzi dɛ, Akan dzin bɔbɔ adze no akyɛr yie. Ɔkyerɛ bio so dɛ, Akan kasa no ye kasa bi a wɔka no mbea pii. Mbea a wɔnnye Akanfo no mpo ka kasa no, osiandɛ Akan kasa no na ɔye kasa a wɔka no kɛse wɔ eboibiman mu.


Abakɔsem kyere dɛ, Akanfo hɔn kasa no fi Anee na finimfin ebibiman apaa mu ansaana worubopue Sahel. Nyimpa dɔm a wɔbɛye Akanfo no fi Sahel dze bopuei Ebibiman mu Atɔree nsuano. Bonoman a wɔkyekyeree no bɛye guadzibea dze maa Akanfo na aman a woetwa hɔn ho ehyia. Bio, Akanfo fi Bonoman mu bekyekyeer nkurow nkurow ɔnam egudzi na haban mu dwuma no ne nyɛ ntsi.

Akanfo amambra ye amambra a ɔye soronko na no ho tsew a ɔda ho wɔ hɔ. Sɛ ɔba no adze dzi mu a, Akanyi biara dzi ne adze. Ne dɛm no ntsi, Akanyi biara bɔ ne ebusua. Nyia ɔda hɔn ano no tum ye Ɔhen anaa ebusua mpanyimfo na wɔda hɔn ano.

Bio, abakɔsem kyere Mfantsefo ase dɛ wofi Takyiman bopue bea a wɔfrɛ no Mankɛsem wɔ finimfin mantɔw mu. Ber a wɔreba no, wɔnye ekunyin ebiasa na wodzi hɔn enyim bae. Dɛm ekunyin yi nye Oburumankoma, Ɔson na Ɔdapagyan. Hɔn batatu mu no, Oburumankoma na Ɔdapagyan wuii wɔ kwan do naaso wɔdze hɔn fun baa Mankɛsem besie hɔn wɔ Nananom mpɔw. Enyimdzefo ama yeehu dɛ Mfantsefo nye Kɔmfo panyin a wɔfrɛ no Kɔmfo Amona baa na ber a wobodu Nananom mpɔw no ɔdze egyan bi hyɛ

famu na bea ho no na mpanyimfo hyia fa adwen. Wofre dem bea no “Akyin Enyim”. Ber a wodu beebi a wowo no, woboto nyimpakuw bi wo ho a wonye hon koe dzii hon do nkonyim. Dem ber no nna wofre kurow no “Adoakyir” na wodzi hon do nkonyim no na wo sesa dzin no yee “Oman-kese” mu a nde wofre no Mankesemu yi.

Crayner (1988) da no edzi de Akanyi biara bo ne na ebusua na ahemfo na woda ano. Ebusua a wo Akan man mu no dwo na mbom Mfantsefo a woye Akan no nkor bata no kor no wo esuon. Dem esuon yi so onam nkyekyemu a obaa ebusua mu no nyaa nkor bata pii naaso hon nyinara fi baatan kor ase. Dem ebusua ahorow yi nsonsonnee wo Twifo nye Mfantsefo dze no mu osian ntsetsew mu a obaa Mfantsefo hon dze no mu. Twifo ebusua no nye iyi; Asona, Agona, Biretuo, Ekoona, Aduana, Asekyiri. Mfantsefo ebusua ahorow a yewo nye; Nsona, Anona, Twidan, Kona, Aboradze, Ntwea, Dehyena, Takyina, Eduana, Ammoana na Odomna.



Dem ebusua yi nyinara gye dzi de wofi baatan kor ase ntsi wommpen ma wonnwar hon ho. Wohu no de oye mbusudze. Oda no edzi de wotua tow kor.

Crayner (1988) kyere Akanfo adzedzi mu de oye na na wofa adzedzi. Okor do kyere siantsir a wofa adze dzi wo ho de, onam mboa banyin bi no nua baa dze boa no ahokyer ber bi mu na oma dem adzedzi no bekaa Akanfo amambra no ho. Bio, oma oda edzi pefee de, wofa adzedzi no mber pii no, wontwewontwe wo mu ntsi oye a na nkye egya adzedzi no ye, naaso onam de oye Akanfo amambra de mba dzi na dze na wofa adze ntsi, oto de hon enyi wo ono do kyen egya adzedzi. Mpanyin ebu be esiw amandze ano de “Egya kyew na onnwe”. Yedze dem be yi toto Akanfo adzedzi ho a, nna kyere de oye

nokwar, osiandɛ mba wobopue ebusua no mu nyina yɛ na no ne dze, osiandɛ akoko baatan na ne mba dzi n'ekyir. Akanfo wɔ gyedzi bi dɛ Nyame na ɔbo enyame nkakramba a wɔgye dzi dɛ wɔwɔ nsu mu, mbepɔw mu, ndua mu na pii a ɔkeka ho do. Akanfo yi gyedzi a wɔwɔ no enyame nkakramba mu a, wɔ sanso wɔ gyedzi wɔ nananom nsamanfo mu.

Akanfo nntoto dzinto famu koraa ntsi woto biribiara dzin. Dzin ahorow a Akanfo dze ma hɔn ndzɛmba no nyinara wɔ siantsir a wɔdze ma no. Nhwɛhwɛmu kyere dɛ wogyina nsɛm bi esi, nyimdzee, suahu na pii a ɔkeka ho do na wɔdze to dzin. Dɛm kwan noara do na Akanfo fa toto atam so dzin.

2.2 Tam ne nkyerɛase

Encarta Dictionary (2009) kyere dɛ, “Tam yɛ efuradze a wɔdze nsa anaa mfir awen ma ɔayɛ akataho a yetum fura anaa yɛdze pam atar”. Mfantse nkasafua na kasambirenyi nkyerɛase buukuu a Sɔfɔpanyin Joseph Yedu Bannerman na n'anyɛnkofo kyerewee no so kyere tam ase dɛ, “ɔyɛ adze a nyimpa fura, ɔdze kata n'adagyaw do. Bio, wɔkyere mu dɛ, ɔyɛ efuradze wɔdze bi so bu atar na pii a ɔkeka ho”. Tam yɛ biribi a no ho hia yie ma nyimpa dasanyi, osiandɛ sɛ nyimpa botum akata n'adagyaw do a gyedɛ ɔdze tam. Otum fura no tam dɛmara anaa dɛ ɔdze bi bu atar hyɛ. Akanfo ntoto hɔn atam ase kora, ɔnam dɛ ɔyɛ biribi a ɔsom hɔn bo. Atam so kitsa su bi a ɔma Akanfo mmfa nndzi agor koraa. Dɛm su no bi nye nsɛnkyerɛdze a ɔwɔ atam mu, nkyerɛwee a ɔwɔ mu na tam no ahusu. Manu (2010) ka dɛ atam nnye biribi a yɛdze siesie hɛn ho nkotsee na mbom ɔyɛ biribi a yetum fa do ka asɛm kyere afofor. Iyi yɛ nokwar, osiandɛ atam edzin tum kasa kyere obi wɔ aber a ɔma obi hu tsebea a ɔwɔ mu. Nnye edzin no nko, ahusu

na nsenkyerɛdze no so dzi dwuma kor noara. Manu (ibid) ne nhwehwɛmu no mmfa sentase na sohyiolengwesteks nhyehyɛɛ nye mpensampensamu a ɔwɔ Akan atam edzin ho. Akanfo nam dɛm su ebiasa yi do tum dze atam dzi nkitaho. Wɔdze bɔ ekutsia. Nnye iyi nko na mbom pii so wɔ ho.

2.3 Tam n'abakɔsem na ne farbaa

Encarta Encyclopedia (2009) kyere dɛ, nyimdzeɔ a wɔyɛ nhwehwɛmu fa abakɔsem ho aye nhwehwɛmu afa tam ne farbaa ho. Fi mber santsen besi ndɛ no, nyimpa efurafura ndzɛmba pii mbre wobotum dze akata hɔn adagyaw do no ntsi. Adwenkyerɛ pii na ako do afa tamfura ne farbaa ho. Iyinom mu kor nye dza yeatse efi Baebol mu fa abɔdze ahyese ho. Baebol kyere dɛ Adam na Eve a wɔyɛ nyimpa a wodzii kan tsenaa ase no hun dɛ wɔda adagyaw ber wokɛdzi papa na bɔn ho nyimdzeɔ dua n'aba no, wɔdze adɔmbadua n'ahataw kata hɔnho ɔnam dɛ nna wɔfer. Iyi ekyir no Nyankopɔn noara dze abowa nwoma kata hɔn ho. Enyimdzeɔ ama ada edzi pefee dɛ, hɛn nananom kor do dze mbowa nwoma na wɔdze ye efuradze kata hɔn adagyaw do. Iyi ntsi nkorɔfo hyɛ da nyɛn mbowa tse dɛ nguan ama woɛnya hɔn nwoma no aye efuradze.

Mfe kakra ekyir no, nkorɔfo hyɛ ase dɛ wɔdze ndua ahoma so reye nkataho fura. Iyi ekyir ansaana nkorɔfo suaa adze bohun dɛ wobotum dze asaaba aye tam ma wɔdze ahata hɔn adagyaw do na asan abɔ hɔn honam no so ho ban. Asaaba mu na yenya ahoma a yɛdze wen tam a nyimpa fura. Tamfura baa wiadze akyer yie. Atamfura hyɛ ase fii hɛn nananom Adam na Eve hɔn aber do. Wobubuu adɔmbadua n'ahataw kata hɔnho ber a wohun dɛ wɔda adagyaw no.

Akanman mu no, atsetsesem kyere de hen nananom dzii kan dze dua a wofre no 'kyenkyen' n'ahoma dzii kan yee tam. Wowaawaa kyenkyen n'ahoma no na wobor na wowen dze kata hon adagyaw do. Onam dem nyimdzee a wonyaa fii ndua homa no wen ho noara na odze kentewen bae. Atam no bi hon edzin ye abebudze, awarsem, odo asem, ekutsiabɔ anaa nyansasem. Bi so ye edzin na dza yenya fi ndwom mu. Atam ahorow ne nyinara wo ber a wodze fura. Bi tse de eyi, apontu na dza okeka ho. Iyi nyina mu no yewo atam efufuw, etuntum, akokoo, edinkra tam na dza okeka ho.

Hen amambra, osom, gyedzi, dzibew na hen nyimpasu wo tum kese wo hen atamfura do. Ahemfo ebirempɔn a wowo hen nkurow na nkuraase no so wo atam soronko a wofura. Nkorɔfo a wotse tamfura ase yie no hu tamfura de kasa ara per, osiande nyimpa bi ne tamfura tum kyere ne mfe a oedzi, bea a ofi, no som, ne dzibew, n'edwuma a oye anaa mpo de awar anaa onnwaree. Tam a yefura no kasa pii fa henho. Tam a yefura no n'ahosu no so tum kyere tsebea na gyinabew a efurafo no wo mu.

Mfe pii ekyir no onam de nna nyimpakuw pii pee de wokyerɛ soronko a odeda ebusuakuw ahorow mu, som ahorow mu, basia na banyin ntamu, adehye na nkowaa na dzaa okeka ho mu ntsi atamfura ho behiaa pii. Se yehwe nde mber yi a atam dzi akotsen pii wo Akanfo hon amambra mu papanara nkanka wo hon abebu mu. Mfatoho nye de, "Se ifura wo tam pa a, innhya w'asew".

Appiah (1993:7) wo Tettehfi (2009) kyere tam mu de, oye biribi a wowen fi asaba mu, ndua ekyir, wir na pii a okeka ho. Iyi da edzi de, wotum nya tam fi ndzamba pii mu ntsi na yewo atam asorɔtow wo ho a wotum fura anaa wodze bu atar hye.

Atamfura yɛ kwan ahorow no mu kor a Akanfo mbaa fa do da hɔn nyimdzee wɔ abrabo mu (Sutherland, 2005).


2.4 Kwan a atam fa do nya hɔn edzin

Akwan ahorow pii na atam fa do nya hɔn edzin. Nhwehwɛmu kyere dɛ atam pii a ɔwɔ gua do no wɔ edzin na ɔnam iyi do na muhun akwan ebiasa a atam fa do nya hɔn edzin. Dza odzi kan no nhwehwɛmu kyere dɛ hɔn a wɔye atam anaa atamyɛfo no ara ma atam no edzin ansaana aba gua do, Dza ɔtɔ do ebien no so muhun dɛ hɔn a wɔtɔn atam anaa atamtɔmfo so tum ma atam no dzin wɔ aber a wɔakɛfa efi atamyɛfo hɔ. Dza odzi ewie no so muhun dɛ nyimpakuw binom so tum dze dzin na nsenkyerɛdze dze kɔ atamyɛbea hɔ ma wɔye tam no na wɔdze dzin no gu mu ma hɔn.

Nhwehwɛmu kyere dɛ atam no no dodowara na wɔdze hɔn edzin fi bea wɔye tam no dze ba. Sɛ dwumadzi bi mpo rokɔ do wɔ ɔman yi mu a, wotum gyina do yɛ tam dze dwumadzi no ne dzin no ma no, mfatoho nye Ghana@ 50 tam a wɔyɛ dze dzi ɔman yi ne mfe eduonum a wɔdze nya hɔn fahodzi. Kente tam bi tse dɛ Fathia Fata Nkrumah yɛ kente a wɔhyɛ daa wenee dze Nkruma ne yer Fathia a ofi Egypt man mu ne dzin too do. Appenteng-Sackey (1988) ne nkyerɛmu nye dɛ atamyɛfo no ara dwen dzin a wɔdze bɛma tam no anaa wɔbɛkyerɛw egu tam no mu ansaana aba gua do. Ɔtɔ dɛ, wɔdwen dzin a wɔdze to tam no do a amamfo hɔn enyi bɛgye ho na wɔdze to do. Ɔba no dɛm a tam no nnka gua na asa osian dzin a ɔda tam no do no ntsi. Sɛ ɔba no dɛm a dzin no ara na obiara dze bɛfrɛ tam no. Mber pii no atamyɛfo no so hwɛ nsenkyerɛdze a ɔwɔ tam no mu no wɔdze ma no dzin. Mfatoho nye 'Kwadu saw', 'Ahwer pɔw' na 'Aban nkaba'. Nkorɔfo tɔ dɛ wɔdze atam edzin toto hɔn abrabo hɔ anaa wɔpɛ dɛ obi hu tsebea a wɔwɔ

mu a, wotum dze tam no kasa kyere anaa da no edzi. Ne siantsir nye de atam ka onnye-kasa nkitahodzi no ho.

Ɔto do bio, se oba no de nyimpakuw bi reye tam a wotum dze dzin a wope de wodze to tam no do na no mu nsenkyeredze dze ko ma tamyefo no ye ma hon. Otum ba no de no wodze ye eyi anaa ayefor. Mber pii no se oba no dem a ekyir no se tam no bi ba gua do a dzin no a wodze maa no no ara na obiara dze be fre. Ndwumakuw pii na nde wowo hon atam a wodze ko edwuma. Wodze hon edwuma no n'ahyensewdze na wodze ko na ma wodze toto tam no mu ma hon ama obiara a obohu ehu dem edwuma yi ne tam nye yi. Binom so wo ho a se wope tam bi edzi dwuma a woma atamyefo no ma hon tam bi a onnyi dzin na hon ara ma no dzin bi a wope. Ɔtofabi so a se oba no de woreye nyimpa tsitsir bi n'eyi anaa de se oridzi n'awoda a, wotum ko bea a woye tam ma woye tam dze ma hon ma wodze dzi dwuma no. Wotum dze nyimpa no ne mfonyin na ne dzin ye tam no.




Ɔto do bio, se tam bi benya ne dzin a onam atamtomfo do. Atam no bi wo ho a oba gua do a dzin biara nka ho ntsi hon a woton tam no na woma no dzin. Atamtomfo no tum hwe nsenkyeredze a owo tam no mu do ma no dzin. Ɔtofabi mpo dzin no nnye nsenkyeredze no nnko, wobɔ ebira koraa naaso onam de wodze dzin no ama no nkotsee dze dem dzin no ara na wodze fre tam no. Mber pii no atamtomfo no tum hwe dwumadzi a oroko do anaa oroboko do tum ma tam dzin bi a onye no ko ama atwe atɔfo ama hon. Wotum hwehwe abebu anaa ekutsiasem bi dze to tam do.

Mo nhwehwemu no so muhun no de atam no bi so wo guado a onnyi dzin. Atam a otse dem ennya dzin emmfi atamyefo ho anaa nyimpakuw bi ho anaa atamtomfo ho.

Atam edzin no bi abebu, bi ye ekutsia bo na bi so kitsa nyimpa dzin. Atam a oye abebu no bi nye: “Dua kor gye ehum a, obu”, dza oye ekutsia no so bi nye “Metamfo ma nntwitwa woho nnkyere me” nna dza okitsa nyimpa dzin no bi nye “Felicia na Angelina” na pii a okeka ho.

2.5 Dza enyimdzezo aka afa atam ho

Mfantsefo Nkasafua na Kasa Mbirenyi Nkyerease buukuu a Sofopanyin Joseph Yedu Bannerman na nkaa (2012) kyerewee no so kyerere tam ase de, ‘oye adze a nyimpa fura, odze kata n’adagyaw do, efuradze a wodze bi so bu atar, na dza okeka ho. Iyi si do dua de yedze tam kata nyimpa n’adagyaw do.




Abakosem ama yeatse ase de, tsetseber do no nna hen nananom dze mbowa nwoma na wodze kata hon adagyaw do. Ne dem no ntsi, nna nyimpa yen mbowa ama oenya nwomana wodze akata honho. “Anthropologist” so gye dzi de mbowa nwoma na ahataw ye biribi a nyimpa dze bo noho ban fi awow, hyew na nsu ho nkankahon a wofi beebi fofor. Mber kakra ekyir no nyimpa hun de wotum dze ahoma wen tam. Abakosem kyere de hon a nna wotse mbotanmu na nduamu no dze mbowa nwoma na ahataw yee ntar. Bio, wodze ntekyere na ndua ho so yee tam. Otofabi so a, wodze mboba na dadze so ye ahondze. Onam nyimdzee a nyimpa nyaa no wo abodzenyansape mu no, nkurow bi tse de India, China Egypt hye ase de woreye dza nde mber yi yefre no “Textiles” (Microsoft Encarta, 2009).

Quist (1995) so kyere de atam ye ntar bi a nyimpa hye anaa ofura dze kata ne nyimpadua ho. Ndzemba ahorow a nyimpa dze ka atam ho dze siesie no ho bi tse de, asowamuadze, konmuadze, mpaboa anaa asopatsee, baage nye pii a okeka ho no nyinara boa ma nyimpa no ho ye few. Iyi ma oda edzi de, ndzemba ahorow a nyimpa dze ye no ho ma oda nsew. Atam na akadze ahorow a nyimpa binom dze ye hon ho ma afofor tum hu de oye obirempon. Bio, hen afadze tum kyere bea yeroko, de oye asor, enyigyebeta, edwuma, eyiase, abadzinto ase, guabo na dza okeka ho.

2.6 Atam no dwumadzi de oye anomu kasa nkitahodzi

Anomu kasa nkitahodzi ye kwan a wofa do dze nkasafua nye afofor tum dze kasa. Otum ye dza woakyerew na dza wodze ano ka. Dza odzi akotsen wo anomu kasa nkitahodzi mu nye nkasafua a wodze ka asem no, mbre etsiefo no tse asem no na kwan a wofa do kyere asem no mu.



Nkitahodzi ye adze bi a no ho hia papaapa ma nyimpa dasanyi na mbowa nyinara. Anomu kasa nkitahodzi mu wo nyimpa afa mu no ohia, de dza woakyerew anaa dza wo kenkan. Simona (2018) kyere de anomu kasa nkitahodzi gyina ngyegyee na kasa a wotum dze ka asem kyere afofor. Okyere mu de, anomu kasa nkitahodzi ye kwan a obi fa do dze kyere ne atsenka na oda ne adwenpaw bi edzi. Iyi da edzi pefee de kasa a yedze dzi nkitaho no hia paara wo hen daadaa abrabo mu.


2.7 Atam ne dwumadzi de ɔye ɔnnye-anomu kasa nkitahodzi

Enyimdzefo pii na wɔaye nhwehwemu afa ɔnnye-anomu nkitahodzi ho. Ngo (2017) wɔ ne dwumadzi mu no kyere de se ɔba no ɔnnye-anomu nkitahodzi a, nyimpa pii na hon adwen a wonya no fa gyina nkitahodzi dwumadzi do. Dem ara so na Khozyainova (2017) kyere de ɔnnye-anomu kasa nkitahodzi nnye mbre ndze a yedze kasa ne sor ko anaa ne famu ba anaa kasa ne har do na mbom ne nyehyee no nnda ho. Bio, ɔkyere de ansaana obi bohu nkitahodzi a obi dze ne tam anaa ne atar ridzi no nnye adze a ɔda famu, osiande otum ka nsem pii fa nya ɔdze aye no ho, de ɔkyere ne tsebea, de ɔye ahyensewde anaa no suban. Demara so na nsenkyeredze tum gyina ho ma ndzamba pii na ɔye ɔnnye-anomu kasa nkitahodzi no mu kor. Obi tum hwe nsenkyeredze a ɔwo obi ne tam mu tum dze hu tsebea a obi wo anaa otum hu dza tamfurafo no pe de ɔdze to gua. Nsenkyeredze, nkyerewee na ahosu a wɔdze dzi dwuma wo Akan atam mu no kasa kyere afofor. Iyi tum boa ma wohu obi ne amambra anaa ne dzibew na afei so oma nyimpa no da nsew. Enyimdzefo ama yehu de nsenkyeredze a yedze hen honandua akwaa no ye nye mbre yesi ye hen enyim ber a yenyebi ridzi nkitaho no hia papaapa, osiande otum kyere tsebea obi wo mu na bio, ɔkyere ma obi pe de ɔdze to gua. Duje (2019) ne dwumadzi a ɔye faa atam ahosu ho no kyere mu de ahosu ye biribi a no ho hia, osiande ɔkyere obi no su wo ndzamba a ɔye few ho.

Frank na Gilovich (1988) kyere de atam ahosu tum nya tum bi wo nyimpa no su do. Hon nhwehwemu no tumii kyere de nyimpa a wɔhye tuntum no ye nkorɔfo a hon enyi aber kyen hon a wɔhye fufuw. Adams na Osgood (1973) so ka fua hon dze no de. se ɔba no amambra mu a, tuntum ye ahosu bi a wohu no de ogyina ho ma mbusu anaa owu. Nhwehwemu ama ada edzi de, atam ahosu kitsa su soronko bi otum kyere nyimpa dzibew, ne mfe, nyimpakuw a ofi mu nna bio so otum kyere de se nya ofura tam no

awar anaa onnwaree. Iyi ne saso ntsi atam wemfo no tum hyehye atam n'ahosu ma oda ne few edzi na otum kyere ndzamba pii so ase. Enyimdzefo yi hon nhwehwemu dwumadzi yi annka biribiara ammfafa kasa mbra nhyehyee ho. Ne dem no ntsi dwumadzi yi reye nhwehwemu afa kasa mbra (sentase) nhyehyee na sohyiolengwesteks mpensampensamu afa Akan daadaa tam ho.

Yankah (1995) se akwan pii na Ghananfo mbaa nam do dze kasa, naaso kwan kor bi wo ho a wommfa nndzi agor koraa na dem kwan no nye hon atamfura. Wogyina ndzamba ahorow bi tse de atam edzin, atam ahosu na mpo kwan a wofa do fura tam dze kyere hon abakosem. Okyere mu de obi aowo enyigye mu de obi awoawoo fofor tum fura tam fufuw dze kyere nkonyimdzi. Obi aowo awerehow mu so fura tam tuntum dze da ne tsebea edzi. Dem ndzamba yi nyinara tum kasa kyere ankorankor.



2.8 Atam mu nsenkyeredze

Akwan ahorow pii na wofa do dze nkitaho. Wotum dua dem nsenkyeredze ahorow aowo atam mu do dze dzi nkitaho pii. Nhwehwemu kyere de atam no bi mu nsenkyeredze no nye ne dzin nam. Mfatoho bi tse de “*Aban Nkaba*”, *Akyekyere ekyir*”, “*Ahwerpow*”, “*Nsu bura*” na pii a okeka ho.

Wendren (2008) kyere de, atam mu ahyensewdze ahorow no tum ka nsem pii fa nyia ofura tam no no ho. Nsem a otum ka fa hon ho no bi ye awensem, abebu, kasambirenyi na pii a okeka ho. Iyi ma oda edzi de, atam mu nsenkyeredze tum dzi akotsen wo atam

edzin ho. Atamtɔnfo dodowara na wɔhwɛ nsenkyerɛdze a ɔwɔ atam mu ma hɔn edzin na iyi tum boa ma hɔn atam guadzi no kɔ do yie.

2.9 Siantisir a yefura tam


Nyimpa biara wɔ ndzɛmba bi a no ho hia no ntsi se otum nya dɛm ndzɛmba no nyinara a, onya ahomka na afei so n'enyi gye. Atam anaa atar a nyimpa fura anaa ɔhyɛ no ka ndzɛmba etsitsir a nyimpa hia no no ho. Ne dɛm ntsi nyimpa gyina siantisir ahorow do na ɔdze fura tam.

Nhwɛhwɛmu ada no edzi dɛ atam yɛ efuradze a yɛdze kata hɛn adagyaw do. Bio, yetum dze tam kata hɛn ho ma ɔhyew ka hɛn na aber kor noara so yetum dze bɔ hɛn ho ban fi ndzɛmba ahorow a etwa hɛn ho ehyia a obotum ahaw nyimpadua no. Asare-Poku (1991) so kyere dɛ nyimpa binom fura tam bi dze kyere hɔn gyedzi, hɔn adwen wɔ aber a wɔrennkasa na mbom tam no ahosu na nsenkyerɛdze no bedzi kasa ne dwuma. Atam anaa ntar a yehyɛ no ka nsem pii fa hɛn ho, osiandɛ ɔno nye adze a obiara dzi kan hu wɔ nyimpa ho. Nde mber yi atam a yefura anaa yehyɛ nnye dɛ yɛdze rekata hɛn adagyaw do na mbom abeyɛ kwan kor a yɛdze dzi nkitaho.

Bio, nyimpa tɔ tam na ofura tam a ɔwɔ gyedzi dɛ mfaso wɔ ho ma no na bio nsem a ɔdze to gua so. Atam edzin dze nsem to gua pii, iyi ntsi ɔma afofor hu dza ɔrokɔ do wɔ obi n'abrabo mu.

Barfuo (1993) ne dwumadzi no so kyere mbre atam na no ho akadze a wodze siesie honamdua ho si hia Asantefo. Oko do kyere de, onam de Asantehen ye ahemfo a wowo Asanteman mu no nyinara hon panyin ntsi, owo de aber biara oda nsew wo ahemfo nkaa no mu no ntsi, ahemfo nkumaa a wohye n'ase no hwe hu de n'afadze a odze bokoo guabo anaa dwumadzi biara ase ye soronko. Dem ahemfo nkumaa yi hwe Asantehen n'ahosiesie do. Ohwe ne tam, mpaboa nye egudzi ahorow a odze besiesie no ho. Iyi ma oda edzi pefee de atam ahorow na no ho akadze a nyimpa fura no tum kyere ne dzibew.

Reed (1973) kyere de, atam a yefura no tum sesa mbre yesi tse. Oko do kyere mu de, nyimpa biara ne tam a ofura no ma oda nsew, otum kyere no bo osom anaa ne dzibew. Bio, hen tam a yefura no ma tsebea bi a yewo mu da edzi, de oye enyigye anaa awerhow. Atam edzin na otofabi so a, ahosu no so tum kyere bea a obi rokoo anaa dwumadzi bi a oridzi.



2.10 Kwan a Akanfo fa do fura hon tam

Atam pii na Akanfo dze dzi dwuma wo hon daadaa abraboo mu. Ansaana obi bofura tam no, ogyina dem nyimpa no ne nyimpa ban a oye anaa kuw a odom (Kwon, 1987). Iyi kyere de atam da nyimpa no su bi edzi na okyere nkitahodzi a nyimpa no ridzi. Ankorankor mmfa atam nnkyere hon su nkotsee na mbom wotum dze ye ahyensewdze a otum ka hon ben afofor. Ansaana Akannyi bi bofura tam no, ohwe ndzembra pii na otum so bisa noara no ho nsem bi a anaana oefura. Tam furafo no tum bisa no ho de, na eben bea na medze tam yi rokoo anaa ana tam yi fata dwumadzi a morokoo ase no? Tam furafo no tum gyina dem mpensampensamu a noara nye no ho aye no tum hu afadze a owo de ofa. Atam a Akanfo fura otum da hon tsebea, hon su na hon nyimpa ban edzi no nye yi; Kente, Adinkra, mpanyintam na daadaa tam. Me mpensampensamu no gyina

daadaa tam ho. Nhwewwemu kyere de nnye atam edzin nkotsee na Akanfo gyina do dze to na mbom nyimpa binom so tum gyina tam n'ahosu na nsenkyeredze ahorow a ewe atam no mu no do dze to.

2.11 Akan atam ahorow

Akanfo atam a wofura no gu mu ahorow. Dem atam ahorow no mu bi na mada no edzi wo ase ha yi.

2.11.1 Kente


Yehwe atam ahorow yi Akanfo dze dzi dwuma yi a, Krampah (1997) kyere kente n'abose de ohye ase wo Firaw Mantow mu nye Bonwire a wo Asanteman mu. Okyere de. Enuanom beenu bi a wofre hon Krahan na Kragu Ameyaw a wofi Bonwire ahemfie na wokor haban mu kohun ananse a woren ntentan. Enuanom yi sua ma ananse si wen ntentan no dze hye ase de woren tam no bi. Dem ber no nna ohen a wo ho no ye hon busuanyi ntsi ohye hon nkuran ma wokor do wen tam yi a nde abeye etsitsir tam yi. Krampah (ibid) kor do kyere de, yewo kente a oye tsetse dze na dza oye nde mber yi so mu dze.

Agyekum (1995) na Krampah (1997) nyinara da no edzi wo hon dwumadzi mu de Kente ye tam bi a yemmfa no basabasa. Oye tam a yemmfa nko eyiase anaa yemmfa ngor asafo na mbom wofura Kente ko guabo bi tse de afahye ase anaa dwumadzi soronko bi ase. Menye enyimdzefo yi ye adwen, osiande Kente biara n'enyi da ho anaa ohyiren na

oyefew ntsi onnye biribi a wɔdze kɔ eyiase anaa wofura aber a wɔrenndzi dwuma bi a onnye enyigye. Eyiye ber ye awereshow ber ntsi na wommfura Kente nnko ase no.

2.11.2 Adinkra

Adinkra ka Akan atam ahorow no ho. Oye tam a oye tsetse tam a hen nananom dze edzi dwuma ma nde ebody hen so hen do. Tetteh (2014) & Krampah (1997) kyere adinkra ne dwuma odzi no bi gyina tam no ahosu na nsenkyeredze a owo mu. Hon nkyeremu no nye de se obi fura dza n'enyi ye tuntum a nna okyere de onyia no wo awereshow mu. Akan mu no, tam biara a n'enyi dum anaa oye koben biara gyina ho ma eyi anaa awereshow.



Agyekum (2008) kyere de Akan atam gu ahorow ebiasa. Ne nkyekyemu no nye dza oye daadaa tam a me dwumadzi yi fa ho, dza wɔdze kɔ eyi na dza wɔdze kɔ guabo ase. Nkyekyemu yi ye nokwar, osiande Akanfo mmfura tam biara biara na mbom wohwe dwumadzi a oroko do ansaana wɔafa no ho afadze. De mbre enyimdzefo binom edzi kan aka no, wɔdze Kente kɔ enyigye bea, Adinkra tam so wɔdze kɔ eyi na daadaa tam dze ne dwumadzi no bi nye de wɔdze kɔ asɔr, wɔdze kɔ guabo ase. Wɔdze kɔ eyi na mbea pii. Dwumadzi yi reye nhwehwemu afa daadaa tam ho na mbom nnye Kente anaa Adinkra ho.

2.11.3 Brɛbetse (velvet)

Brɛbetse ka atam ahorow a yewo no ho. Yehu no de oye mpanyin tam a tsetse no nna hen nananom fur adze kɔ dwumadzi ahorow ase. Krampah (1997) kyere mu de, brɛbetse a nara so wofre no ago ye tam a wɔwen no aborokyir na wɔdze ba ebibirmu ha boton.

Abakosem kyere de, bɛbetse tam yi ye tam bi wewen no China. Oye tam a nna otode wo dze asofo ndzamba bi tse de, hon ntar, ndzamba ahorow a wodze kata aforpon do na pii okeka ho. Binom so dze ye ngua sisi dan mu. Afofor so dze no ntwitwado dze to ahwehwemu dze mfonyin ahorow bobo hon adanmu. Dem awindze yi ye awendze osom bo ara yie. Enyimdzefo binom so ama ada edzi de wonya dem ahoma a wodze ye bɛbetse tam yi fi serekye ahoma mu.

2.11.4 Daa daa tam

Atam ahorow pii na yetode yedze dzi dwuma wo abrabo mu. Na atam so dzi dwuma pii ma nyimpa biara. Adjei-Sakyi (2016) kyere de dwuma a tam taa dzi ma ankorankor no bi nye de obo nyimpa noho ban fi honam enyi akwanhyia ahorow ho. Bio, oye adze bi so a yenntum nngya no ekyir wo hen abrabo mu, osiande nyimpa runntum mmfa n'adagyaw nnto do nnkyerekyere ma afofor nnhwe. Iyi ye enyinguase, ne dem no ntsi na ama yewo daadaa tam a aber biara yefura dze dzi dwuma.

Daa daa tam ye atam bi a wotum fura dze ko beebiara (Bonsieh, 2020). Otum ye ayefor, eyi, guabo ase, abadzinto, edwuma anaa asor. Dem dwumadzi yi wotum hwe tam no n'ahosu na ne dzin na wodze fura. Tam a n'enyi da ho no wotum dze ko guabo ase, asor, abadzinto, ayeforhyia ase nna dza n'enyi dum no so wodze ko eyiase. Daadaa tam ye ttam a wotum dze dzi nkitaho wo aber a ofurafu no rennkasa nnkyere afofor. Tam no ne dzin, ahosu na nsenkyeredze a owo atam no mu no nyinara kasa kyere afofor. Daadaa tam a nkorofu fura no tum kyere hon tsebea a wowo mu. Bi tum kyere awerehow anaa enyigye a obi wo mu. Dem atam yi bi so dzin ye abebu "Ahondze pa nkasa". Abebu so ye enyansasem a wodze twa asem tsia. Mpanyin se "Oba nyansafo wobu no be na

wonnka no asem”. Asempa so ye tsia. Iyi ntsi wo dze tam no ne dzin twa asem bi tsia a wo ntseasee soronko.

Bio, daadaa tam no bi so kitsa ekutsia dzin Mfatoho no bi nye: “*Ebeka moho asem a fa egua tsena do*” Obi tum fura tam dze ne dzin no kyere biribi a n’enyi nngye ho. Otofabi a, tsebea a obi ma ne nyenko nyimpa bi ko mu no nnye, ne dem no ntsi binom tum fura tam dze kyere hon ma ndzamba tse wo hon abrabo mu. Dwumadzi yi ne tsitsir gyina daadaa tam edzin do. Nhwehwemu kyere de, mbaa to de wodze tam kasa mber pii, osiande wonam dze da hon abrabo mu suahun edzi kyere ankorankor (Sutherland, 2005).

2.12 Akanfo hon tam furabew

Akwan ahorow pii na Akanfo fa do fura hon tam. Bonsieh (2020) da no edzi de dem kwan no nyinara wo nkyerease osiande okasa kyere nyimpa tse de mbre tam noara so kasa no. Akan mbanyin na mbaa nyinara wo kwan a wofa do dze fura hon tam. Mbre mbanyin fura hon atam no tum kyere dzibew anaa hon ahonya. Se ankorankor bohu binom hon ahonya anaa hon dzibew a, wotum hwe mbre wosi tutu hon atam. Binom tum fura tam no ma otwuw famu a okyere de tam no ye noara ne dze a wannkesere emmfi obiara ho. Akanfo ntseasee kor so nye de, se obi fura tam na oma do ko sor a nna okyere de okesere tam no ntsi onnyi de ogu famu ye fi. Se yeba Akanfo mbaa no so a mbre wosi fura hon akatado no tum kyere de obi ye osigyanyi anaa owarfo. Se basia bi fura tam na odze akatado ka ho na oma n’ana no nyinara ye per a okyere de oye owarfo. Demara so na ofura tam na wammfa akatado annka ho a okyere de oda ho gyan. Bio, nhwehwemu kyere de se Akanyi basia fura tam na oma akatado no kor bor kor do a nna okyere de banyin a onye no tse no nnye n’adze de oye kun, Nhwehwemu kyere de wofre

dɛm tamfura no kwasia bi dzi m'ekyir. Ndɛ mber yi nkataasia dodowara na wɔdze tam pam ntar hyɛ ntsi tamfura abɛyɛ mpanyimfo dze.

Ɔnam dɛ ɔnnye beebiara na wofura tam biara kɔ no ntsi, nyimdzeɔ bi tse dɛ, Mensah (2008) ka wɔ ne dwumadzi a ɔfa atam edzin ho dɛ, dzin a tam bi kitsa ana ɔkyerɛ bea obi botum efura dze akɔ. Akanfo mbea etsitsir a wɔ tɛ dɛ wofura tam dze kɔ no bi nye eyiase, abadzinto, awargye ase na pii a ɔkeka ho. Ne dɛm no ntsi, obi nntum mmfa afadze biara nkɔ bia ɔtse dɛm. Mber pii no sɛ obi fa afadze bi a ɔnnye dwumadzi bi nkɔ do a, ɔtɔ mu. Akanman mu no mpo wotum pam nyimpa no anaa wɔbɔ no kaw.

2.12.1 Nkitahodzi a wɔdze tam dzi

Mohan na Banerji (2000) kyere dɛ, nkitahodzi yɛ ɔkwan a yɛdze asem bi ma obi na afofor so gye a ne tsirmupɔw nyinara nye dɛ ɔbɔboa nyimpa abrabo na ndzɛmba a etwa hɛn ho ehyia. Hɔn dwumadzi no ammfa kasa mbra nhyehyɛ na sohyiolengwesteks ho Ɔkyerɛ mu dɛ, dɛm nkitahodzi yi tum kɔ do wɔ aber a wɔdze ahyensewdze ridzi dwuma. Iyi kyere dɛ, obi botum ehu asem a obi fofor reka wɔ ahyensewdze a ɔwɔ ne tam mu. Atam edzin no bi wɔ hɔ a wonya fi ahyensewdze a ɔwɔ atam no mu, Tam bi tse dɛ “Aban Nkaba” no mu nsɛnkyerɛdze no tse dɛ nkaba a mbasiafo dze toto hɔn nsa.

Dogoe (2015) ayɛ edwuma afa mbrɛ aborɔfo dze ebibifo hɔn atam dze ridzi dwuma. Wɔ no dwumadzi no mu no ɔma ɔda edzi pefee dɛ aborɔfo afa ebibifo hɔn atam dze ridzi dwuma papaapa wɔ hɔn daadaa abrabo mu. Ahyensewdze a ɔwɔ hɛn atam mu no

bi na nde hon so wodze wen hon atam. Iyi ntsi ama ebibifo na aborɔfo hon ntar na atamfura nam kwan kor do.


Dzramado (2013) no dwuma a odzii faa mfaso na tam mu ahyensewdze wo hen kusum amandze na abaefer nsusuando a enya no wo hen amambra mu. No nhwehwemu no tsitsir no gyinaa kwan a enyibuei mbordo enya nsusuando wo hen atamfura do de yeƷe Ghana mba wo amambra mu na kwan a yebeƷa do etum ama hen kusum amambra etum egyina. No nhwehwemu no mmfa kasa mbra nhyehyee na sohyiolengwesteks mpensampensamu wo atam edzin ho.

DeFleur, Kearney na Plax (1998) kyere de yenam tamfura do kyere tsebea a yewo mu anaa tsebea a yeƷe de afofor hu de yewo mu. Amambra tum hye binom na wohye tuntum wo eyiase dze kyere awerehow a wowo mu anaa gyam a worigyam owufo no. Se ɔye nokwar anaa onnye nokwar o, ma yenyim ara nye de tuntum kyere awerehow. Dem enyimdzefo yi hon adwenkyere nye Yankah dze no se osiande hon nyinara rekyere mbre atam tum kasa kyere ankorankor anaa nkitahodzi a yetum dze atam dzi. Oko do kyere mu de, atam n'ahosu so tum kasa kyere afofor.

Okannyi basia a ohye tam fufuw na no ho akadze a ɔye fufuw no tum kyere de ɔye ɔwofo. Demara so na kɔkɔ so wodze gyina ho ma mbusu, anaa boƷya a, oko, owu nye ahohiahia (Asihene, 1978: 53). Dza Asare (1998) kyereew no wo no dwumadzi mu no kyere de kɔkɔ na tuntum na dubir ye ahosu a n'enyi dum ntsi Akanfo tum dze dem ahosu yi toto owu, ko ngu na ko ho. Akanfo dze ahosu a n'enyi da ho na ohyiren dze gyina ho ma enyigye, ahonya, na pii a okeka ho. Bruw so tum kyere ɔdo, ahaebun so

tum gyina ho ma kwaa mu nduadzewa na sika so gyina ho ma ahonya. Atam a okitsa dem ahasu yi woto de wofura no enyigye ber. Hon dwumadzi no mmfa kasa mbra nhyehyee ho.

McLeod (1981) da no edzi de, Akanfo abakosem wo atam ho no ko do sesa. Nyimpa no no su na ne gyanabew tum dze nsesa ba atamfura mu. Esuantsefo amanhen wo ahemfo nkumaa a wohwe hon ndzamba a wodze siesie hon h ntsi se oba no guabo bi a onnyi de ahemfo nkumaa no mu biara nye omanhen no fura tam kor. Owɔ de Omanhen biara da mu soronko se oba no de woko apontu bi ase a. Akwan ahorow pii na wofa do nye obi dzi nkitaho. Akanfo tum dze atam a wofura dze dzi nkitaho. Wotum dze nsenkyeredze a owɔ atam mu no dzi nkitaho. Dem nsenkyeredze ahorow yi binom nye tam no ne dzin ko na bi so nnye no nko anaa ommfa.



Dormaar (1993) so kyere de nkitahodzi tum ko do wo nyimpa ebien ntamu ansaana oedzi ehyia edzi ano na ano nkitsahodzi enam tam a wofura ntsi anaa so hon afadze ntsi. Nnye nsom nyinara na wodze ano ka na mbom bi wo ho a, afadze no nkotsee no tum kasa kyere afofor. Duukuu a obi bo nye konmuadze, asowamuadze nye ndzamba ahorow a nyimpa dze ye no ho no nyinara tum kyere tsebea, dzibew nye dza okeka ho no nyinara nam kwan bi do kasa kyere ankorankor.

Clarke (2002) ne dwumadzi a Howard, Sarpong & Amankwah kyereew no hon dwumadzi mu no kyere mu de, ahyensewdze ye biribi a no ho hia ara yie wo ebibifo hen amambra mu. Ne dem ntsi nna ebibir aboasefo no hon enyi gye ndzamba a otse dem ho. Ntsi kwan kor a nna wofa do dze da hon amambra edzi nye de, wodze atam ahorow a


oye few na oye soronko wo aber kor noara so oye ebibifo hon tam. Ahyensewdze no bi kyere abebu, bi so ye ahyensewdze a okyere tumdzi, dza ofa adzesua ho nna atam a ne ahyensewdze no gyina ankorankor hon dwumadzi bi.

Krampah, (1997) kyere de atam ahorow bi wo ho a wosom bo kese wo Mfantse amandze ho. Dem atam yi bi nye Kente, Adinkra, Kuntunkun na mpanyin tam ahorow so. Dem atam yi nyinara ye tsetse atam a Akanfo nntoto no ase. Tsetse no nna Adinkra ye tam a nna hen mpanyimfo dze kasa kyere omamfo. Abakosem kyere de, Adinkra ye ohen bi a nna wo Gyaaman a ohen Cote D'Ivoire man mu. Dem ohen yi fom Asante hen a nna wofre no Bonsu Panyin. Iyi ma Asantefo nye hon kedzii ako na wokum ohen no. Iyi maa Adinkra beyee Akanfo, tsitsiriw Asantefo eyi tam. Nsenkyeredze ahorow a wo Adinkra tam mu no nyinara wo dzaa oka kyere ankorankor. Iyi nyinara ye kwan a wofa do dze atam kasa anaa wodze dzi nkitaho. Nsenkyeredze bi tse de "Bi nnka bi" ye Adinkra asenkyeredze a ogyina ho ma korye a wo de oja enuanom nta mu. Dem nsenkyeredze yi twe hen adwen gyina su bon bi a wo de yetum twe hen ho fi ho. Su bi tse de, otan, ewudzi, nsisi, nantsir twitwa na pii okeka ho.

Asmah na Okpattah (2013) so kyere de, siantsir a wodze nsenkyeredze ahorow a wo atam mu dzi dwuma no de oye ne few, kusum amambra, osom na amanyesem gyina dza atofa no anaa hon a wodze tam no ribedzi no do. Dem nkyeremu a wodze maa yi kyere de se oja no amambra mu a atam no bi wo ho a wonntoto no ase. Nkankara Esuantsefo, Kente na Adinkra ye hon tam tsitsir se oja no afahye anaa guabo bi anaa eyiye mu a, wonntoto no famu koraa. Nde mber yi mu mba so hwe tam n'ahosu na odze to tam anaa odze fura tam. Iyi kyere de, tam ne dzin no nnhia hon papa biara.

Se mohwe nhwehwemu a enyimdzefo aye dze afa atam ho, muhu de nyinara no mfa kasa mbra na sohyiolengwesteks mpensampensamu ho. Iyi ma oda edzi de dwumadzi a ofa Akan atam edzin ho wo lengwesteks mu no nndzi mu nnwie ntsi dem dwumadzi yi bohwe kasa mbra na sohyiolengwesteks mpensampensamu wo Atam edzin ho.

Manu (2010) ka de atam nnye biribi a yedze siesie hen ho nko na mbom oye biribi a yetum dze ka aasem kyere afofor. Iyi ye nokwar, osiande onam tam fura do ma obi hu tsebea a obi wo mu. Atam edzin, ahosu na nsenkyeredze a owo atam mu no kasa kyere nyimpa. Manu ne nhwehwemu no annye biribi ammfafa sentase na sohyiolengwesteks nhyehyee a owo atam edzin ho.



Neilson (1979) wo Lartey (2018) kyere de tam biara ne dzin kyere adwen a nyia ofura tam no kitsa anaa noara ne abrabo mu suahu bi. Otum so ye siantsir soronko bi a ogyina do dze efura tam no. Iyi kyere de obi tum fura tam bi tse de, "Metamfo ma nntwitwa woho nnkyere me" wo aber a odze robo ekutsia, Iyi da adwen a owo ofurafo no ne tsir mu. Ohwehwemufo yi ne dwumadzi no ommfafa sentase na sohyiolengwesteks nhwehwemu no enndzi dwuma.


2.12.2 Abebu tam

Abebu ye kwan a wofa do kasa a wodze enyansasem bi etwa asem no do tsia. Enyimdzefo dodowara na wogyedzi de atam no ton ko do yie wo aber a ogyina ne edzin do .Wokyeremu de atam a wokitsa edzin a oye abebu, ekutsia nasembisa na pii a okeka

ho no nnkyer guado (Sylvanus, 2007; Akiwumi, 2008). Ɔye nokwar mapa osiandɛ, tam bi tse dɛ, “Ahondze pa nnkasa” Dɛm tam yi ne nkyerɛasee nye dɛ adze biara a ɔye papa no kasa biara nnyi ho. Bio, nkyerɛmu fofor so a yebotum dze ama tam yi nye dɛ obiara a onyim dze anaa nyimdzee a no dɔ mapa wɔ biribi ho no mmfa dza onyim no nntuw noho. Demara so na tam bi tse dɛ, “*Kora tse dɛ nantwi bin*” so ye ekutsia bɔ tam. Ɔnam dɛ nantwi bin, aber biara n’enyi ye wesewese na n’ase no pɛkyɛpɛkyɛ ntsi wɔdze toto kora ho, osiandɛ, akorafo serew enyiwa do nanso akoma mu dze, wɔnnka koraa.

2.12.3 Ekutsiabɔ


Ekutsiabɔ ye kwan a obi fa do dze nkasafua bi dze ka nsem bi kyere afofor wɔ aber a ɔnnka nnsi nyimpa no enyim. Otum ye anomu kasa na otum so ye nsenkyerɛdze bi a obi ye. Ɔtɔfabi a mbrɛ obi besi aye n’enyim akasa anaa ɔdze ahwe obi no kyere nsem pii. Atam a wofura no so wotum dze bɔ ekutsia, Atam edzin ahorow no dodowara ye ekutsiabɔ. Atam no bi nye:

- 
- a) Kora tse dɛ nantwi bin
 - b) Medze mese abɔ adwe ma kwasea abɛfa
 - c) Ɔbra rutwa wo a, ɔtse dɛ seradaa
 - d) Ɔhyɛ wo bo
 - e) Metamfo ma nntwitwa woho nnkyere me
 - f) Ebɛka moho asem a fa egua tsena do

Mfatoho a ɔwɔ sor yi nyina ye atam a okitsa ekutsiabɔ dzin.

2.13 Nsusuando ahorow a atam enya no wɔ nyimpa do

Atamfura ye annyɛ-anomu kasa nkitahodzi kwan kor a wɔfa do dze dzi nkitaho na atam dze nsusuando pii na atam enya no wɔ adasa do. Ne tsitsir wɔ Ghanaman yi mu mpo nyimpa dodowara na atam a wofura anaa ntar a wɔhyɛ nnkyerɛ nkyirma akyerɛ pa. (Ryan 1966) kyere dɛ, atar a obiara bɛhyɔ anaa tam a obefura no ma ɔyɛ soronko na ɔda nsew so. Ndɛ mber yi mu mba tsitsir na na wodzi dwuma a ɔtse dɛm. Iyi ama hɛn amambra dɛ yeyɛ Akanfo no akɔ famu. Mpanyin dɛ, “akatasia kata no ho sie” naaso ndɛ mber yi ɔntse dɛm, osiandɛ nkatasia tum hyɛ ntar a hɔnho nyinara gu do wonnyi fɛr anaa wonnhu enyiwu biara wɔ ho. Nhwɛhwɛmu ama ada edzi dɛ, aborɔfo hɔn amambra no na ama enya nsusuando bɔn wɔ ndɛ mber yi mu do. Dɛm abrabɔ bɔn yi ama suapɔn binom a ɔwɔ ɔman yi mu ahyɛ hɔn adzesuafo ma wɔhyɛ ntar a mbra ma ho kwan dɔ wɔnyhɛ. Esuapɔn bi tse Valley View esuapɔn mu wɔ skuul atar a wɔhyɛ ama nkataasia tsitsir annhyɛ ntar a obotum ayɛ sintsidua ama afofor.



Mbɔndarto pii a aba ɔman yi mu no dodowara gyina ntar a ndɛ mber yi mu mba hyɛ do. Ne saso ntsi, nkurownkurow ahorow na wɔhyɛ mbra dɛ wɔdze bɔtwe hɔn a wobobu mbra no do no. Ndzɛmba ahorow na wɔdze toto akwan mu naaso bi tumii boae na bi so enntum annyɛ yie.

Mfaso pii na nyimpa nya fi tamfur naaso ndɛ mber yi mba dodowara ama siantsir a adasa dze fura taam no no mu dur akɔ famu. Mfaso no bi nye dɛ ɔboa yi nyimpa n’ahoɔfɛw pue ma afofor tum kamfo hɔn naaso ndɛ ber yi dze wotum fura tam anaa wɔdze bu atar ma wɔhyɛ mpo a nna hɔn ho gu hɔ. Mbɛre woesi apam tam na mbɛre wosi

fura tam no nkotsee mpo tum kyero obi ne nkyir de Akanyi, awonanyi, frafranyi na pii a okeka ho.

2.14 Atamfura ho mfaso

Enyimdzefo dodowara hon nhwehwemu fa atam ho no da no edzi pefee de yewo atam a mbanyin fura na dzaa mbaa fura. Iyi nam hen amambra do ba naaso nde mber yi onam enyibuei mbordo na suatra ntsi ama mbaa tum hye mbanyin ntar. Akan amambra mmfua dem do naaso dza aborofo ye no etum enya nsunsuando pii wo hen amambra no do.


Yarwood (1992) ne dwuma a odzii dze faa atam ho da no edzi de, ndwumakuw ahorow a wowo ntar a wohye dze ko edwuma no ma woda nsew. Menye no ye adwen, osiande anesefo, mbranyimfo nna aban edwumayefo no dodowara na wowo ntar a wohye ma ono ntsi se wonam roko a obiara hu hon edwuma a wo ye.

Bio, nhwehwemu kyere de, onam suro a nna nyimpa suro wo n'abrabo mu ntsi, nna nyimpa dodowara gyegye ndzamba fi akomfo na edunsifo dze toto hon ho dze be hon ho ban fi mbusu na esian bi ho. Sarpong (1974) ne dwumadzi kyere ndzamba ahorow bi tse de, nserba, ahondze na pii okeka ho nyimpa dze toto no ho a wodze bo honho ban. Nna mber pii no apemfo na wodze dem ndzamba yi dze bo hon ho ban fi enyiwa bon, abayifo na esunsum bon ho onam hon gyedzi ntsi.

2.15 Kasa ho mbra

Miller (2002: 12) kyerɛ mu dɛ kasa mbra yɛ kwan a wɔdze nkasafua bɔmu ma wonya asemfua, asempruw na asentɔw. Iyi kyerɛ dɛ sentase yɛ linguisteks ne fa anaa ne nkorbata bi a otum kyerɛ mbrɛ kasa ne hyehyɛɛ a otum ma nkasafua tum beyɛ asempruw na asentɔw. Sɛ kasa nhyehyɛɛ botum edzi mu a, ɛwɛ dɛ aber biara no nkasafua a wɔaka abɔ mu ma ayɛ kasafua no tum dzi dwuma dɛ dzin, nyɛɛ na pii a ɔkeka ho.

Chomsky (1965) so kyerɛ sentase ase dɛ ɔyɛ kwan a wɔfa do anaa nhyehyɛɛ a wotum fa do dze yɛ asentɔw wɔ kasa bi ho. Ɔkɔ do kyerɛ mu dɛ sentase yɛ kasa ho mbra ne fa bi a ɔfa kasafua, asemfua, asempruw na asentɔw ne nhyehyɛɛ ho. Dza enyimdzefo yi aka afa sentase ho yi nyinara yɛ nokwar, osiandɛ yerunntum nnkeka nkasafua biara mmbobɔmu demara na gyede yɛdwɛn-mbrɛ yebesɛ ahyehyɛ nkasafua ahorow no ma ntseasee aba mu.



2.15.1 Dzin

Dzin yɛ ahyɛnsɛwdze a wɔdze ma nyimpa, mbowa, ndzɛmba na kurow. Wegryn (2008) kyerɛ dzin mu dɛ ɔyɛ biribi soronko a wɔdze hyɛ nyimpa nsew. Dzin ne ma gyina ndzɛmba bi tse dɛ tsebea a obi wɔ mu ho na pii a ɔkeka ho. Dzin ahorow ho dwumadzi na enyimdzefo ayɛ. Dem dwumadzi no bi yɛ nyimpa dzin, nkurow edzin na mbowa edzin. Agyekum (2010) ne nkyerɛmu a ɔdze ma dzin nye dɛ, ɔyɛ ahyɛnsɛwdze a wɔdze ma nyimpa, mbowa ndzɛmba na mbeambea. Ne nkyerɛasee no yɛ nokwar turodo, osiandɛ ɔboa ma yehu nsonsonɛɛ a ɔda nyimpa, mbowa na mbeambea mu. Rosenhouse (2002) so kyerɛ dɛ lengwesteks mu no, dzin yɛ ahyɛnsɛwdze a wɔdze toto biribi a ɔsombo, hɛn gyedzi na dza osisi wɔ nyimpa n'abrabɔ mu ho. Dzin ma nyimpa da nsew.

Adjah (2011) so ne nkyeremu a odze ma dzin nye de dzin a wodze ma nyimpa no tum kyere ebusua a ofi mu. Ne nkyerese no da edzi pefee de se wowo abofra na wo ma no dzin ara nna wabeka ebusua no ho. Me nye edzimdzefo yi nyinara ye adwen de dzin ma ye da nsew na oboa ma yehu hen abakosem de yeye Akanfo na mpo ebusua yefi mu.


2.15.1.1 Nyimpa edzin

Nyimpa dzin ye ahyensewde a wodze ma nyimpa. Oma nyimpa no da nsew fi afofor ho. Yehwe nyimpa dzin a, Adomako (2017) yee mofologyi na fonologyi nhwehwemu faa Akan mbaa ebusua edzin ne nyee. Ne dwumadzi no mu no, okyere akwan ebiasa wotum ma nyimpa dzin. Iyinom nye: dza wodze ma mbaa nkotsee, dza wotum dze ma mbaa na mbanyin nyinara na dza wodze ma mbanyin na mbom wotum d7ze moofem dze bata ho ma wonya ne mbaa dzin. Ne dwumadzi no kyere mbru4t7yne Akuapemfo tum nya hon mbaa dzi wo aber a wodze **-bea**, Asantefo so dze **-baa** nna Mfantsefo so **-ba** dze ye nsiekyir ma mbanyin dzin dze nya mbaa dzin. Otofabi so a, wotum dze **-wa** anaa **-waa** dze ye nsiekyir. Iyi kyere de Akanfo dodowara na wodze nsiekyir bata edzin ho dze nya edzin afofor nkankaara mbaa dzin. Mfatoho bi tse de:

| Mbanyin | Mbaa |
|----------------|-------------------|
| Mante | Mante bea |
| Asano | Asanowa |
| Nketsia | Nketsi aba |
| Oben | Obenewa a |

Mfatoho a wo sor no kyere mbre Akanfo tum nya mbaa edzin fi mbanyin dzin mu. Iyi kyere de abaatan binom tum hwe hon mba hon bobew wo awow mu dze ma hon edzin.

Se abofra no no ho ye few a wotum hwe ho dze ma no dzin. Bio, wotum gyina dwumadzi bi do de nye afedzida bi do dze ma nyimpa dzin. Abofra a wo woo no buronya da no wotum to no Kwesi Buronya anaa Esi Buronya. Demara so na wotum woto abofra bi Esi Odambea wo Akyemfo Odambea afahye. Odambea no ye afahye a Nkusumkum mba na wodzi ntsi obi tum dze afahye no ne dzin to ne ba ber a woridzi dem afahye. Obeng (1998) ne dwumadzi a odzii faa pragmatese na nhyehyee a wo Akan Kosamba edzin ho no so kyere de, Kosamba dzin ye dzin a wodze ma obi a wo wo no a nna oewu na wosan aba. Akanfo hon gyedzi nye de wodze dem dzin no ma abofra no ama woansan annko n'ekyir. Nhwehwemu kyere de, yennyi Kosamba dzin a nye mbaa na mbanyin dzin na mbom hon nyinara kitsa dzin kor. Mfatoho bi tse de, 'Hweaseammba' na 'Damugyan' anaa 'Owummpewo' nyinara wotum dze to banyin na basia. Adomako na Obeng hon dwumadzi yi kyere nsonsonoe a oda mbre Akanfo fa do nya hon edzin.



2.15.1.2 Nkurow edzin

Kurow ye bea bi a nyimpa tum tsena na obo ne bra. Se yereka dzin ho asem a, yerunntum nngya nkurow edzin wo mu. Akan nkurow edzin no dodowara na wo abakosem a nye ahomka. Owu-Ewie (2014) ne dwumadzi a o fa mofologyi na sentase mpensampensamu a o fa Mfantse nkurow edzin ho no da no edzi de akwan ahorow pii na nkurow tum nya n'edzin. Okor do kyere mbre aborofu tumii sesa Mfantse kurow no edzin dze kor borofu kasa mu. Iyi tumii sii onam nkitahodzi a aborofu no nye hon dzii no ntsi. Dzin no pii na onam hon akyerew no ntsi wosesa no dze kor borofu kasa mu. Nkurow no bi tum nya hon edzin fi nyia okykyer kurow no ne dzin mu.

Mfatoho:

- a) Badukurom
- b) Ansakurom

Mfatoho ebien a ɔwɔsor yi kitsa nyimpa edzin. Na nhwehwemu kyere de hon a wɔkyekyer ekuraa anaa kurow no hon edzin na wodze to dem nkurow no.

Nkurow no bi so nya hon dzin fi Ɔboadze ne ndzɛmba ho. Nkurow no bi wo ho a ɔda esutsen bi ho ntsi wotum dze dem esutsen no ne dzin ma kurow no. Dem ara so na nkurow no bi wo ho a ɔnam ndua, mbotan na Nyame n'abɔdze do tum nya hon edzin.

Mfatoho:

- a) Awodua
- b) Odumase
- c) Ekutuase
- d) Praso

Mireku-Gyimah na Mensah (2014) hon dwuma wodzii fa nkurow edzin wo ho wo Ghana no, wonam hon nhwehwemu a ɔkɔɔr do wo Tarkwa mansin mu no kyere mbrɛ nkurow no bi sii nya hon edzin, Awodua (child-bearing tree) ye kurow bi ɔwo Tarkwa ne apaa mu ho na dem kurow yi nya ne dzin fi dua bi a nna wodze no ho ye edur ma binom ma ɔboa hon ma wowo. Enyimdzefo yi so kyere mbrɛ aborɔfo tumi sesa edzin no akyerew ma ne ntseasee so asesa. Dzin no ne nsesa no so tum gyina mɔfɔlogyi nhyehyee do tum ba.

Mfaso pii na ɔwo dzin ho, osiande dzin dzi dwuma bebiree wo nyimpa n'abrabo mu. Dem mfaso yi bi nye: ɔma yehu hen abakɔsem, ɔma yehu hen kusum amandze na amambra, ɔsanzo dzi dwuma de ahyensewdze, osiande ɔboa ma yehu nsonsonoe a ɔda ankorankor mu. Bio, dzin boa ma yehu ɔsom a obiara wo mu, de ɔye kristonyi anaa nkramonyi.

2.15.1.3 Mbowa edzin

Mbowa edzin ho hia mapa, osiandɛ ɔboa ma yetum hyɛ hɔn nsew. Mbowa yɛ ɔɔadze n'abɔdze no bi ntsi ohia dɛ wonya dzin tse dɛ nyimpa ara pɛr. Onam dɛ wɔpɛ dɛ wohu nsonsonɛe a ɔda mbowa ahorow mu ntsi na wɔto hɔn dzin. Nhwɛhwɛmufo binom ayɛ nhwɛhwɛmu afa mbowa edzin ho. Hɔn nhwɛhwɛmu no da edzi dɛ mbowa edzin no bi wɔ hɔ a ɔda ewuranom no hɔn gyedzi na nsusui bi edzi.

Mfatoho bi nye:

- a) Obimmpɛ
- b) Nyame Yie
- c) Adasa
- d) Kae Dabi
- e) Tan me wu



Iyinom nyinara yɛ edzin a wɔdze ma mbowa dze kyere nsusui anaa tsebea anaa gyedzi a obi wɔ no Nyame mu.

2.15.2 Asemfua

Asemfua yɛ nkasafuakuw bi a onnyi nyɛɛ na nkasaho aber kor noara mu na ne ntseasee so nndzi mu. Iyi kyere dɛ, Asemfua yɛ kasa bi a ɔnntɔ aso mu. Asemfua botum atɔ aso mu a, gyedɛ ɔhyɛ asentɔw mu, Odoom (2013). Ɔma mfatoho bi tse dɛ dza odzidzi do yi:

Mfatoho: Maame no tweɔnɛe yɛɛ n'adze no wiei.

Borɔsuow dua no ebu.

Mfatoho yi da no edzi pefee de nkasafua a wɔasan ase no no nndzi mu nnwie. Iyi kyere de asemfua nntɔ aso mu ne dem no ntsi onntum nnda adwenmu edzi. Yehwe nsentɔw ebien no nyinara a yehu de gyede obata asentɔw foror bi ho ansaana etum edzi mu.

2.15.3 Asempruw

Asempruw ye nkasafua kuw bi a ɔwɔ nyee okitsa ɔyefo na nkasaho na mbom odu ber bi a ntseasee nndzi mu gyede ɔwɔ asentɔw mu (Odoom, 2013, Boham, 1998). Hɔn nkyere mu yi kyere de nnye mber nyina na asempruw tum dzi mu anaa ɔdze adwenmu to edzi. Tetteh (2014) so ka de asem a nyee mber wɔ mu biara no ye asempruw. Asempruw gu mu ahorow ebien. Iyinom nye asempruw-tsir na asempruw mfemfamho.

2.15.3.1 Asempruw-tsir

Asempruw-tsir ye asempruw a ne ntseasee dzi mu anaa ɔto asomu. Otum gyina no ho do. Ne dem no ntsi ɔda adwen mu edzi. Asentsitsir a ɔwɔ asentɔw biara mu no ye asempruw-tsir. ɔto fa bi so a asempruw tsir tum dzi dwuma de asembisa anaa nhye.

Mfatoho:

Afe kor ekyir na basia no kor no kun fie.

Dapɛn kor ekyir no, ɔkɔtɔɔ kɔmpiwta.

- a) Soer!
- b) Fa bra!
- c) Rokɔ hen?
- d) Aba?

Nkasafua a wɔasan ase no nyinara ye asempruw. Yehu de nsentɔw ebien no nyinara, ma wɔasan ase no dzi mu na ɔto asomu. Na ne ntseasee so da edzi. Iyi ma yehu de asempruw-tsir no su no tse de asentɔw tsiaba. Dem mfatoho yi ye dza Tetteh mae.

2.15.3.2 Asempruw mfemfamho

Asempruw mfemfamho ye asempruw a ne ntseasee nndzi mu anaa onntɔ aso mu. Odoom (2013). Se asempruw mfemfamho botum edzi mu a gyede ɔbata asempruw-tsir ho. Onntum nngyina no ho do nnye asentɔw. Mber pii no asempruw mfemfamho dze nkabɔmudze dzi dwuma.

Mfatoho:

- a) Ber a ne maame bae no n'enyi gyee.
- b) Nde muhun de papa Abam reserew.

Mfatoho ebien yi kyere mbre asempruw mfemfamho tse. Ne ntseasee nndzi mu nnwie. Se obotum ada adwen bi edzi a gyede ɔbata asempruw tsir ho. Dem mfatoho yi ye dza Odoom kyerewee.

2.15.4 Asentɔw

Agyekum (2010) da no edzi de, asentɔw ye nkasafua a wɔaka abɔ mu ma ɔda adwen mu edzi. Iyi kyere de, asentɔw ye nkasafuakuw a ɔto aso mu anaa ntseasee so wo mu. Asentɔw biara wo ɔyefo na nkasaho. Asentɔw mu nkasaho no so wo afa ebien, na iyinom nye nyee na ɔyetsia. Me ntseasee ma muhu de Asentɔw tum ye asenka, asembisa,

ntseamu anaa nhye. Demara so na asentow gu mu ahorow ebiasa: asentow tsiaba, asentow tsentsen anaa mboho, na asentow kuntann.

2.15.4.1 Asentow nkyekyemu

Asentow biara wo afaafa ebien na iynom nye oyefo na nkasaho. Oyefo no kyere obi a oridzi dwuma wo asentow no mu. Nkasaho no wo nyee na oyetsia. Dem fa yi ka nsem fa oyefo no ho.

Mfatoho:

| | Oyefo | Nkasaho |
|-------------------|--------------|------------------|
| Obiara nyim apra. | Obiara | <u>nyim</u> apra |
| Pon si ho. | Pon | <u>si</u> ho |
| Esi ton ekutu. | Esi | <u>ton</u> ekutu |

Se yehwe mfatoho a owo sor yi a, yehu de nkasaho no wo nyee asem, ono na woetwitwa ase no. Ono na okyere dwuma a oyefo no ridzi. Oyefo no anaa dza yereka no ho asem no nye; **Obiara, Pon** na **Esi**. Dem nkasafua yi boa ma nsentow no dzi mu wo aber a ntseasee ada edzi.

2.15.4.2 Asentow no dwumadzi

Asentow tum dzi dwuma ebiasa. Iynom nye; asenka, asembisa na nhye. Boham (1998) ne nkyeremu a odze maa asenka anaa anomusem ase nye de oye asem bi a yedze da adwen edzi, yedze ka dza yehu, yetse anaa yedze bo asem dawur. Bio, okyere de nhye ye kwan a yefa do kasa kyere obi ma odzi dwuma bi. Nsentow so a yeka a ohia nyiano

no so ye asembisa. Dem nkyeremu yi a onyimdzifo yi maa yi ye nokwar turodoo, osiande se asentow ammfafa asenka bi annto gua a, otum hye obi ma odzi dwuma bi. Bio, otum gye mbuae fi obi ho.

2.15.4.2.1 Nhye

Boham (1998) kyere dem asentow yi mu de, oye kwan a yefa do kasa kyere obi ma odzi dwuma bi. Asentow a otse dem no nnyi obi potsee a odzi dwuma no naaso yetum dze obi to adwen do de ono na oridzi anaa obedzi dwuma no. Andoh-Kumi (1995) kyere mu de yetum dze nhye dzi dwuma de yedze resre obi ma woye biribi ama hen anaa de yerehye obi ma woye biribi. Dem asentow yi dze ntseamu ahyensewdze na odze di dwuma (!).

Mfatho:

- a) Soer!
- b) Ko fie!
- c) Ekuwa, gya su!



2.15.4.2.2 Asembisa

Asentow no bi wo ho a oye asembisa anaa wodze bisa asem. Tetteh (2014) kyere de, yewo kwan ebien a yedua do bisa nsem. Odzi kan, nyia oribisa asem no hwehwe nyiano NYEW na OHO. Dza otu do no so nye dza nyia oribisa asem no nnyim nyiano no ho hwee; nyiano no to de oye asem fofor ma osembisafo no. Aber biara ahyensewdze (?) na oba asentow no n'ewie ma akyerede oye asembisa.

Mfatoho:

- a) Na erokɔ hen?
- b) Woana na orusu no?
- c) Henfa na menya nsu atɔ?

Dem mfatoho yi, ɔsembisafo no nnyim nyiano ntsi ɔbeyɛ dzen ama no. Ɔba no dem a, nyia ɔsembisafo no ribisa no asem no na obotum eyi ano, osiandɛ ɔno na ɔwɔ mbuae.

2.15.4.2.3 Asentɔw a ɔyɛ asɛnka anaa anomusɛm

Boham (1998) ama yɛatse ase dɛ, anomusɛm yɛ asem bi a yɛdze da adwen bi edzi, yɛdze ka dza yehu, yɛtse, anaa yɛdze bɔ asem dawur. Asɛnka ne ka mu no, mpen pii no hen ndze kɔ famu wɔ ne nkaa mu. Ahyɛnsɛwdze a wɔdze dzi dwuma no nye (.). Mfatoho a Boham (ibid) dze mae no bi nye;

- a) Adzesua ho wɔ mfaso.
- b) Afe yi skuul mbofra no bɔɔ hɔnhɔ mbɔdzen.
- c) Afe bi yɛ esian.

2.15.5 Asentɔw ne nhyehyɛɛ

Asentɔw gu mu ahorow na iyi nye; asentɔw tsiaba, asentɔw mbɔho na asentɔn kuntann.

2.15.5.1 Asentɔw tsiaba

Asentɔw tsiaba ye asentɔw a ɔda adwenmu edzi na okitsa ɔyefo na nkasaho kor. Boham (1998) so kyere de, asentɔw tsiaba ye asentɔw bi a ɔwo nyee kor. Ɔwow do kyere mu de asentɔw tsiaba tum ye anomusem anaa asenka. Demara so na Mattix (2003) ne nkyeremu wo Purpita (2008) ka de asentɔw tsiaba ye asempruw tsir a otum gyina no ho do na aber kor noara so ɔto asoamu so.

Mfatoho;

- a) Nana ko ekura.
- b) Nyame ye kese.
- c) Adzesua ho wo mfaso.



2.15.5.2 Asentɔw tsentsen / mbɔho

Asentɔw tsentsen ye asentɔw a asempruw-tsir ebien na wodze nkabɔmudze aka abɔ mu ma abeye asentɔw kor. Agyekum (2010) kyere de, asentɔw tsentsen da adwen ebien edzi na yedze nkabɔmudze na yedze ka asentɔw afaafa ebien no bo mu. Asentɔw no tum ye asempruw-tsir na asempruw mfemfamho. Nkyerese yi kyere de se asentɔw ye tsentsen a, nna okyere de ɔda adwen ebien edzi.

Mfatoho:

- a) Kofi kyeree, naaso Kwesi tweɔɔn no.
- b) Ɔkor mpoano, na ɔfaa ne egyinambowa no.

Nkasafua a woasan ase no dzi dwuma de nkabomudze wo asentow no mu. Iyi na oka asentow afaafa ebien no bo mu ma oye asentow kor.

2.15.5.3 Asentow kuntann

Asentow kuntann ye asentow a okitsa asempruw tsir na asempruw mfemfamho kor na no mboree. Odoom (2013) nhwehwemu da no edzi de asempruw-tsir tum gyina no ho do na otum ye asentow mua na mbom asempruw mfemfamho nntum ngyina no ho do na mbom gyede odze no ho bata asempruw-tsir ansaana ne ntseasee etum edzi mu.

Mfatoho:

- a) Muhun mbofra a wokitsa atam de woridzi agor.
- b) Aber a Omanpanyin soeree n', okasaa kyere n'asofo no de wonye edwuma dzen.
- c) Yebotum enya asentow tsiaba ebiasa ebiasa wo dem mfatoho yi mu naaso yeaka ne nyinara abo mu kor ma aye asentow kor.

2.16 Nkyerewee ahorow no bi

Nkyerewee ahorow pii na yewo na abeye biribi a onye hen abetsena fir tsetse dze besi nde na ne nyinara wo ntseasee, osiande oda ndzemba pii edzi. Otwe nyimpa adwen si biribi do. Hen daadaa dwumadzi mu no ye to de yedze dem nkyerewee ahorow yi dzi dwuma. Nkyerewee yi bi ye dawurbo nkyerewee, bi ye nkurow edzin na dza wodze kyere son mu. Bi so ye nkyerewee a owo hamba ho. Dem nkyerewee yi no dodowara ye dza oda nyimpakuw bi amambra edzi, gyedzi na tsebea a obi wo mu. Panciera (2012) da no edzi wo ne dwumadzi mu de, kasa na nyimpa dze dzi dwuma wo nkyerewee mu,

osiandɛ ɔnam do dze da ne gyedzi na n'abrabo edzi. Iyi ye nokwar, osiandɛ dza ɔwo nyimpa bi ne adwen mu no na ɔda no edzi wo nkyerewee mu ma afofor hu.

Ndzɛmba ahorow pii na wotum kyerew nkyerewee gu ho. Bi tum ye adan ho, kaar anaa ahɛn ho, fiadze enyim, dawurbo nsɛnkyerɛdze do, hɛmba ho, mpo mbuukuu na nkyɛnsɛ nyinara no wotum kyerew nkyerewee wo ho. Nyimpa binom tum kyerew hɔn edzin mpo gu hɔn honandua ho. Bi so tum ye nsɛnkyerɛdze ahorow na nyimpa drɔw dze gu no honandua ho. Dɛ mbrɛ dzin dze ye ahyɛnsɛwdze a wɔdze ma nyimpa, mbowa, nkurow na ndzɛmba ahorow no, demara so na wotum dze nkyerewee so dze hyɛ ndzɛmba bi nsew.

Khan (2019) ka dɛ nkyerewee ho wo mfaso pii ma nyimpa, osiandɛ ɔboa ma wotum nya nsɛm bi fa abakɔsɛm ho, som ho na ankorankor hɔn gyedzi ho. Ɔko do ka dɛ, nkyerewee gu ahorow pii na no dodowara gyina adze a wɔakyerew no wo do, mfe na bea wɔdze nkyerewee no ridzi dwuma. Iyi ye nokwar kyere dɛ, ɔnam dɛ kasa na wɔdze dzi dwuma no ntsi, ohia dɛ wɔhwɛ bea no na kasa a wɔka anaa wɔtse ase na wɔdze dzi dwuma. Bio, nsɛm so a wɔakyerew no so hia ara yie. Nkyerewee nsɛm no wo dɛ ɔye nsɛm bi a otum twe obi n'adwen si biribi do. Dwuma a wɔdze nkyerewee no ridzi so hia, osiandɛ nkyerewee pii na ɔwo hɔ ntsi ɔwo dɛ nyia ɔdze ridzi dwuma no hu dɛ sɛ ɔyɛdawurbo ahyɛnsɛwdze anaa dan ho ahyɛnsɛwdze a ansaana wɔakyerew. Ɔnam dɛ odzi dwuma dɛ ahyɛnsɛwdze ntsi otum boa ma obi hu bea a ɔroko a ɔno ntsi ɔnnkɛyew.

2.16.1 Fiadze ho nkyerewee

Fiadze nkyerewee ye nkyerewee ahorow no no mu kor. Fiadze wuranom no to de wofa dem kwan no do da hon suahun a woenya wo abrabo mu no edzi kyere afofor. Bio, wodua dem nkyerewee yi do da hon gyedzi edzi. Ewuranom no to de woda hon gyedzi wo Nyame mu nye ho som edzi de woye ekristofo anaa Nkramofo. Kasa ahorow a wodze kyere dem nsem no tum ye honara hon kasaa anaa de amanfofor bi do dze. Kasa no bi tum ye Akan kasa bi tse de Mfantse, Asante Twi, Akuapem Twi. Kasa no bi so tum ye Ga, Hausa. Ewe nna mpo borofa kasa.

Ofori & Quayson (2016) kyere de nkyerewee ahorow a efiadze wuranom to de wokyerew gu hon efiadze enyim no tum ye nsem bi a wotum dze twe atofa. Iyi kyere de, nsem a wokyerew no, akenkamfo no kenkan a ne ntseasee a obeda edzi no tum twe hon adwen gyina biribi do ma wonya pe de wonye onyia no bedzi gua. Iyi ma oda edzi pefee de nkyerewee ye kwan kor a wodze dzi nkitaho. Demara so na Coupland & Adam (1997) hon dwumadzi a Quayson na Ofori kyere no hon dwumadzi no mu no so ka de, nkyerewee biara wo ne siantsir. Wogye dzi de nsem biara a efiadze wuranom bekyerew egu hon efiadze ho no gyina biribi do nkaanka hon abrabo mu suahu. Menye hon ye adwen, osiande obiara nnyi ho a oye n'adze bi na bi. Obi beye biribi a, odwen ho yie ansaana woye. Mfatoho a odzidzi do yi ye nkyerewee a ogu nkorofa efiadze ho.

Mfatoho

- a) 'Nyame Tse Ase'
- b) 'Ohen mu Hen'
- c) 'Clap for Jesus'
- d) 'God's Time Is The Best'

2.16.2 Hɛn ho nkyerɛwee

Hɛn yɛ edwindzi a ɔboa hɛn ma yetum fi beebi kɔ beebi anaa yetu kwan. Hɛn pii nara na nkyerɛwee gu ho a odzi dwuma dɛ ahyɛnsewdze. Hɛn ho nkyerɛwee no mu dodowara yɛ nsem bi a ɔfa amambra, nyimpa n’asetena mu na adwenpɔw bi a ɔpɛ dɛ ɔdze da no edzi. Chilwa (2008) ne dwumadzi wɔ ahɛn ho no na Nyamesom bo a ɔsom wɔ ho, Ne dwumadzi no mu, ɔkyerɛ mu dɛ hɛn nkyerɛwee tum da gyedzi a obi wɔ no Nyame mu edzi. Ɔkɔɔr do kyereɛ dɛ nkyerɛwee a ɔfa som gyedzi ho no da enyidoadzehu, ankorankor anaa nyimpakuw bi wɔ Nyame mu. Iyi ntsi nkyerɛwee tum boa ma wuhu dɛ sɛ obi yɛ Kristonyi anaa Kramonyi.


Asangba nye Agoswin (2015) ka dɛ, hɛn nkyerɛwee abɛyɛ biribi a ahɛn wuranom na ahɛnkafo nntum nngya no ekyir. Ɔreyɛ ayɛ dɛ tum krataa a wodze ka hɛn anaa noma pretse ɔwɔ hɛn ho na mbom nsonsonɛɛ a ɔda iyi mu nye dɛ nkyerɛwee no nnyɛ mbra a ofi aban mu. Adwenkyerɛ a Asangba nye Agoswin (ibid) rekyerɛ no yɛ nokwar, osiandɛ ahɛn biara nkaaka trotro na taxi wɔ ahyɛnsewdze a ɔma ɔda nsew. Mber pii no ɔtaa yɛ nkyerɛwee. Taluah & Musah (ibid) kyereɛ mu bio dɛ, ɔɔfabi a, nkyerɛwee no tum nya mfonyin bi so dze ka ho dze kyereɛ ma onyia no pɛ dɛ ɔka. Ne siantsir nye dɛ ansaana obi bɛyɛ biribi no nna ogyina siantsir bi do. Mfonyin no boa ma hɔn a hɔn ntseasee wɔ nkyerɛwee no ho yɛ no tum dua mfonyin no do nya ntseasee yie. Iyi ma ɔda edzi dɛ obiara nnyi hɔ a ɔyɛ n’adze biara biara, ntsi ahɛn ewuranom na ahɛnkafo dwen ho yie ansaana wodze nsem no edzi dwuma. Enyimdzifo yi hɔn dwumadzi yi ammfa kasa mbra nhyehyɛ kwan do, mbom ɔhwɛ biribi fa kwan a ahɛnkafo na ahɛn ewuranom fa do dze nya nsem kyereɛ gu hɔn ahɛn ho. Hɛn ho kyereɛwee ho mfatoho no bi nye:

- a) ‘Kɛsɛ Wɔ Kan’

- b) 'Oyer Pa'
- c) 'Suro Nyame'
- d) 'Nyame Ne Mber Nye Mber Pa'

2.16.3 Kwan ho nkyerewee

Nkyerewee ho dwumadzi nnye ahen, efiadze na hamba ho nko na mbom kwan ho nkyerewee so ka ho. Nkyerewee pii wo hen akwantsempɔn do. Kwan ho nkyerewee ye ahyensewɔde bi a oboa ma obi hu bea a orokɔ anaa beebi a biribi wo. Oye akwankyerɔde. Mber pii na ahɛnkafo na akwantufo hu nkyerewee ahorow wo ndua, dawurbo asenkyerɔde do wo kwan ho. Akwantsempɔn do nsenkyerɔde nkyerewee dodoara na okyerɛkyere nkurow edzin. Iyi boa ma ahɛnkafo hu bea oedu.




Nkyerewee no bi so ye dawurbo nkyerewee. Taylor na Franke (2003) hon nhwehwemu wo dawurbo nkyerewee ho no kyere de, se wɔhwɛ kwan ho nkyerewee ahorow no a, dawurbo na odzi akotsen wo mu, osiande oye kwan a oboa ma wotum nye afofor dzi nkitaho kyen akasanoma na telebihyen do. Oboa so ma adzetomfo nya atɔfo na oboa ma wonya sika so. Siantsir nye de, se adzetomfo pe de wobɔ dawur fa hon ndzɛmba ho wo kasa fir do a, aber biara ohia de wotua sika ansaana na mbom se woye dawurbo nkyerewee no bi si ho a, okyer ansaana asɛɛ. Kwan ho nkyerewee yi ara bi so nye dza wɔɔde kyerekyere brɔn anaa sɔn mu. Dem nkyerewee boa ma obiara hu bea orokɔ. Iyi ye akwankyerɛ dze ma nyimpa.

2.16.4 Hamba Ho Nkyerewee

Hamba ye hen a oda nsu do. Nyimpa binom tum dze tu kwan naaso ne dwuma tsitsir nye de wodze yi nam. Se yeka nkyerewee ahorow a yewo a, yerunntum nnyi hamba mmfi mu. Hamba dodowara a owo hen mpoano nyina wo nkyerewee wo ho. Enyimdzefo pii na woye nhwehwemu afa hamba ho.

Agbenu (2011) ne nhwehwemu a oye faa hamba ho no tsitsir gyina 'Ga' na 'Adangbefo hon hamba ho nsiesie. Oma oda edzi de nyimpakuw ebien yi hon hamba ho nsiesie no to de oda hon amambra edzi. Agbenu (ibid) kyere de hamba ho nsiesie ye nsaano dwuma a noho hia ma ankorankor, ntsi se otumii yee biribi a wosua no wo nsowdo skuul a nkye oboboa nyimpa pii. Demara so na Colonel (1979) so yee nhwehwemu faa nsenkyeredze ahorow a wokyere gu hamba ho. Ofa ne nhwehwemu no do da no edzi de nsenkyeredze ahorow a wodze gu hamba ho no no dodowara ye abebun abrabo mu suahu.



Oslan (2013) yee nhwehwemu faa mbre wosi sen hamba ho. Nhwehwemu no kyere ndzamba a osemfo dze sen hamba na kwan a ofa do dze sen hamba. Okyere akwan a wofa do sen hamba, fi ne ahyese dze kepem ber a obedzi mu ma woetum dze aye edwuma.

2.17 Nhyehyee yi mu adwenmusem

Nhwehwemu dwumadzi biara wo ticri a wodze ye mpensampensamu. Nhwehwemu dwumadzi biara dzi mu yie a gyede onam adwenmusem bi do. Iyi boa ma nhwehwemufotum dze n'asem no to gua yie ma afofor hu dza oreka.

Adwenmusɛm anaa tiɔri a medze reyɛ dɛm nhwehwɛmu dwumadzi yi ne mpɛnsampɛnsamu no nye Kasa Mfɛɛfɛemu Mpɛnsampɛnsamu a borɔfo kasa mu yɛka no “Critical Discourse Analysis” no. Akan atam edzin ahorow no nam kasa do nye afofor dzi nkitaho. Ɔkasa kyere afofor wɔ akwan pii do. Otum ma obi hu tsebea a obi wɔ mu, osiandɛ atam edzin kasa. Ɔnam iyi do ntsi na nhwehwɛmufo no dze Kasa Mfɛɛfɛemu Mpɛnsampɛnsamu Tiɔri yi anaa adwenmusɛm no repɛnsapɛnsa no dwumadzi yi mu ama dwumadzi no etum ada edzi pefee na ewie yie.

2.17.1 Kasa Mfɛɛfɛemu Mpɛnsampɛnsamu (Critical Discourse Analysis / CDA)

Adwenmusɛm tsitsir a medze reyɛ me mpɛnsampɛnsamu nye Critical Discourse Analysis a enyimdzefo binom akyerɛ mu kɔ Akan mu dɛ Kasa Mfɛɛfɛemu Mpɛnsampɛnsamu. Dɛm tiɔri anaa adwenmusɛm yi yɛ dza onyimdzefo Fairclough dze bɔbɔ adze wɔ afe (1990) mu. Enyimdzefo dodowara na wɔdze dɛm adwenmusɛm yi edzi hɔn dwuma.

Applied Linguistics Encyclopedea kyere Kasa Mfɛɛfɛemu Mpɛnsampɛnsamu ase dɛ ɔyɛ kwan a kasa a nyimpa dze dzi nkitaho no tum nya ntseasee, siantsir na koryɛ. Tiɔri yi tɔ dɛ ɔhwe kasa a ankorankor ka no ne nhyehyɛɛ wɔ nkɔmbɔtwetwe mu, nsembisa na nsenkaa mu. Enyimdzefo dodowara na wɔdze dɛm tiɔri yi edzi dwuma ahorow. Dɛm enyimdzefo yi bi nye Van Dijk. Van Dijk (1995) no dwumadzi no mu no kyere dɛ Kasa Mfɛɛfɛemu Mpɛnsampɛnsamu (CDA) yɛ tiɔri bi a wotum dze yɛ nhwehwɛmu fa asetsena mu nsem a ɔfa ndzɛmba pii ho. Ɔkɔ do kyere mu dɛ, ndzɛmba a ɔnnda edzi pefee anaa ehuntsa anaa ɔyɛ nsumaa mu nyinara tum da edzi wɔ aber a wɔdze Kasa Mfɛɛfɛemu Mpɛnsampɛnsamu ayɛ nhwehwɛmu no. Dɛm tiɔri yi no dwumadzi tsitsir

gyina kasa na no dwumadzi do. Se wɔdze tiori bi tse dem ridzi dwuma a, ɔto de wɔhwe ndzɛmba bi tse de nyimpa a atam edzin yi bekasa akyerɛ hon anaa nyimpa a wɔnye hon ridzi dwuma no, hon dzibew na dwumadzi no ankasa ama etum de nkitahodzi a epe de enye afofor dzi bowie yie anaa ntseasee beba wo aber a erenkasa na mbom tam no ne dzin bedzi dem dwumadzi no ama wo.

Fairclough (1995) so kyere de, nyimpa ne kasa no nkotsee runntum mboa ma yennhu hen abakɔsem, amambra na nyehyɛɛ a ɔwo kasa bi ho. Ne dwumadzi no mu no, ɔdze ngyinado ebiasa bi dzi dwuma.

- Kasa no ne nyehyɛɛ (de ɔye kasa anaa dza yehwe)

- Kwan a wɔfa do dze dwumadzi ye nhwehwemu no (de wɔakyerew, wɔaka. yɛahwe anaa yetsie) na ne nyehyɛɛ
- Asetsena na amambra ho mbra (Wiafe- Akenten, 2017).

Fairclough ne nyehyɛɛ yi ho hia yie, osiande otum boa ma onyia no a ɔdze reyɛ mpensampensamu no tum kyere kyere no dwumadzi no mu yie na otum hu kwan so a ɔbefa do dze akyerɛ asem no mu ma ntseasee ada edzi. Oma ɔda edzi de se wɔdze Kasa Mfeefeemu Mpensampensamu mu dzi dwuma a, ɔwo de wuhu nkitahodzi a ɔda kasa, kasa ne dwumadzi na amambra mu. Iyi hia paara osiande ono na ɔkyere nyimpakuw bi hon suahu na hon ndzeyɛ bi.

Se medze dem tiori yi rekyere tam bi a ne dzin dze ‘*Medze mese abɔ adwe ma kwasea bi abɛfa*’ a nna merekyere de obi mberɛ mfa n’adadaw mmbɔ adwe ma obi fofor a ne

nan nnka na ne tsir nnka mmbefa nnwe. Se oba abrabɔ mu so a, n'ase nye de obi abere naaso ber no a ndzinoa no benee no anaa ɔye yie no, nna obi fofor a onnyim ho hwee na ndzinoa no ekedzi no ho anaa aye mfaso ama no.

Nkyerewee ahorow a ɔwowɔ atam mu no kasa ara yie na ɔboa so da ndzɛmba ahorow a ɔrokɔ do wɔ nyimpa n'asetsena mu edzi.

Mfaso pii na Kasa Mfeefeemu Mpensampensamu wɔ. Dem mfaso yi bi nye:

- Otum boa ma yehu lengwesteks nhyehyɛ a kasasu bi kitsa
- Oboa ma yehu adwenmu botae bi a obi wɔ.

Dwumadzi ahorow a enyimdzefo binom dze edzi dwuma no ama ada edzi pefee de Kasa Mfeefeemu Mpensampensamu tum ma ɔnam kasa do ma nsem anaa dwumadzi ahorow a ɔrokɔ do wɔ nyimpa asetsena mu tum da edzi. ɔnam iyi do na medze dem tiɔri yi anaa adwenmusem yi reye me mpensampensamu yi ama ɔnam atam edzin do nyimpa binom ehu dza ɔrokɔ do wɔ afofor hon asetsena mu anaa hon abrabɔ mu.

2.18 Tɔwbɔ

Kasa ye kwan kor a yetum nye afofor dzi nkitaho na ɔnam atam edzin do yetum kasa kyere binom ma wɔtse nsem bi ase. Na aber kor noara so wɔdze edzi hon nhwehwemu dwumadzi.

Dem ɔfa yi da adwenmusem a ɔfoa nhwehwemu no do no edzi. Bio, Ɔfa yi ka biribi fa dza enyimdzefo binom aka afa nhwehwemu dwumadzi yi ho a ɔnye me dwumadzi yi dzi nse. Ɔfa yi san so kyere kasa mbra na sohyiolengwesteks mu. Dem ɔfa yi ara so akyerɛ biribi afa mfaso a Kasa Mfeefeemu Mpɛnsampɛnsamu wɔ wɔ kasa ho.




ƆFA ƆTO DO EBIASA

NHWEHWEMU AKWAN

3.0 Nyienyim

Kwan a yefa do ye biribi no hia yie, se yeammfa kwan tsenee do enndzi dwuma, orunnwie peye ma dza osi enyiwa do wo ho no mmba mu. Dem ara so na nhwehwemu dwumadzi so tse. Dem fa yi hwe kwan a nhwehwemufu no faa do dzii dwuma no. Kwan no a ɔfa do no nye; nhwehwemu no no su, bea a nhwehwemu no kor do, nyimpa dodow a nhwehwemufu no nye hon dzii dwuma, kwan a nhwehwemufu no faa do yii nkorɔfo a onnye hon yee nhwehwemu no. Dem ɔfa yi ara so mu na nhwehwemufu no kyerekyere mbre kwan a ɔfaa do nyaa nsem dze yee ne nhwehwemu no, ohaw a mefaa mu, kwan a mefaa do soow no ano, ahwee nna dwumadzi no towbo.




3.1 Nhwehwemu no su

Kwan a mefaa do yee mu nhwehwemu yi nye ano-na-ano nkitahodzi (qualitative research). Wheeler (1985) ka de 'Qualitative' nhwehwemu ye kwan a wofa do gye adwenkyere fa biribi ho. Demara so na Owu-Ewie (2017) kyere de Creswell (1998) ka de ano-na-ano nkitahodzi biara no dua akwan potsee bi do nye nyimpa dzi nkitaho fa ndzamba a okyer adwen ho, na oda mfonyin potsee bi edzi, afei so ohwehwe nsem bi mu kofee ma ntseasee da edzi, na oda nkitahodzi a okoor do nhwehwemufu no nye n'aboafu ntamu yie a ntor biara nnyi mu.

Creswell (2008) kyere de, nhwehwemu su a nhwehwemufo no mmfa nkanee nndzi dwuma no mber pii no owo de oko bea a hon a onye ridzi dwuma no wo ama woonya nsem ahorow a obotum aboa ne dwumadzi no.

Onam ohwe, nsembisa anaa ano na ano nkitahodzi a ogyina nhwehwemu no no botae, ntseasee na ne nkyeremu do. Medze nkombotwetwe na ahwee. Dem akwan yi na odze me kopuee nkurow bi tse de Mankessim na Assin Foso. Medze mbuukuu akenkan, nserahwe, ahwee na nkombotwetwe dzii dem dwuma yi. Menam dem akwan yi do kor mbeambea bi tse de atamtomfo ho nye mpanyimfo a wo to de wofura tam. Bio, me nye nde mber yi mu mba binom so twetwe nkombotwetwe. Me gyina dem ahwee na nkombotwetwe yi do bisabisa nyimpa binom nsem faa atam edzin ahorow, bea a wodze ko, ber a wodze fura no na hon nsenkyeredze ne nkyerese.



3.2 Beebi a nhwehwemu no kor do

Nhwehwemu biara hia de nhwehwemufo no anaa nyia oreye nhwehwemu no dze nkurow bi si n'enyi do a obeye no nhwehwemu no wo ho. Nhwehwemufo faa nkurow ebien bi a owo Finimfin Mantow mu na odze dzii no dwuma no. Nkurow ebien yi nye: Mankessim na Assin Foso. Dem nkurow yi wo mansin ebiasa a owo Finimfin Mantow mu. Mankessim wo Mfantseman mansin mu nna Assin Foso so wo Assin Central mansin mu. Nhwehwemufo no paw dem nkurow yi, osiande atamtom efiadze akese wo ho. Ne dem ntsi nna onyim de mboa biara a obehia efi nyimpa onye hon reye nhwehwemu no obenya.

3.3 Nyimpa dodow a menye hon yee nhwehwemu no

Osiande mepɛ dɛ meye nhwehwemu a otse apɔw na osi pi si ta no ntsi, mohwehwemu hun hon a wɔwɔ nyimdzee wɔ Akanfo atam ho. Dem nkorɔfo yi na wɔboa me wɔ nsem a mehia aye nhwehwemu yi ho. Atamtɔmfo na mpanyimfo a hon nyimdzee mu dɔ wɔ Akan atam ho na menye hon dzii dwuma yi. Menye ndɛ mber yi mu mba no so bi dzi nkitaho wɔ Akanfo atam ho. Dem nkorɔfo yi na wɔboa me wɔ nsem a mehia aye me nhwehwemu yi ho. Nyimpa dodow a menye hon dzii dwuma no, odzi kan no, menye atamtɔmfo beenu na medze me nhwehwemu no kopuee hon efiadze wɔ Mankessim. Dem nkorɔfo yi ye atamtɔmfo hon hembaa na n'abedzi ekyir. Dem nkorɔfo yi ye atamtɔmfo akese a wɔwɔ nyimdzee wɔ atam ahorow ho, osiande woye nkorɔfo bi a wɔatɔn atam akyer yie, Wɔawedar wɔ atam edzin na nkyerɛasee ho yie nna ma nsɛnkyerɛdze ahorow no so gyina ho ma.

Onam nhwehwemu yi ntsi menye nkorɔfo binom a so a wɔntɔn tam anaa wɔnnpam adze so dzii nkitaho, osiande dem nkorɔfo no so wɔ nyimdzee fa atam ho. Mpanyimfo baanan bi so wɔ Assin Foso so boaa me pii faa atam ahorow no ho. Dem mpanyimfo adwenmu adɔ yie wɔ atam ho, osiande ɔye adze a wɔtɔ dɛ wɔdze siesie honho aber biara. Mpanyimfo yi ye mbaa ebien na mbanyin so ebien. Nkorɔfo a wɔdzi ewiei a menye hon dzii dwuma no nye ndɛ mber yi mu mba baanan a ɔye mbaa ebien na mbanyin so ebien. Me gye hon so hon adwenkyerɛ faa Akan atam edzin ho. Nhwehwemufɔ no nye dem nyimpakuw yi dzii nkitaho, gyee akwansere anasaana mirinya me nsem no nyinara. Iyi kyere dɛ menye nyimpa du (10) na menye hon ye dwumadzi yi a no mu esia (6) ye mbaa na no mu anan so ye mbanyin.

Pon 1: Pon a ɔkyere nyimpa dodow a menye hon yee nhwehwemu no

| NYIMPABAN | MBANYIN | MBASIAFO | NYIMPA DODOW |
|--|----------------|-----------------|---------------------|
| Atamtɔmfo hembraa na ne abadziekyir | - | 2 | 2 |
| Mpanyimfo | 2 | 2 | 4 |
| Nde mber yi mu mba | 2 | 2 | 4s |
| Dodow | 4 | 6 | 10 |

Pon a ɔkyere nyimpa dodow a menye hon yee me nhwehwemu dwumadzi nye yi.

3.4 Kwan a mefaa do yii nkorɔfo a menye hon yee nhwehwemu no

Kwan a mefaa do yii hon a menye hon dzii dwuma wo nhwehwemu yi mu no ye nyiyimu a ogyina botae do (purposive sampling). Owu-Ewie (2012) kyere de, nyiyimu a ogyina botae do de ɔye kwan a wofa do yi nyimpa a wɔgyedzi de wɔwɔ nyimdzee a obotum aboa nhwehwemufɔ no wo ne dwumadzi no mu. Ne dem no ntsi nhwehwemufɔ no tutu kwan nye enyimdzefo kakra kedzi nkitaho. Me nye atamtɔmfo mpanyimfo na hon a wɔtɔn tam dzii nkitaho osiande hon daadaa asetsena nyinara fa atam ho na ne dem ntsi wɔwɔ nyimdzee mapa wo atam ho. Bio, nhwehwemufɔ no nye mbaapanyin na mbanyin binom a hon enyi efir na wɔdze tam dwuma wo daadaa abrabɔ mu no so dzii nkitaho. Dem mpanyimfo yi to de wofura tam mber pii. Nhwehwemufɔ enntum ennyi nde mber yi mu mba emmfi no dwumadzi no mu, osiande wɔye nkorɔfo a hon so wɔdze atam dzi dwuma.

3.5 Akwan ahorow a mefaa do nyaa nsem yee nhwehwemu no

Nhwehwemufo no faa akwan ahorow bi do na odze nyaa nsem dze dzii no dwuma no. Nhwehwemufo no hwehwe nyimpa a wowo nyimdzee wo atam ho na onye hon twetwee nkombɔ. Nhwehwemufo no kor atamtomfo efiadze na okohwee mbre wosi dzi dwuma wo ho. Otɔ do bio, nhwehwemufo no dze dwuma ahorow a enyimdzefo binom aye afa atam ho so dzii dwuma wo ne nhwehwemu no mu. Bio, nhwehwemufo no sere kwan fii atamtomfo no ho na otwitwa atam no bi mfonyin dze boa no dwumadzi no. Osanee so sere kwan fii atamtomfo nye nde mber yi mu mba no ho na otwee hon nkombotwetwe no guu ahomado. Nhwehwemufo no emmbu n'enyi enngu akwansere do ntsi bea a okoree biara odze akwansere too famu ansaana odze ne nsembisa no roto gua. Nhwehwemufo annkyerew nsembisa no enngu krataa do dze naaso ogyina nsembisa a wowo no dwumadzi no do na odze gyee nyiano anaa nsem. Onam dem kwan no do nyaa nyiano beberee a oboa no ma odzii no dwuma no. Nhwehwemufo tsiee nsem a wotwe egu efir no do no yie na obo mbozen dze hyehyee no dwumadzi no.

Dza otɔ do bio no, nhwehwemufo no dze dwuma ahorow a enyimdziwo binom aye afa atam ho no dzii dwuma. Ha yi, nhwehwemufo no kenkaan dwumadzi a binom aye afa ne dwumadzi ne fa bi ho wo intanet do dze boaa ne nhwehwemu no.

Akwan ahorow ebiasa na menam do dze nya nsem dze hyehyee mo dwumadzi no. Menya me nsem no bi fii nwoma akenkan mu, menya bi so fi inkombotwetwe mu nna ahwee mu so. Nhwehwemufo no nam dem kwan ebiasa yi do nyaa mboa paara, osiandɛ oma dzaa nna ohia no nyinara beda edzi pefee. Kwan a mefaa do nyaa me nsem no na odzi do yi.

3.3.1 Nwoma akenkan

Nhwehwemu dwumadzi biara nnyi ho a obi nnyee biribi mmfa ho da. Nwoma ahorow no bi so wo ho a mehwɛɛ mu nyaa mboa fi mu. Nyimdzee a minya no bi nye atam ahorow bi hon edzin na ahosu. Atam mu nsenkyerɛdze na hon asekyere na bo a tam som wo hen Akanman mu.

Kwan kor so nye de, nnye mbuukuu nkotsee na mbom abaeɛfor intanet do. Iyi boaa ma menya nkorɔfo binom hon dwumadzi a oɛfa atam ho. Minya nsem no bi kenkanee ma menya nyimdzee kaa nhwehwemu no ho. Nhwehwemufu no kor nwomakorabea wo Simpa Esuapon ne fa a wo Edwumako mu kɛkenkaan dwunadzi ahorow a binom aye afa atam ho.



3.5.2 Nkɔmbɔtwetwe

Nkɔmbɔtwetwe ye akwan ahorow a wodze ye nhwehwemu dwumadzi no mu kor na iyi ye kwan kor a nhwehwemufu no faa do dze dzi dwumadzi dze nya nsem dze dzi dwuma no. Remenyi (2011:1) wo Owurasah (2015) ne dwumadzi mu kyere nkɔmbɔtwetwe mu de ye kwan a nhwehwemufu fa do dze nya nsem fi nyimpa a woakwadar anaa wo wo nyimdzee wo dwumadzi bi ho. Onam de nyansa nnyi obaakofo ne tsir mu ntsi, mammfa antto mo do de mara meye nhwehwemu yi na mbom motwee ben nkorɔfo binom ma wo boaa me. Menye nkorɔfo a wo wo mbeambea a meedzi kan abobo edzin no twetwee nkombɔ faa atam ho. Mema obiara a menye no twetwee nkombɔ no nyaa no ho ntseasee de meregye n'adwen aye mo nhwehwemu a otse dem. Nhwehwemufu no annkyerew nsem biara enngu krataa do a ohwɛɛ do dze bisaa hon nsem. Nhwehwemufu no dze akwansere too famu ansaana orehye no nkɔmbɔtwetwe no ase. Nyimdzee fofor pii na

minyaa fii hɔn a menye hɔn twetwee nkɔmbɔ no hɔ. Menye mpanyimfo na ndɛ mber yi mu mba so twetwee nkɔmbɔ. Ohaw so a mihyia no wɔ mu nye dɛ, ɔgyee mber pii nna binom nnye krado so dɛ wɔnye me bɛkasa.

3.5.3 Ahwɛɛ

Mpanyin se “Etse fakor a na etse w’adze do” ntsi, manntsena fakor anyɛ nhwehwɛmu a ɔtse dɛm. Mɔbɔ mbɔdzen kokɔr mbeambea na mpanyimfo bi enyim ɔnam nhwehwɛmu yi ntsi. Mokɔr atamtɔmfo hɔ. Atamtɔmfo hembaa na ne abadziekyir efiadze na mokɔree. Mesanee so kɔr mpanyimfo a minyim dɛ wɔdze atam edzi dwuma akyɛr so hɔ nye hɔn kedzi nkitaho. Menye ndɛ mber yi mu mba a mekyerɛ mbaabun so dzii nkitaho gye hɔn adwen fa Atam ho. Dɛm ber no ara so na meserɛ hɔn kwan na motwitwa atam no bi mfonyin dze dzii mo dwuma no.

Muhun dɛ nkorɔfo a menye hɔn dzii dwuma no nntse dɛm. Ahwɛɛ ho wɔ mfaso pii, osiandɛ edwen na isi do gyina ansaana nkɔmbɔtwetwe no aba do.


3.6 Kwan a mefaa do dze nhwehwɛmu yi ho nsem too gua

Muduaa akwan ahorow do nyaa nsem no wiei no, migyinaa nhwehwɛmu no no botae no do kyekyɛɛ mu ekuwekuw. Mekiyekeyeɛ mu ekuw ahorow ebiasa a nna ogyina nhwehwɛmu yi no botae na nsembisa no do. Meyɛɛ no dɛm wiei no nna mbrɛ ɔbeye a nhwehwɛmu yi ne mpensampensamu nkeyɛ dzen ntsi nna mefa kuw biara a nna makyerɛw no wɔ no kuw no ase.

Meyɛɛ dɛm nkyekyɛmu yi wiei no, migyinaa adwenmusem a ɔtaa dwumadzi yi ne mpensampensamu ekyir no do yɛɛ ho mpensampensamu a ɔfata. Nhwehwɛmu no ne mpensampensamu no wɔ nkyekyɛmu ahorow anan.

3.7 Ɔhaw a mefaa mu

Dɛ mbɛɛ wiadze yi mu biribiara nnyi hɔ a ne yɛ da famu no, dɛmara so na mammfa mo dwumadzi yi trotroba koraa. Ɔhaw a mihiyiae aber a nna morohwehwɛ me deta no bi nye dɛ, nna nyimpa a nna mususu dɛ wɔbɔboa me ma menya nsɛm no ne nyiano no nna ɔyɛ dzen kakra. Bio, nna dodowara so nntum mma me nyiano a morohwehwɛ ama me nsembisa no, ɔnam dɛ hɔn nyimdzee fa atam ho no suar nna binom so nnyim siantsir pɔtsee a miribisa nsɛm a ɔtse dɛm no. Nna binom hɔn adwen yɛ hɔn dɛ dza mereyɛ no mibenya sika bi efi mu ntsi nna wɔpɛ dɛ mutua biribi ansaana woeyi me nsembisa no ano.



Bio, mbuukuu so a nna ɔwɔ dɛ minya dze yɛ m'edwuma no suar. Mbuukuu so a me nsato do no nna woetsintsim no borɔfo kasa mu. Iyi ntsi nna ohia dɛ me kyerekyere Borɔfo kasa ne nyinara ba Mfantse kasa mu. Ɔhaw yi nyinara mu no, dwumadzi yi kɔr do yie, osiandɛ medze sii m'enyi do dɛ mbɛɛ ɔbɛyɛ biara no, ɔwɔ dɛ mowɔw do ara kɛpɛm ewiei pa.

3.7 Tɔwɔ

Ɔfa yi hwɛɛ kwan a mefaa do yɛɛ dɛm nhwehwɛmu no. Mohwɛ nhwehwɛmu no no su wɔ dɛm ɔfa yi mu. Menam ano-na-ano nkitahodzi a ɔyɛ nsembisa na nyiano a ogyina

nhwehwɛmu no botae ntseasee na ne nkyerɛmu do (qualitative research). Ɔfa ha yi so na mohwɛɛ bea a nhwehwɛmu dwumadzi yi kɔɔr do, nkorɔfo a menye hɔn yɛɛ nhwehwɛmu no, nyimpa dodow a menye hɔn yɛɛ nhwehwɛmu no, kwan a mefaa do nya nyimpa a menye hɔn yɛɛ dɛm dwumadzi na akwan a mefaa do nyaa nsɛm dze yɛɛ nhwehwɛmu no, ndzɛmba a medze dzii dwuma yi na kwan a menam do dze me nhwehwɛmu no nsɛm too gua. Afei so mohwɛɛ ɔhaw a mihiyiae na kwan a mefaa do sɔɔw dɛm ɔhaw no ano. Dza odzi ewiei wo dɛm ɔfa yi mu nye towbo.



ƆFA A ƆTƆ DO ANAN

MBOANOSEM NO MU MPENSAMPENSAMU

4.0 Nyienyim

Ɔfa yi bɔhwe dwumadzi no ankasa, mekyere kasa mbra nhyehyee na sohyiolengwesteks mpensampensamu a ɔda edzi wɔ Akan atam edzin no bi ho mu. Iyi begyina nsembisa ebiasa a nhwehwemufu no dze dzii ne dwuma. Ɔfa yi na obeyiyi nsembisa no ano. Nhwehwemufu no befa asembisa no nkorkor eyiyi ano. Nyimpa binom nam atamfura do da hɔn gyedzi na tsebea bi a wɔwɔ mu no edzi. Tam ahosu na no mu nkyerewe so demara na ɔtse. Ɔkasa kyere afofor. Tam fufuw ne fura kyere enyigye na nkonyimdzi. Dem ara so na tam tuntum anaa koben ne fura tum kyere de onyia no wɔ awereshow mu. Atam edzin ahorow no so ye kwan a ankorankor nam do dze kasa kyere afofor. Atam edzin no bi ye ekutsiabɔ na abebu na bi so ye afotu. Kasa mbra nhyehyee do no, morobɔhwe asentɔw ahorow a atam edzin no wɔ, de ɔye asentɔw tsiaba, asentɔw mbɔho, asentɔw kuntann nna ɔba no sohyiolengwesteks afa mu so a, morohwe nkitahodzi a atam edzin tum nye ankorankor dzi.


4.1 Akan atam edzin ho nhyehyee wɔ kasa mbra kwan do

Yebekae hen adwen a, nhwehwemu ho asembisa a odzi kan no hwe Akan atam no bi edzin ne nhyehyee wɔ kasa mbra kwan do. Asembisa no nye: *Eben kasa mbra nhyehyee na Akan atam no bi edzin wɔ?*

Ɔfa yi da kasa mbra nhyehyee a ɔwɔ Akan atam edzin no bi ho, osiande edzin no dodowara na wodzi kasa mbra ne nhyehyee no do. Dem nhyehyee no bi nye asentɔw

tsiaba, asentɔw mboho, asentɔw kuntann. Bio, nhwehwemufo no bohwɛ asentɔw a odzi dwuma de asenka, asemɓisa na nhyɛ.

Mpensampensamu a ɔwo dem nhwehwemu dwumadzi yi mu no gyina nhwehwemu no ho nsembisa do. Mber pii no, atam edzin dzi kasa mbra nhyehyɛɛ do. Kasa mbra nhyehyɛɛ kwan do no, Akan atam edzin no dodowara ye asentɔw a otum da adwen mu edzi. Ɔfa yi bohwɛ atam edzin a ɔye asentɔw. Asentɔw mu no, ɔbohwɛ dza ɔye asentɔw tsiaba anaa tsentsen/ mboho na asentɔw kuntann. Nhwehwemufo no gyinaa asentɔw dwumadzi kwan do so dze yeɛ ne nhwehwemu. Dwumadzi kwan do no, asentɔw tsiaba tum dzi dwuma de asenka, nhyɛ na nsembisa.



Demara so na nhwehwemufo no hwɛɛ asentɔw a ɔye asempruw tsir na asempruw mfemfamho. Iyi da edzi wo aber a yɛdze asentɔw tsentsen ridzi dwuma. Asempruw-tsir tum dzi dwuma de asentɔw na ɔda adwen mu edzi na okitsa ntseasee so. No dwuma kor so nye de ɔye asentɔw tsiaba. Atam edzin no bi ye asempruw tsir na aber kor noara so yɛfa no de ɔye asentɔw tsiaba. Demara so na asempruw mfemfamho no yenyim de onntum gyina no ho do gyede wodze no bata asempruw tsir ho ansaana etum edzi mu ma ntseasee so aba mu.


4.1.1 Akan atam edzin a ɔkyerɛ asentɔw no dwumadzi

Dwumadzi yi ne nhwehwemu no ma ɔda edzi de Akan atam edzin no dodowara ye asentɔw. Atam edzin no bi da asentɔw no dwumadzi de ɔye asenka, asemɓisa na nhyɛ. Iyi ye dwumadzi ebiasa a asentɔw tum dzi.


4.1.1.1 Atam edzin a ɔye asenka

Asentɔw wɔ dwumadzi etsitsir ebiasa a no mu kor ye asentɔw a odzi dwuma de asenka. Asenka da asem bi edzi na aber biara no osiwiei na odzi asentɔw no ekyir ma ɔkyere de asentɔw no aba ewiei anaa esi. Asentɔw a ɔye asenka no ne ka mu no ndze no bre ase wɔ aber a kasa no aba ewiei (Ando-Kumi, 1995). Nhwewemufɔ no no nsem a onyaa no bi ye asenka na iyi mu no na onya bi faa afotu, ekutsiabɔ na abebu ho. Dza odzidzi do yi ye atam edzin ahorow a ɔye asenka.


Akan atam edzin a ɔye asenka no mu bi nye “Enyi ber a onnsɔ gya”, Medze me se abɔ adwe ma kwasea bi abefa, Aman pe se, ɔtse nwin mu, Papaye asa, Pra wo fie, Owu atwer baako mmfow, Ama asem aba fie na Owu sɛɛ fie”. Dem atam edzin a medze ato gua yi nyinara ye nsentɔw a ɔwɔ asenka su. Biara da adwen bi edzi na asenka no roko ewiei so a ndze a wodze ka no ko famu de mbre Andoh-Kumi (1995) dze to gua no ara pe. Akan atam edzin a ɔye asenka no mu bi na medze egu ndua do dze akyerɛkyere mu yi.




Mfatoho:



2. Enyiwa nnyim awerɛhow






4.1.1.2 Atam edzin a ɔye nhye

Nhwehwemu no ma ɔda edzi de atam edzin no bi ye nhye. Nhye no so gu mu afaafa ebien. Iyi mu no, dza odzi kan no nye obi behye obi ma oedzi dwuma potsee bi na dza ɔto do ebien no so nye de obi asere obi ma oedzi dwuma potsee bi ama no.



Mfatoho:

Pra wo fie

**4.1.1.3 Atam edzin a ɔye asembisa**

Nhwehwemufɔ no ne nhwehwemu no ma ɔda edzi pefee de atam edzin no bi ye asembisa. Ɔda edzi de atam edzin no a ɔye asembisa no nnhia nyiano. Ɔwo mu de asembisa biara hia mbuae anaa ohia nyiano fi obi ho naaso atam edzin no dze onnhia. Iyi ye kwan kor a Akanfo fa do nye afofor dzi nkitaho. Ɔbaa tam edzin ɔye asembisa dze a obiara nntum nnyi ano, siantsir nye de nyia onyim tam no ne dzin anaa onyia no a ofura tam no nnhia anoyi biara mmfi obiara ho. Agyekum (2010) kyere mu de, asentɔw a ɔye asembisa no mber pii no akenkamfo no tum ma mbuae wo ne tsirmu. Iyi kyere de akenkamfo anaa hon a wonyim atam edzin a ɔye asembisa no wo nyiano wo hon ara honho.

1. Kun pa woana benya?
2. Na pa edze hen gyaa woana?



4.1.2 Asentɔw Nhyehyɛ ahorow

Asentɔw ahorow a dwumadzi yi pensapensamu wɔ ha nye asentɔw tsiaba, mboho na asentɔw kuntann.

4.1.2.1 Akan atam edzin a ɔyɛ asentɔw tsiaba

Asentɔw tsiaba yɛ asentɔw a ɔda adwenmu edzi a okitsa ɔyɛfo kor na nkasaho kor. Boham (1998) so kyere de asentɔw tsiaba yɛ asentɔw a ɔwɔ nyɛe kor. Okyere mu bio de, asentɔw tsiaba tum yɛ anomusem. Dem ara so na Mattix (2003) kyere mu wɔ Puspita (2018) no dwumadzi mu de asentɔw tsiaba yɛ asempruw tsir a otum gyina no ho do na aber kor noara so ntseasee wɔ mu. Iyi tum yɛ dza obi aka anaa dzaa obi beka. Atam horow a ɔyɛ asentɔw tsiaba no bi nye dza odzidzi do yi.

a. Sika tu de anoma

Nhwedo a odzi kan yi yɛ asentɔw a okitsa adwenmu kor anaa ɔda adwenmu kor per edzi. Yehwe tam dzin *Sika tu de anoma* a, yehu de ɔwɔ asentɔw tsiaba su. Okitsa dzin, nyɛe, nsidodua na dzin, mekyere dzin + nyɛe + nsidodua + dzin. Iyi ma ɔda edzi de tam dzin *Sika tu de anoma* yɛ asentɔw tsiaba osiande *sika* a ɔwɔ tam no dzin no mu no yɛ dzin, *tu* no yɛ nyɛe na anoma no so yɛ dzin.

b. Ebusua do fun

Tam dzin *Ebusua do fun* so yɛ tam dzin a okitsa asentɔw tsiaba su. Siantsir nye de dzin no yɛ dzin a ɔda adwenmu kor per edzi. Yehwe asentɔw tsiaba no su a ogyina nhyehyɛ do a, yehu de asentɔw tsiaba kitsa dzin, nyɛe na dzin. *Ebusua do fun* mu no *Ebusua* no yɛ dzin, *do* no yɛ nyɛe na *fun* no yɛ dzin.

c. Ahondzepa nnkasa

Ahondze pa nnkasa ye tam dzin a ɔwɔ asentɔw tsiaba nhyehyee su. Ɔye asentɔw a okitsa dzin asem, dzin-tamsi, na nyee a ɔwɔ oho kabea mu. *Ahondze* no ye dzin, *pa* no ye dzin-tamsi a osi dzin asem *Ahondze* no tam na *nnkasa* no so ye nyee. Nyee tsir a ɔwɔ *nnkasa* no mu nye *kasa* nna ɔwɔ oho kabea nsienyim “nn”.

d. Dwen woho.

e. Enyiwa nnyim awerɛhow.

f. Afe bi ye esian.

g. Ɔtse nwin mu.

h. Aman pɛ se.

i. Papayɛ asa.

j. Adasa pɛ mbɔbɔr.



Mfatoho a ɔwɔ sor yi nyina ye asentɔw tsiaba. Iyinom nnye asentɔw a ɔwɔ afaafa ebien na mbom ɔye dza okitsa ɔfa kor pɛr.

4.1.2.2 Atam edzin ahorow bi a ɔye asentɔw mbɔho

Agyekum (2010) kyere dɛ, asentɔw mbɔho anaa tsentsen da adwen ebien edzi na nkabɔmudze na wɔdze ka asentɔw afaafa ebien no bɔ mu. Iyi da no edzi dɛ, asentɔw mbɔho ye asempruw tsir ebien na mbom nkabɔmudze na ɔka afa ebien yi bɔmu ma ɔbeyɛ asentɔw kor. Ɔtɔfabi so a, asentɔw no tum yɔ asempruw tsir na asempruw mfemfamho. Otum da adwen ebien edzi. Atam edzin ahorow no mu bi a ɔye asentɔw mbɔho no bi nye:

- a. Kata wodze do na bue obi dze do.

Tam dzin a odzi kan yi ye dzin a okitsa asentow mboho su. Oda asentow su a Agyekum (2010) dze to gua no edzi. Nhyehyee no nye de owɔ asentow tsiaba ebien a wodze nkabɔmudze aka hon abo mu. Yehwe asentow no a, yehu de *Kata wodze do* no ye asentow a ɔye asentow tsiaba na otum gyina no ho do ma hen ntseasee, *bue obi dze do* so ye asentow a okitsa asentow tsiaba su na yedze *na* aka nsentow tsiaba ebien yi abo mu.

- b. Abofra bo nwa na ɔmmbo akyekyerɛ.

Abofra bo nwa na ɔmmbo akyekyerɛ ye Akan tam dzin a okitsa asentow su. Yehu no pefee de asempruw tsir anaa nsentow tsiaba ebien a wodze nkabɔmudze aka hon abo mu. *Abofra bo nwa* ye asentow tsiaba na *ɔmmbo akyekyerɛ* so ye asempruw tsir anaa asentow tsiaba na yedze nkabɔmudze aka hon abo mu.

Mfatoho nkaa no na medze ato gua wo ase ha yi;

- c. Gyae su na gyina pintsinn wo Nyame mu.
- d. Munnsuro kotoko na mesuro ne nwoma.
- e. Toa noara na ɔpe na ahoma sen no kon.

4.1.2.3 Atam edzin ahorow no bi a ɔye asentow kuntann

Agyekum (2010) kyere asentow kuntann mu de, ɔye asentow a owɔ asempruw tsir kor na asempruw mfemfamho so kor anaa no mboree. Okor do kyere mu de, owɔ mu asentow kuntann kitsa afaafa ebien dze naaso no mu kor per na otum gyina no ho do na ntseasee so wo mu. Atam edzin ahorow a ɔye asentow kuntann no bi na odzidzi do yi:

- a. Ebeka mo ho asem a, fa egua tsena do.

Tam dzin a ɔwɔ sor ho yi ye asentɔw a okitsa asentɔw kuntann su. Asentɔw yi kitsa asempruw tsir kor na asempruw mfemfamho so kor a yedze kasa mpaapaamudze (,) akye mu. Yehu no wɔ asentɔw no mu de *Ebeka mo ho asem a*, ye asempruw mfemfamho a narankasa nntum nngyina noho do mma hen ntseasee. *Fa egua tsena do* no so ye asempruw tsir ntsi otum gyina no ho do ma hen ntseasee.

- b. Awar tse de nkatse a, nkye mobɔɔ ahwe.

Awar tse de nkatse a, nkye mobɔɔ ahwe ye tam dzin a yegyina asentɔw nkyekyemu ahorow a ogyina nhyehyee do a, ɔye asentɔw kuntann. Siantsir nye de asentɔw yi kitsa asempruw mfemfamho kor na asempruw tsir so kor. Yehu no wɔ asentɔw no mu de, *Awar tse de nkatse a* ye asempruw mfemfamho na *nkye mobɔɔ ahwe* so ye asempruw tsir.

Mfatoho nkaa no na medze ato gua wɔ ase ha yi;

- c. Okun pa, woana benya.
- d. Fie mbosea twa wo a, ɔsen seradaa.
- e. Abowa bi beka wo a, ofi wo tam mu.
- f. Nnyi sika a, nntwa brog.
- g. Me tamfo ma nntwitwa wo ho nnkyere me.

4.2. Akan atam edzin ho mpensampensamu wɔ sohyiolengwesteks kwan do

Dem ɔfa yi beyiyi asembisa a ɔtɔ do ebien no ano. Asembisa no nye yi: *Eben kwan na atam no bi edzin fa do kasa kyere ankorankor?*

Akanfo ye nyimpa bi a wotum gyina hon atamfura do to nkra anaa da hon tsirmpow edzi kyere afofor. Akanfo atam a wofura no mu dodowara na se nnye Okannyi ba mapa a, renntse ase. Iyi kyere de wogyina atamfura a odzi akotsen wo hon amambra mu no do kasa a hon a wodze rekasa akyere hon no so tse ase. Akan atam edzin no bi ye abebu, afotu na ekutsiabɔ. Iyinom nyinara ye kwan a Akanfo dua do kasa.

4.2.1 Akan atam edzin a oye abebu

Abebu ye kasa kwan kor a wofa do dze kasa kyere afofor wo ber a oefura asem no tam kakra. Tetteh (2014) kyere be ase de oye asentow tsiaba a yenya fi abrabɔ mu suahu mu a ogyina asem potsee bi mu. Be ye kasa soronko a woahehye no kwan soronko do a gyede nyimpa dwen ho ansaana oeenya ho ntseasee.

Finnegan (2012) so kyere be ase de oye nsem bi a ntseasee wo mu na nnokwarsem so a owɔ mu no da edzi pefee a otum boa nyimpa ma odze dzi dwuma aber biara. Okoor do kyere mu de, be ye nsem a woawen ato ho mfe pii a nyimpa dze dzi dwuma a otum da n'adwen na ne nyimdzee edzi. Iyi kyere de be ye kasa a aber biara no wo nyimpa ne nkitahodzi mu no odze dzi dwuma.

Ntolinga (1999) ka de, abebu ka nokwar nsem bi a okyere obi ne adwenpow anaa adwenmusem. Bio, okyeremu de abebu tum ye atsenka bi a okyere obi ne amambra. Abebu kasa tum kyere mbre obi ne adwenmu ebuei anaa nyansa a obi nyim. Bio, otum kyere mbre obi n'adwen mu do. Demara so na Akan atam edzin no bi tse. Obi tum nam

tam a okitsa dzin a ɔye abɛbu do nye obi dzi nkitaho. Ɔnam tam a ne dzin ye abɛbu do twa n'asɛm tsia kyere afofor.

Bɛ ye kasa fenenkyemm a yɛdze kyere asɛm bi a yɛpɛ dɛ yɛka ho asɛm mu ma asɛm no si pi anaa ne ntseasee dzi mu (Agyekum, 2011). Ɔda no edzi dɛ sɛ Ɔkannyi tum dze bɛ dzi dwuma wɔ ne ber mu ma ne nsɛm a ɔpɛ dɛ ɔka no ntseasee no da edzi pɛpɛpɛr a, wobu nyimpa no dɛ onyim kasa. Akan atam edzin a ɔye abɛbu no mu bi na ɔka do yi.

Mfatoho:



Mfonyin 1: Muoko nyina mmpetu mumber mbom

Tam a okitsa dzin a ɔtse dɛm yi, sɛ yɛdze toto abrabo ho a, ma yɛbɛka ara nye dɛ, nyimpa nyinara runntum nnye pɛr da. Ne dɛm no ntsi, ma etse biara no ɔwo dɛ ehwe ho na ebo wo braa yie. Dɛm nsɛm yi ye dza nhwehwɛmufo no nyaa fii Ɔbaapanyin bi a ɔnye dzii

nkombɔ ho. Ɔbaapaanyin no kɔr do kyere mu de, abrabɔ mu no obi ne yieye wɔ kan na obi so dze wɔ ekyir nna hen hyeber nso nnye kor ntsi ma yemmfa enyiber nhye obra obiara robɔ mu. Biribiara wɔ ne mber. Iyi ntsi na tam no ne dzin ye *Muoko nyina mmpetu mber mbom* no. Muoko kor biara ber wɔ ne mber mu ntsi dem na abrabɔ so tse, obiara ne mber so a, ne nsa bekaa ne kyefa.



Mfonyin 2: Dua kor gye ehum a, obu no mfonyin

Nkombɔtwetwe a ɔkɔr do wɔ nhwehwemunyi nye atamtɔmfɔ hɔn hembra no fa tam a ne dzin dze *Dua kor gye ehum a, obu* no ho nye de, nsenkyeredze a ɔwɔ tam no mu no kyere dua kese kor a nkakramba so sisi ho. Ɔbaapaanyin yi dze toto abrabɔ ho dze kyerekyere mu de, se ebusua mu nyinara dze hɔn enyi to ɔbaakofo do wɔ mboa mu a, mber bi bɔ so a, nyimpa no n'ahodzen no bɔkɔ famu. Ɔkɔr do kaa de, ɔwɔ de obiara bɔ no ho mbɔdzen na ɔye biribi mber ɔbeye a ɔrenndan obi.

Mfatoho nkaa no na medze ato gua wo ase ha yi;

- a) Wo nsa ekyir beye wo daw a onnkeye de wo nsa yamu
- b) Obra rutwa wo a, otse de seradaa
- c) Ahondze pa nnkasa
- d) Enyi ber a, onnsɔ gya
- e) Abowa bi beka wo a, ofir wo tam mu
- f) Abofra bo nwa na ommbɔ akyekyerɛ
- g) Enyiwa nnyim awerɛhow


4.2.2 Akan atam edzin a ɔye ekutsiabɔ

Longman Dictionary (2005) kyere ekutsiabɔ ase de, ɔye kwan a obi fa do ka asem bi a onnye dze kyere afofor wo aber a onnsi asem no ewur nkyere obi anaa ommbɔ obi ne dzin. Nhwehwemu kyere de, ekutsia ye nsem bi a obi tum ka dze twuw afofor. Otum so ye ndzeye bi a obi tum ye dze kyere obi a okyere de ɔreye dze etwuw obi. Kasa a otse dem yi tum dze nsem pii ba. Mpanyin aka de “kasa a otwuw biara wo owura”. Ne saso ntsi se obi fura tam bi otse dem a na ohya obi a onnye no nnye adze a nna onam onon ntsi na woefura tam no.

Mfatoho

- a) Kora tse de nantwi bin no sor ye wesewese na n'ase ye potɔɔ

Yehwe mbre nantwi bin tse a, yehu de n'enyi no ye wesewese naaso se itsia mu a na ibohu de n'ase no ye pekypɛkyɛ. Sɛ yɛdze iyi toto abrabo ho a, yehwe ma kora tse a, yehu de obi a ɔrotwe kora biara no hu no kora de ne tsir mu ye sum mpo wo ber a ne ndzeyɛ nnkyere dem. Korafɔ biara wo adwen bon wo no kora ho naaso onye no serew ma ɔtɔfabi mpo a woye hon adze bo mu naaso nna ne nyinara ye enyi do ara kekɛ na hon tsir mu dze, nna asem fofor a.



Mfonyin 3: *Kora tse de nantwi bin*



Mfonyin 4: *Awar tse de nkatse a, nkyɛ mobɔbo ahwe*

Opanyin Kweku Egya a nhwehwemufɔ no nye no twetwe nkɔmbɔ fa dem tam yi ne dzin ho no kaa de, awar ye biribi a wonnso nnhwe ansaana woako mu. Oma oda dzi de, nkatse dze se chye no bon mu na se ibohu de oye papa anaa onnye a, gyede abo ansaana naaso awar dze onntse dem. Se ibohu de oye anaa onnye gyede iwura mu ansaana ehu. Dza yehu no abowano no nnye dem na otse wo fie. Bio, oka de suban a awarfo da no edzi ma hon ho ana wawar no nnye ndem suban no wodze tsena afeboo. Ne dem no ntsi dodow ara woenu hon ho wo hon awar mu to de woka asem a otse dem. Binom mpo to tam no bi fura.

Mfatoho nkaa no na medze ato gua wo ase ha yi;

- b) Aman pe se
- c) Me tamfo mma nntwitwa woho nnkyere me
- d) Ebusua do fun
- e) Dwen woho
- f) Medze mese abo adwe ma kwasea bi abefa



4.2.3 Akan atam edzin a oye afotu

Afotu ye nsem bi a no ho hia ma dasanyi biara wo n'abrabo akwantu mu. Otum sesa tsebea a obi wo mu. Mpanyin de "se nnyi panyin a due "siantisir nye de, Akanfo wo gyedzi bi de nyimpa biara hia panyin bi a obotum akasa akyerɛ no atsentsen n'abrabo. Se iyi botum aba mu a, gyede onam afotu do. Dem ara so na Akan atam no bi kitsa edzin a oye afotu na otum sesa obi n'abrabo.



Mfonyin 5: *Aban nkaba*

Nsenkyerɛdze a ɔdeda tam yi mu no ye nkaba a aporisifo dze gu obi ne nsa wo aber a woakyer no. Tam yi ne tsir fi “Fie ye a nkyɛ abankaba nda me nsa”. Tamtonyi a me nye no dzi nkombɔ faa tam yi ho kyere mu de, ahweyie ho hia ma nyimpa dasanyi, osiande obi a ohwe no ho yie no nnya amandze na mbom obi a onnhwe no ho yie no dze aban nkaba nnkɛpa ne nsa ara da. Aber biara na asem bon bi dzi n’ekyir na se ɔye aban mu asem nkotsee dza onno ansaana obodu poristahyen no nna aban nkaba no da ne nsa amma woennguan. Iyi ye ahweyie ho afotusem dze ma obiara.

a) ABCD



Mfonyin 6: *ABCD*

Nsenkyeredze a ɔwɔ tam yi mu no yɛ akyerɛwamba a skuulfo dze dzi dwuma aber biara. Obaapanyin a nhwehwɛmufo no nye no twetwe nkɔmbɔ no dze tam ne dzin no toto abrabɔ ho na ma ɔkaa nye dɛ, abrabɔ no wɔhyɛ ase wɔ beebi dze kodu beebi. Mba a wɔdze sua adze wɔ skuul no mpo yefi kor ansaana yɛakɔ ebien. Demara so na akyerɛwamba no so yefi A anaa yɛakɔ B. Ɔkɔɔr do kyerɛ mu dɛ sɛ obi n'abrabɔ botum akɔ do yie a, ɔwɔ dɛ onya nyimdzee mapa fi skuul na onya bi so fi fie, osiandɛ nyimpa nnya nyimdzee ana nyansa mmfi skuul nko na mbom otum nya bi fi fie so. Mpanyin aka ato hɔ dɛ, “ɔson fie nyansa nko na ɔson skuul nyansa so nko”. Iyi ntsi tam yi rekyerɛ dɛ abrabɔ a yerobɔ no ɔyɛ ndzidzido. Mbirikatu biara nnyi ɔbra a yerobɔ no mu na mbom sɛ yɛhyɛ ase wɔ beebi a ɔwɔ dɛ yɛhyɛ ase no a, ɔdze hen bodu beebi a ɔwɔ dɛ yedu.

Mfatoho nkaa no na medze ato gua wɔ ase ha yi;

- b) Innyi sika a, nntwa brɔg
- c) Erokɔ awar a, bisa
- d) Papayɛ asa
- e) Ɔbaatan na onyim dza ne mba bedzi



4.2.2.2 Ber potsee a Akanfo dze fura tam bi

Akanfo wɔ mber pii a wɔdze fura tam. Dem mber yi nyinara gyina dwuma potsee bi do. Dwumadzi ahorow bi tse dɛ eyiyɛ, abadzinto, awargye ase anaa ayeforhyia ase, guabɔ ase na pii a ɔkeka ho.

4.3.2.2.1 Akan atam edzin a ɔfa owu ho (Eyiyeber mu tam)


Oxford English Dictionary kyere owu mu de ɔye kwan a nyimpa yi nyinara gyae de se wɔregye ahom a nna ɔkyere de hon abrabo aba ewie a obi anaa biribi fa do dze twa ne nkwa do. Otum ye nyimpa, mbowa anaa ndua. Owu ye esumasem a obi nnyim da ne mber bɔso. Nyimpa pii na wonya de wobotum eyi owu akwa a nkye wɔbɛpe naaso ɔye adze a Ɔdomankoma ahyehye ato ho de se obiara ne mber so a ɔwo de ɔko. Mpanyin hu owu de ɔye mfaso ma hon. Wohu no de hon honandua no abre ntsi se owu baa ɔye mfaso ma hon.

Sarpong (1974) kyere akwan ahorow a obi tum fa do dze wu. Dza odzikan no nye de nyimpa no benyin edu ne mberwaye mu anaa nkɔkorabo mu na obowu. Dza ɔto do bio so nye de nyimpa no beyar na ɔnam yarba no do bowu. Bio, ɔnam obi n'asodzen do anaa no mfom bi anaa akwanhyia do botum ewu. Iyinom nyinara ye kwan a ɔdasanyi tum fa do dze wu. Se odu eyiber a atam ahorow na ebusuafo nye adɔfo fura dze kata hon dehyee no ekyir koraa.

Akanfo wo gyedzi de owu ye biribi a Ɔbɔadze yee dze bataa nyimpa n'abrabo ho. Bio, wɔwo gyedzi de se obi wu a, ɔko do tsena ase wo sunsum wiadze. Awoo na owu nam kwan kor do, osiande de mbre owu tum yi nyimpa fi atseasefo asaase do yi demara so na awoo so dze nyimpa no bi beka hon a wɔwo asaase yi do ho. Mpanyin to ka de, 'owu ne tsirmu ye dzen', osiande ɔmmfa ho nyimpa no ne mfe, ne dzibew, ahoɔfɛw anaa ne sika ho, otum dze obiara ko se wo mber so a. Owu tum fa panyin tum fa abofra, ntsi wɔwo dasanyi biara ba asaase do a, otwar de mber so a, owu. Mber pii no eyiye gyina kwan a obi faa do wui.

Otum ba no de onyia no enyin na oewu anaa oyaree na owuii. Akanfo fa dem owu yi de oye owu pa. Obi so tum nya akwanhyia na ofa do dze wu. Oba tamfura mu a, dem owu ahorow yi nyinara wo atam a wofura dze dzi dem dwuma yi, nkakanara atam no n'ahosu no dzi dwuma wo ha. Se owufo no ye panyin a, wofura fufuw. Demara so na se owu no ye atfo wu anaa onyia no enyin kora ana owu so a wofura fufuw. Se owufo no ye abasirwa so a wotum fura tuntum. Yewo atam bi wo ho a, hon edzin na okyere de oye dza wodze ko eyi. Wokitsa edzin bi a ofa owu ho na iyi so ne fura no tum nye afofor kasa. Nde mber yi nkorofu nnto de wohwe atam edzin ansaana wodze ako eyi na mbom ne ahosu no na okyere. Nyimpa dodowara na wohu de se obi fura tam a n'enyi dum a, wotum dze hon adwen dze bu de onyia no wo eyi mu anaa awerhow mu.

Se yedze kasa mfeefeemu mu rekyere iyi mu a, tam ne dzin noara kyere dwuma a wodze tam no dzi. Atam bi tse de:




- a) Owu see fie
- b) Owu atwer baako mmfow
- c) Na pa edze hen gyaa woana?
- d) Ntsetsewudzi ye yaw

4.2.2.1.1 Owu see fie

Kasa kwan do no, owu see fie kyere de, se owu to ebusua bi mu a, nna odze ohaw na atsetsee aba. Oba no dem a nna fie aye basaa. Na wo Mfantse amambra mu no eyiye ye amandze a woye ma owufo. Akanfo ye dem amandze yi dze kata owufo no n'ekyir koraa. Bio, eyiye amandze no so woye dze tsetsew owufo no na atseasefo no ntamu.

Onam de tam no kitsa owu de oye ne dzin no ntsi, iyi nkotsee mpo kyere de oye tam a wodge ke eyi ntsi ahosu biara okitsa no mpo mmfa ho. Dem tam yi ye mpanyin tam a hen Nananom nna wonngya no ekyir, osiande oye tam bi a okasa. Aber biara a bi bofura tam a otse dem no oma afofor hu de onyia no wo eyi mu.



Mfonyin 7: Owu see fie

4.2.2.1.2 Owu atwer baako mmfow

Se yehwe dem tam yi ne dzin wo kasa dwumadzi kwan do a, yehu de tam yi ne dzin no rekyere mbre nyimpa n'abrabo si tse. Akanfo wo gyedzi bi de se wowoobi ba wiadze a, otwar de mber bi boso a odasanyi botum ewu na owu so da amansan kon mu na otwar de obra ekyir no obiara wu. Tam ne dzin yi fa owu de atwer a obiara bofuww wo n'abrabo n'ewiei mu. Iyi kyere de obiara bo wu. Tam yi ne dzin no fa owu ho naaso onam de tam yi kitsa ahosu ahorow pii no ntsi nyimpa dodowara na wonnhwe tam no dzin na mbom wohwe tam n'ahosu no ho. Iyi to si wo nde mber yi mu mba hon afamu tsitsir. Tam yi n'ahosu kokoo anaa tuntum no na woto do wodge ko eyiase. Aber kor noara so wodge ne fufuw no dze ko ndaase som ase, mekyere eyi mu ndaasesom ase.



Mfonyin 8: Owu atwer baako mmfow

4.2.2.1.3 Ntsetsewmudzi ye yaw

Tam yi ne dzin da no edzi de owu bata odasanyi biara n'abrabo ho na se oba no dem a oye dzen ma atseasefo. Ne siantsir nye de, owu na otsetsew owufo na atseasefo hon ntamu. Akanfo amambra kwan do no, atormuadze kor a woto de woye ma owufo nye de onye atseasefo dzi mpaamu nkankaara nye n'ebusuafo. Akanfo wo gyedzi bi de se woye dem atormuadze no a nna okyerε de owufo no nnye atseasefo nnyi nkitahodzi bio. Odur dem ber no a, nna oye dzen ma dasanyi osiande oye awerehow na oye yaw so na iyi ma oibara hu de nyimpa nnka honho bio.

Atam edzin a odzidzi do yi nyinara so ye atam a ofa owu ho na aber kor noara so wodze ko eyi:

4.2.2.1.4 Afe bi ye esian

Akwanyhia ahorow pii na nyimpa hyia no wɔ n'abrabo mu wɔ afe mu. Otum ye abanmu amandzenyasem, otum ye owu, nyarbanyarba anaa ogya hyehyew. Nhwewemu dwumadzi no maa oɔaa edzi de dem akwanyhia yi nyinara tum toatoa do wɔ obi n'abrabo wɔ afe bi mu. Se oɔa no dem a nna okyerɛ de afe no nye nyimpa no enndzi no yie. Otum ba no de obi ko ahaye na obohu de abowa bi gyina ho na oɔɔtow no tur na oetse de nyimpa bi retsea mu. Na oɔko na obohu de nyimpa na itur no abo no ma woewu. Iyi ye amandzenyasem kese a wotum dze nyimpa no to efiadze. Akwanyhia a oetse dem yi tum ma afemu nhyehyee anaa dwumadzi bi a obi pe de odzi nyinara bo no. Nyimpa no anaa no ho nyimpa bi mpo tum fura tam yi bi dze kyere ohaw anaa ahohiahia a wɔwɔ mu.



Mfonyin 9: *Afe bi ye esian*

- a) Dabi yebehyia
- b) Wo wu yi atsew hen nson mu
- c) Gyaɛ su na gyina pintsinn wɔ Nyame mu
- d) Ama asem aba fie.

4.2.2.2 Atam a wotum dze kɔ abadzinto ase

Dzin ye ahyensewdze a wɔdze ma nyimpa, mbowa, ndzɛmba na mbea. Demara so na abadzinto ye amandze a wɔye dze ma abofra a wɔawoo no fofor. Wɔma abofra no dzin dze hye no nsew.

Abadzinto ye amambra dwumadzi bi a no hia yie wɔ Akanfo abrabɔ mu. Ɔye atɔrmuadze nsonsonɛe a ɔda ɔno na afofor ntamu. Doja kyere mu wɔ Sheshan (1944) no dwumadzi mu no ka de Albamafo wɔ gyedzi bi de abofra a wɔmma no dzin no, esunsum bɔn tum nya hɔnho kwan. Iyi kyere de wɔwoo abofra wɔ bea a ɔtse dem a ɔnnkyer na wɔama no dzin ama esiw esunsum bɔn kwan.

Acquah (2009) so ka de abadzinto na ɔye amandze a wɔdzi kan ye wɔ gyinabew a odzi kan wɔ ɔdasanyi biara n'abrabɔ mu, osiande Akanfo wɔ gyedzi bi de abofra biara ye hɔho na hɔn awofɔ so wɔ asamamanadze. Ne dem no ntsi se abofra dzi n'awɔtwe a wɔma no dzin dze hye no nsew wɔ atseasefo asaase do.

Dwumadzi a ɔtse dem yi, atam ahorow na wɔdze dzi. Nde mber yi mpo dze awofɔ no dodowara na wofura kente dze dzi dwuma a ɔtse dem. Dwumadzi yi rohwe biribi afa daadaa tam a wotum dze kɔ abadzinto ase.

Dzramado (2009) kyere de, atam a awofɔ fura no ye tam fufuw na wɔdze dzi dwuma a ɔtse dem no dze kyere nkonyimdzi. Adwen tsitsir a ɔye a ɔtaa atam ekyir no gyina tam no ne dzin na mber ne nkyereasee tse. Iyi ye nokwar turodoo, osiande nnye tam biara na

wɔdze kɔ abadzinto ase. Atam no bi kitsa ekutsia dzin na iyi mmfata dwumadzi a ɔtse dɛm no. Yenyim dɛ atam a okitsa edzin ahorow no nyinara a ɔfata dɛ wɔdze kɔ abadzinto ase no nyinara wɔ dɛ ɔyɛ fufuw. Atam a wotum dze kɔ abadzinto ase no bi nye dza odzidzi do yi:

a. Afa me nwa



Mfonyin 10: *Afa me nwa*



Mfonyin 11: *Bonsu*

- b. Obaatan na onyim dza ne mba bedzi
- c. Abofra bo nwa na ommba akyekyerε
- d. Nyame enyiwa
- e. Dza Onyame ayε ama me
- f. Obaa pa
- g. Highlife
- h. Nsubura

4.2.2.3 Atam a wotum dze ko awargye anaa ayeforhyia ase

Stephens (1971) kyere awar mu de oye nkitahodzi a ntsease wo mu a oda banyin na basia ntamu. Owow do kyere de, awar nnye ahoofew nkotsee na mbom tsema a ankorankor benya ama hon ho. Awar ye nkitahodzi a oda obaa nye banyin a oedu hon mpanyin mfe do ntamu. Nyimpa du dem gymbew wo aber a mpanyin ehu de woaso awar. Onam awoo do ma ebusua ase dor. Amandze ahorow na Akanfo ye dze gye tow mu de obi ye warfo. Se oba no awargye a ndzamba pii na ayefor no dze siesie no ho. Ndzamba no bi nye, mpaboa anaa asopatsee, konmuadze, ahondze, mpatsea na pii a okeka ho.

Tsetse no nna hen nananom fura Kente na brebetse na wodze ko dwumadzi bi a otse dem ase. Owow mu de nde mber yi kente daho dzi akotsen wo awargye anaa ayeforhyia mu naaso daadaa tam reye ahye kente do. Mbaa binom tum fura no “slit” na kaba nna binom so dze pam atar hye. Demara so na mbanyin binom tutu gu hon kon ho anaa so


wɔdze pam sor tar hyɛ. Mbanyin binom so tum dze pam “togas” dze fura hɔn tam. Nhwehwemu kyere dɛ, daadaa tam a n’enyi da hɔ no ye fɛw ɔnam ahosu a okitsa ntsi wotum dze kɔ bea ɔtse dɛm. Ndɛ mber yi mu mba kyere dɛ kente no bo ye dzen kyen daa daa tam ntsi hɔn enyi nngye ho. Bio, wɔ kyere mu dɛ, ayeforfo no no tɔ dɛ wofura kente, ntsi sɛ wofura kente no bi a ɔbɛyɛ no na wɔayɛ kyenkyenen asen ayefor no ntsi na wɔpɛ daadaa tam no. Atam bi tse dɛ adukurow mu nsu, Kɛtɛ pa, Meda hɔ ma wo, Koforidua flowers na pii ɔkeka ho yi nyinara ye dza wotum dze kɔ awargye anaa ayeforhyia ase. Atam yi nyinara kitsa edzin a ɔfa ɔdɔ ho. Atam yi n’ahosu no bi ye dzaa wɔdze kɔ ayeforhyiase.

a) **ɔbaa pa**

Nkɔmbɔtwetwe a ɔkɔɔr do wɔ nhwehwemufɔ na ɔbaapanyin kor ntamu no kyere dɛ, ɔbaa pa ye tam bi a, ɔkyere mbrɛ basia bi no suban tse. ɔda edzi dɛ, tsetse no nna sɛ wɔrebɛyɛ basia bi no ho adze a, banyin no dze tam yi bi dze ka atam ahorow a ɔdze rebɛgye awar no ho. ɔkyere mu bio dɛ, mpo sɛ tam a wɔdze rebɛgye awar no sɛ iyi bi mpo nnka ho a, suban a ɔbaa no bɛda no edzi wɔ n’awar mu no mpo tum ma onya tam yi bi fi no kun hɔ. ɔtɔ dɛ wɔtɔ tam yi no fufuw dze ma basia bi a wɔawo fofor. Sɛ obi benya tam bi dɛm no nna ɔkyere no bo a ɔsom ma no kun ansaana.



Mfonyin 12: *Obaa pa*



Mfonyin 13: *Okun pa woana benya?*

4.2.3.1 Atam edzin a ɔye nyimpa dzin

Onam de kwan a atam nam do nya hon edzin dɔso no ntsi, mpanyin nam ndzamba bi tse de nyimpa edzin, mbowa edzin na nduadzewa ahorow pii do toto atam edzin. Akanfo

atam no bi kitsa nyimpa dzin na nhwehwemu kyere de dem atam yi no dodowara no nya hon edzin no ansaana worubodur gua do ma woaton. Atam bi tse de

- a. Felicia
- b. Yaw Donko
- c. Angelina

Nhwehwemu no ma oda edzi de, wodze tam yi too nyimpa a odzi kan hyee tam no bi. Oye tam bi a mbanyin na mbaa nyinara tum hye. Wotum dze ko dwumadzi biara ase, osiande okitsa ahusu bebree a bea a epe de edze ko biara ibotum dze ako.



Mfonyin 14: *Angelina*

- d. Job enyinsua
- e. Nkroma pensel
- f. Kofi Annan adwen
- g. Akuffo ahendzi

Dem tam yi wɔdze to Ghana ɔmanpanyin a odzikan a wɔfrɛ no “Kwame Nkrumah”. Nhwɛhwɛmu kyɛrɛ dɛ ansaana Nkrumah dze asem bi boto gua no, gyedɛ wɔadwen ho na wɔakyerɛw na woehu dɛ oye ansaana. Nna ɔyɛ obi a ɔka nsem a ɔdze mpontu na yiedzi bɛberɛ ɔman no.

Bio, ɔnam nhwɛhwɛmu do da edzi dɛ Nkrumah ne kyɛrɛw dua no nna ɔyɛ biribi a nna n’ano yɛ nam ara yie ntsi nna ɔdze kyɛrɛw nsem a no ho hia na mfaso so wɔ mu.



Mfonyin 15: *Nkroma pensel*

4.2.3.2 Atam edzin a ɔyɛ mbowa edzin

Atamtɔmfɔ nye hɔn a wɔyɛ tam no na ɔto dɛ wɔma atam edzin. Nhwɛhwɛmu daa no edzi dɛ dem nyimpakuw ebien yi tum hwɛ nsenkyɛrdze a ɔwɔ tam no no mu na wɔdze ma no edzin. Mfatoho bi tse dɛ,

- a. Akɔmfɛm
- b. Ananse awendze

- c. Bonsu
- d. Akyekyerε ekyir
- e. Munnsuro kotoko na mesuro ne nwoma

Akyekyerε ekyir


Tam yi mu nsenkyerεdze a ɔyε akyekyerε n'ekyir bon no na ɔyε tam no ne dzin. Tam yi ne dzin ye be na wonya iyi fi “Hurii si akyekyerε ekyir a, osi ho kwa”. Se abowa akyekyerε botum enya bambɔ a nna ofir n'ekyir abon no. Abowa akyekyerε tum suma no ho wɔ n'ekyir abon no mu aber a asem bon bi pe de ɔto no. Nhwewemu ma ɔda edzi de, se yεdze dem tam yi ne dzin toto abrabo ho a ma ɔkyere ara nye de, nyimpa biara hia bambɔfo kese wɔ n'abrabo mu. Bambɔfo kese nye Nyankopɔn naaso nyimpa binom wɔ enyame afofor a wɔbɔ hon ho ban. Nsem a nyia nhwewemufo no nye no twetwe nkɔmbɔ no dze wie no yε afotu na ɔkaa de, de mbre wiadze yi mu esi aye hu ntsi ɔwɔ de obiara dze no ho hye ne Nyame mu yie na biribiara ewie yie ama no. Ahsu pii na dem tam yi kitsa, ne dem no ntsi wotum dze kɔ bea biara a ofurafo no pe.



Mfonyin 16: *Akyekyerε ekyir*

f. Sika tu de anoma

Tam no ne dzin no dze sika toto anoma ho. Nkyereasee no rekyere de sika so wo antaban a otum tu. Nkombatwetwe mu no, nhwehwemufu no hun de onam de sika ho ye dzen no ntsi se nyimpa enntum annhwe ne sika do yie a, otum fi ne nsa de mbre anoma so tum fi obi ne nsa mu tu ko se woennsuo no mu yie a. Tamtonyi no ka de, onam de sika ho ye dzen no ntsi owo de obiara a sika kakra wo ne nsamu no owo de okorokoro no de biribi a osombo amma emmfi ne nsa annko. Okor do kaa de, se sika fi obi ne nsa mu a, obeye dzin de ibenya no bio. Odze iyi toto anoma ho de se ofi wo nsa ara per a onnye adze a ibohu anaa ibenya dem anoma no bio. Odze ye afotu de obiara nkitsa dza owo biara mu yie na emmfi ne nsa annko.



Mfonyin 17: *Sika tu de anoma*

4.2.3.3 Atam edzin a oye nduadzewa

Akanfo atam edzin no bi kitsa nduadzewa edzin. Dem atam yi no dodowara nyaa hon edzin fii nsenkyeredze ahorow a wodze yee atam no. Atam no bi nye:

a. Kwadu saw

Ahyensewdze a ɔwɔ tam yi mu ye kwadu dodow a ɔbo mu kor. Tam kyere mbrɛ koryɛ si ye fɛw. Ɔkyere dɛ sɛ nyimpa nyinara ye kor a ɔma asomdwee na ntseasee ye edwuma. Iyi boa ma mpanyin asem a wɔaka ato ho dɛ, 'tsir kor nnko egyina' no ye nokwar. Siantsir nye dɛ, sɛ nyimpa anaa ebusuafo bɔmu ye hon adze kor anaa woyɛ hon adze bɔ mu a ɔma biribiara ye yie na ɔma ebusua so tsim.



Mfonyin 18: *Kwadu saw*

- b. Aso bayer doto
- c. Nkampor ahaban
- d. Ahwerpɔw



Mfonyin 19: *Ahwerpɔw*

Tam yi mu nsenkyeredze no ye ahwer na ahwer biara so wo pɔw a ɔka afaafa bo mu.

e. Congo ahaban / Dua wusuuw


4.3 Tam edzin na ahosu dza ɔwo hen na no ho hia

Dem ɔfa yi yiye asembisa a ɔto do ebiasa no ano. Nhwehwemu kyere de ne nyinara ho hia yie, osiande ahosu dzi dwuma wo hen daadaa dwumadzi mu. Ahosu biara kitsa ne nkyereasee naaso obiara wo ne nkyereasee a ɔdze ma ahosu ahorow no nyinara. Atam ahosu ho hia ara yie ma Akanfo, osiande otum ye egyptahyedze dze ma hon. Otum kyere tsebea a obi wo mu anaa obi ne gyinabew wo abrabo mu.

Ahosu ahorow ne nyinara ne nkyereasee da edzi pefee. Atamfurafo to de wohwe atam ahosu ho papanara ansaana wɔafa dze aye honho dze ako dwumadzi bi ase. Nyimpa dodowara na wɔwo nyimdzee wo atam ahosu ho ntsi iyi tum boa hon ma wuhu tam a n'ahosu fata dwumadzi a wɔroko no. Nhwehwemu kyere de, ahosu bi tse de akokɔangua gyina ho ma anyenkoye, ahonya, otum kyere ɔdehwe anaa obirempon a obi ye. Bio,

ahosu bi tse de tuntum anaa koben tum dze ayamuhyehye ba, osiande dem ahosu gyina ho de nya ofura no ahom ahyehyew anaa owo awerehow mu.

Bio, atam ahosu tum kasa kyere afofor ntsi se obi fura tam bi a ahosu nnye dwumadzi bi nnko a, otum dze asem bre ofurafo no. Mfatoho bi nye de, obi roko ne nyenko ne ba n'abadzinto ase na oefura tam tuntum no obiara a owo nyimdzee wo ahosu ho bɔdwen biribi afa no ho. Enyimdzefo ama ada edzi de, Akanfo no ahosu tsitsir a woto de wɔdze dzi dwuma no nye tuntum, kɔkɔ na fufuw nna otɔfabi so a sika so ka ho.. Ahosu tuntum gyina ho ma awerehow, sum, oyaw na mbusu. Ma tuntum gyina ho ma ntsi Akanfo to de wɔdze ye eyi. Iyi abeye biribi a Akanfo aye ma abeka hon abrabo ho na mbom se owu no ye atɔfo wu anaa de owufo no ne na ne ba biara nnwu da dza woto de wofura fufuw. Akanfo dze tam tuntum ye hon a woewu abɔdwee wu no hon eyi. Eyiye ber du a atam ahosu a odzi dwuma wo ase papaapa nye dubir, tuntum na koben.



4.4 Atam ahosu ahorow

Bennet (1991) kyere ahosu mu de oye ndzɛmba a yedze dzi nkitaho no no mu kor. Iyi ye nokwar turodoo, osiande wo atam fura mu tam bi n'ahosu tum kyere tsebea a obi wo mu na otum kasa kyere afofor so. Obi a ofura tam fufuw na ɔdze akadze fufuw aka ho kyere de onyia no awow fofor, edzi nkonyim wo biribi mu na pii a okeka ho. Se obi so fura tam tuntum a ɔdze kyere ne tsebea a owo mu.

Ahosu ye biribi a otum twe obi n'adwen gyina biribi do anaa otwe obi n'adwen fi biribi do. Nyimpa biara wo ahosu potsee bi a n'enyi gye ho yie. Obi enyi gye kɔkɔ ho ntsi

otum hye wɔ aber a onnyi awerɛhow anaa asem bi ato no. Demara so na nyimpa binom so enyi gye fufuw ho. Se onyia no fura tam fufuw anaa ɔhye atar bi a ɔye fufuw no nnkyere de ɔwɔ enyigye mu de mbre yedze adze fufuw gyina ho ma nkonyimdzi no.

Duje (2019) kyere de, ahosu abeye biribi a osom nyimpa bo anaa no ho hia paara ma nyimpa, osiande wotum dze kyere mbre nyimpa bi tse, atsenka bi a ɔwɔ na ne gyedzi. Ne dem ntsi atam ahosu so ho wɔ mfaso pii ma ankorankor. Ahosu ahorow nyinara wɔ ne nkyereasee anaa biribi wɔdze gyina ho ma no. Nhwehwemu kyere de ahosu nkyereasee no nnye kor wɔ mbea nyinara osiande dza Akanfo a wɔwɔ Ghana ha tum dze tuntum gyina ho ma awerɛhow anaa eyiye naaso wɔ ɔman fofor bi mu no wotum dze fufuw dze ye eyi. Mfatoho nye, wɔ Japan man mu no, tuntum som hon bo ara yie, osiande wotum dze dzi dwuma pii na mbom fufuw na wɔdze ye eyi.


Okɔ do kyere de, atam no ahosu no bi wɔ ho a, adehye anaa nyimpa tsitsir bi na wofura. Iyi kyere de, nnye tam ahosu no ne nyinara na obiara tum dze ye noho se ɔba no gyinabew ahorow a nyimpa binom kitsa.

Enyimdzefo binom ama ada edzi pefee de ahosu no ho mfaso a ɔwɔ no ntsi, ɔboa ma ɔda nyimpa n'ahoɔfew su edzi. Ahosu ahorow bi tse de, ahaebun, kɔkɔɔ, bruw, akokɔangua na pii a ɔkeka ho.

Frank na Gilovich (1998) kyere de atam ahosu tum kyere ankorankor hon su. Enyimdzefo yi hon nhwehwemu no ma ɔda edzi de nyimpa dodow a wofura tam tuntum

anaa hɔn enyi gye tuntum no no enyi do ye hyew sen hɔn a wofura fufuw. Atam ahosu kyere hɔn bo a yesom anaa hɔn mudur, suban, nyimpa bɛn na pii a ɛkeka ho. Akanfo atam ahosu ahorow no nyinara wɔ ne dwumadzi a odzi.

Atamtɔmfɔ ahorow a me nye hɔn dzii dwuma no kyere dɛ, atam ahorow no nyinara wɔ ahosu ahorow pii na ndɛ mber yi mpo nyimpa dodow ara hɔn enyi dzi atam ahosu no ekyir sen edzin no. Hɔn nkyerɛasee nye dɛ, mber pii no nkorɔfo a wɔtɔ tam no kyere dɛ sɛ tam no enyi da hɔ a wotum dze kɔ beebiara na mbom dza n'enyi dum no dze wɔmmfa nnkɔ enyigye bea. Onam Akanfo hɔn gyedzi wɔ eyiyɛ ho ntsi, tam a n'enyi dum anaa obir biara no wotum dze kɔ eyi ase wɛ aber a wɔnnhwɛ ne dzin noho.



Ndɛ mber yi mu mba a menye hɔn dzii dwuma no so kaa dɛ, wɔnnhwɛ tam ne dzin hɔ nntɔ tam, osiandɛ hɔn dodow nara na wonnyim atam edzin no mpo. Wɔma ɔdaa edzi dɛ ataam no ahosu no hia hɔn papaapa sen ne dzin no. Mfatoho bi a wɔdze maa no kyere dɛ, tam bi tse dɛ, Afe bi ye esian tam no bi wɔ hɔ a okitsa ahosu ebiase aber kor no ara. Bi ye bruu kakra, akokɔangoa kakra na ahaebun so kakra. Dɛm ahosu yi nyinara wɔ tam kor mu, ne dɛm no ntsi ɔma tam no ye fɛw ntsi wotum fura anaa wɔdze twa atar hyɛ kɔ beebiara a wɔpɛ. Wɔnntɔ dɛ wɔhwɛ dzin no ho na mbom wotum hwɛ ne fɛw no ho dze hyɛ. Afe bi ye esian tam yi, dodowara nyim dɛ ɔye tam bi a nkyɛ wotum fura wɔ aber a obi n'ahom ahyehyew anaa ɔwɔ awerehow mu naaso, no kɔkɔɔ, tuntum anaa ne dubir no botum edzi dwuma ɔtse dɛm no na ne ahosu nkaa no so wɔdze akɔ beebiara, dɛ ɔye abadzinto, ayeforhyia ase, guabɔ ase na pii a ɛkeka ho.

Aber kor noara so se oba no ahosu mu a, nhwehwemu kyere de se obaatan bi ne wu a, oto de woye fufuw mbre obeye a orennhye ne yamu ma onnsiw n'awow ho kwan. Onam de atam ahosu kasa ntsi mpen pii no otum ma obi nya amandze, osiande tam ahosu no bi nye dwumaddzi bi nko do. Se obi fura eyi tam anaa tam tuntum dze ko ayeforhyia ase wo aber a onyia no nnyi eyi mu a, nna afofor a wogyina nkyen no botum dze nkyeremu fofor ama nya ofura tam no. Nhwehwemu kyere de, ahosu ahorow no doo so naaso no mu ebiasa na Akanfo taa dze dzi dwuma. Dem ahosu ahorow yi nye fufuw, tuntum na koben.

4.4.1 Ahosu ahorow

Atam kitsa ahosu ahorow pii na ne nyinara so wo dwuma a odzi na bea so a wotum fura dem atam no ko. Akanfo to de wodze atam ahosu ahorow no dzi dwuma ara yie.

Obeng na nkaa (2018) kyere de, ahosu tum nya nsunsuando pii wo atoko anaa atamfurafo do. Iyi da edzi pefee osiande tam biara a obi bofura no, odzi kan hwe de se dem ahosu boboa no wo dza odze rekeye no mu ansaana w'ahye. Maame panyin tamtonyi bi a owo Mankessim guamu kyere de, tsebea bi na oma obi fura tam bi a okitsa ahosu soronko bi.

Oko do kyere de, se obi n'ahocfew botum ada edzi yie a, ogyina ndzamba ahorow a odze siesie no ho n'ahosu do ansaana, osiande atam n'ahosu no tum ma nyimpa da nsew yie. Akanfo mmfura hon tam biara biara, tsitsir mpanyimfo a wonyim atam mu na wodze atam edzi dwuma akyer yie.

4.4.1.1 Fufuw

Ahosu fufuw no yɛ ahosu bi a otum kyere, ahotsew, enyigye, yieye, enyimnyamhye, siar na pii a okeka ho. Onam de ahosu fufuw enyi da ho ntsi, oba no tam fura mu a, nyimpa dodowara wofura no ma obiara hu hon. Mpo se nyimpa no wo ekyir a wotum hu no. Tam fufuw ne fura no taa dzi akotsen wo mbaa a wawoo fofor hon abrabo mu. Akanfo hu nyinsen na awoo de oye akwantu a no mu nsem ye hu araa yie. Ntsi, se obaa wo a oto de ofura tam fufuw dze kyere de woedzi nkonyim wo ne bosom akron akwantu no mu. Nnye obiara na oko awoo do a, oba. Obaatan fofor biara fura fufuw dze kyere nkomyimdzi na enyigye.

Bio, hon a woto de wofura tam fufuw no mber pii no ye ahweye, osiande oye ahosu bi a ahosu fofor bi kofura mu a oyi no ho. Ne dem no ntsi atam efufuw tum ye fi ntsem. Nhwehwemu no mu no, oda edzi de se obi wu na oye obi a n'enyi efir yie a, ebusua to de wofura fufuw dze ye ne eyi. Siantsir nye de, Akanfo wo gyedzi bi de, obi a n'enyi fir yie ansaana oewu no ye obi a waboo ne bra yie ma ne dem no ntsi owo de woye fufuw dze kata n'ekyir.

Bio, obi a ne ba nnwu da na se ne ba dzi kan wu a, awofu no fura tam fufuw. Nhwehwemu kyere de se oba no dem a obaatan no ne yamu nnhye ma onnsiw n'awoo ho kwan. Akanfo fre dem wu yi **fea**. Akanfo gyedzi de se abaatan no a hon ba odzikan ewu no fura tam fufuw no a, otum yi yaw dzendzen biara a owo hon mu no fi ho.

Dwumadzi ahorow pii na wɔdze afadze fufuw dzi. Dwumadzi bi tse de abadzinto, asɔrmu afedzi da bi tse de, buronya, wusoer ber mu na dza ɔkeka ho. Ayeforhya na enyigye dze biara no so wɔdze tam anaa aatar fufuw ko.

Tam fufuw tum dzi dwuma pii. Se wɔrogor basiaba bi mpo bra a, wɔdze tam fufuw na wɔdze fura hɔn dze ye amandze no. Akanfo wɔ gyedzi de fufuw tum gyna ho ma enyimnyamhye.

Ɔwɔ mu de tam fufuw tum dzi dwuma pii naaso se yehwe edzin ahorow a wokitsa no a, bi botum dze amandzenyasem abre obi. Mfatoho: “Kora tse de nantwi bin” anaa “Dua kor gye ehum a, obu”. Dem atam yi edzin no mbrɛ osi tse no ntsi, se obi fura dze ko ayefor anaa abadzinto ase a, afofor dze nkyere mu ahorow na wɔdze bema no. Ɔwɔ mu de ɔye fufuw dze naaso ne dzin no mmbɔa ma wɔmmfa nnko bea a ɔtse dem. Nyimpa binom tum yi hɔn enyi na wofura tam bi dze ko bea biara a wɔpe. Wɔnnhwe tam no ne dzin naaso ahosu no ara nye dza ɔye a hɔn adwen wɔ do.




Mfonyin 20: Senkye bregye

4.4.1.2 Tuntum

Ɔwɔ mu dɛ atam a okitsa ahosu pii na ɔwɔ guado naaso nyimpa dodowara tɔ atam a okitsa ahosu a hɔn enyi gye ho, hɔn enyi sɔ, dza hɔn akoma pɛ nna dza wɔdze yɛ hɔn ho wɔ dɛm aber no mu a ɔbɔboa hɔn. Valdez & Mehrabian (1994) ne dwumadzi wɔ Obeng na nkaa kyere dɛ ahosu a enyi da hɔ no mber pii no wɔdze gyina hɔ ma enyigye na dzaa n'enyi dum no so wɔdze gyina hɔ ma awerɛhow. Iyi yɛ nokwar turodoo, osiandɛ dɛm hɔn nsusuii da edzi wɔ Akanfo hɔn abrabɔ mu.

Akanfo tɔ dɛ wɔdze atam a n'ahosu enyi dum dze yɛ eyi. Sɛ obi wɔ awerɛhow mu a, afofor tum hu wɔ aber a wɔhwɛ atam anaa afadze onyia no dze ayɛ no ho. Nyimpa pii na ɔayɛ nhwehwɛmu afa atam ho naaso kwan kakra bi na ɔda ho ma mo so mereyɛ bi atoa do.




Hen mu dodowara na yenyim dɛ, tuntum gyina hɔ ma biribi a ɔnnyɛ naaso nhwehwɛmu kyere dɛ ɔntse dɛm. Siantsir nye dɛ, obiara na ahosu a ɔpɛ. Ndɛ mber yi mu mba mpo wotum dze tuntum kɔ ayefor ase osiandɛ ɔno nye ahosu a hɔn enyi gye ho. Iyi ma ɔda edzi dɛ tuntum nngyina hɔ mma awerɛhow nkotsee. Nyimpa biara na dza ɔpɛ. Ɔba no Akanfo amambra mu dza, tam tuntum no dwuma tsitsir a odzi nye dɛ wɔdze yɛ eyi. Aman binom tuntum yɛ dza wɔhyɛ wɔ aber a wɔwɔ enyigye mu na mbom wɔhyɛ fufuw wɔ aber a wɔwɔ awerɛhow anaa wɔreyɛ eyi.

4.4.1.3 Kɔben anaa kɔkɔ

Kɔben anaa kɔkɔ yɛ ahosu bi a odzi akotsen wɔ Akanfo hɔn amambra mu. Ahosu kɔkɔ kyere enyiber na ɔsan so gyina hɔ ma bɔgya na mbusu. Akanfo dodowara anaa nyimpakuw ahorow no nyinara dze kɔkɔ yɛ eyi. Akanfo kyere dɛ, yetum dze bɔgya gyinahɔ ma nyimpa ne kra. Ɔkra no ma nyimpa nkwa, dɛm ntsi na mpanyimfo se “nyimpa wu a na ne kra eguan no”. Dɛ obi dze no nkwa botwa akyer agye ne man anaa no kurow esi hɔ no, gyedzi kyere dɛ onyia no ehue no bɔgya egu. Akanfo tɔ dɛ wofura kɔkɔ dze yɛ eyi osiandɛ nyimpa binom kyere dɛ, sɛ obi wu na wɔammfa tam kɔben anaa kɔkɔ ennsie no a, nna no sunsum no nntum nnkɛda na mbom otum kyin ara dze kɛpem dɛ obenya beebi ada.

Dɛm ara so na kɔben so tse. Ɔyɛ ahosu bi a Akanfo dze dzi dwuma wɔ aber a enyiber anaa awerɛhow bi aba. Atamtɔnfo no mu bi kyere dɛ atam a ɔtse dɛm no yɛnntɔ nnhu no ayeforhyia anna abadzinto ase, osiandɛ abadzinto yɛ enyigyesem ntsi sɛ obi dze afadze bi a ɔtse dɛm kɔ ase a, nna otwa yie.



Mfonyin 21: Enyiber a ɔnnsɔ gya

4.4.1.4 Sika


Peterson (2004) kyerɛ dɛ ɔson mbrɛ obiara hu ahosu ahorow a yɛwɔ no na kwan a wɔfa do tse ase fa. Sɛ ahosu no ho mfaso ara nye dɛ yɛdze siesie hɛn ho dza nna nkyɛ ho mpo nnhia pii dɛm na mbom mfaso no bor yi do. Ahosu ahorow no na ɔkyerɛ bea na ber a yetum dze yɛ hɛn ho.

Sika yɛ ahosu bi a yetum dze yɛ hɛn ho aber biara. Yetum dze kɔ ayeforhyia ase, guabɔ ase, asɔr na mbea pii. Yetum dze sika siesie hɛnho mpo dze kyerɛ hɛn dzibew na hɛn nyimpa ban a yɛyɛ. Ahemfo tsitsir dze dɛm ahosu yi dzi dwuma ara yie. Ɔba no guabɔ ase nkɔree a, hɔn afadze no nyinara yɛ sika. Ofitsi hɔn tsir dze kɛpem hɔn ananadze. Tam a wofura, nsakɔnadze, kɔmmuadze na mpaboa nyinara kitsa dɛm ahosu no. Nhwɛhwɛmu da no edzi dɛ, odur enyigye ber da, yetum dze yɛ hɛn ho. Sɛ ɔbaa bi wo na odzi abosoom ebiasa dze rokɔ no a, ɔyɛ sika. Dɛm ber no nna woeyi fufuw efi no ho. Iyi ntsi otum dze tam a okitsa ahosu biara dze yɛ no ho wɔ aber a ɔdze sika aka no. Wɔtɔ ka dɛ woepue abofea

4.4.1.4.1 Ebɛka mo ho asɛm a, fa egua tsena do.

Asɛsɛgua yɛ egua bi a ɔwɔ hɔ fir tsetse na tam yi mu nsɛnkyerɛdze no tse dɛm. Nde mber yi mu dze, sɛ obi bohu asɛsɛgua a nna gyɛdɛ ahemfie anaa guabɔ bi ase a ahemfo wɔ hɔ. Tam yi ne dzin yɛ no ekutsia. Nhwɛhwɛmu kyerɛ dɛ nyimpa binom hɔn bra a wɔbɔ ara nye dɛ nkɔnkɔnsa na wɔdze ayɛ hɔn edwuma a wɔyɛ. Ntsi tam yi ne dzin no rekyerɛ dɛ sɛ edwuma a nyimpa no bɛyɛ ara nye no dza nna ɔmfa egua tsena do ama oetum aka no yie, osiandɛ no ho nsem dɔɔ so a ɔwɔ dɛ onya mber na ɔka.

Ɔnam dɛ tam yi yɛ ekutsia no ntsi nyimpa binom tum fura dze kasa kyere afofor. Mpanyin se, “ekutsia biara wɔ owura”, ne dem no ntsi obi tum dua dem tam yi do ka nsem kyere obi a onye no wɔ asem. Nyimpa binom so suro dɛ wobofura tam no, osiande obotum dze asem abre hon. Nyimpa binom so hwe tam no n’ahosu no ho na wodze to fura na mbom nnye tam no ne dzin bi a.



Mfonyin 22: *Beka mo ho asem a, fa egua tsena do*


4.4 Siantsir a nyimpa binom fura tam a onnyi dzin

Ɔfa yi nnka dwumadzi yi ne nsembisa no ho na mbom, wɔ nhwehwemu no mu no, ɔda edzi dɛ nyimpa binom wɔ siantsir soronko bi a ɔnam do ma wommfura tam a ɔwɔ dzin. Iyi twee nhwehwemufo no adwen gyina do ma ɔdze ɔno so kaa dwumadzi no ho.

Mpanyin ebu bɛ esiw amandze ano dɛ, “Obi n’akɔndɔ nye odompo nson”. Akanfo dodowara na wɔpɛ atam a ɔwɔ dzin. Binom so ɔnam siantsir bi ntsi wɔpɛ atam a onnyi

dzin. Biribiara a obi beye no wo ne siantsir, demara so na oba no atam to mu a wotum gyina siantsir bi do to.

Nhwehwemu kyere de nyimpa binom tum gyina tam ne few do dze to. Nde mber yi mu mba a me nye hon dzii nkitaho no kyere de, atam a n'enyi da ho no ye few ne dem no ntsi na wohwe ho dze to. Wonnhwe dzaowo dzin na mbom tam no ne few na wohwe dze to. Bio, wakaa de se nsenkyeredze na ahosu no ye few nkotsee dza a na wobotum dze ako dwumadzi bi ase dza a nna onnhia de wobotu tam aowo dzin. Dodow nara na wakaa de wope tam a wobotum dze ako dwumadzi ebien anaa ebiasa ase, osiande sikasem ho aye dzen ntsi se tam no wobotum dze ako mbeambea dze a, nna wobotu sen de wobotu dzaowo dzin.



Siantsir kor so nye de, onam de atam edzin kasa no ntsi, wosuro de wodze tam bi aowo dzin beye hon ho ako dwumadzi bi ase osiande, obi botum egyina tam a onyia no dze aye no ho no do nye no enya akasakasa. Atamtomfo hon hembaa no kaa de, tam bi tse de “medze mese abo adwe ma kwasea bi abefa” ye tam a okitsa ekutsia dzin ntsi se obi fura dze ko abadzinto anaa ayeforhyia ase a, obi tum gyina tam no ne dzin do kyere de onyia no nye nyimpa a oroto ne ba dzin anaa oreye ayefor no wo ntawantawa bi. Iyi tum dze nsem pii ba. Demara so na okyere mu de se akorafo tse fie na hon mu kor fura “Kora tse de nantwi bin a”, onam nkyereasee a tam no ne dzin no kitsa no ntsi otum dze mansotwe anaa akasakasa ba akorafo no ntamu. Ntsi wommpede wobofom obiara ntsi no, wobotu atam a onnyi dzin efura.

Siantsir no kor so nye de, nhwehwemu no maa oda edzi de, nyimpa binom so to atam a onnyi dzin dze ye hon ho osiande wotum dze ko mbea pii. Dwumadzi dodow ara na wotum dze ko. Wotum so hwe tam no n'ahosu ho, se tam no ahosu no nnye tuntum a obeye de eyi tam a ono wotum fura dze ko bea biara a wope. Ne few ntsi woto fura. Se obo no de tam no mpo kitsa ahaebun ahosu a, onya duukuu tuntum bi bo a, otum dze ko eyiase. Tam kor noara so wobotum dze ako ayeforhyia ase wo aber a oenya konmuadze na asowamuadze a oye few aka ho. Ne saso ntsi, obi boto tam a owo dzin efura enya asem dze a, oboto tam a onnyi dzin aye no ho.

Afei so, nyimpa binom kaa de, nkorofu fura tam a onnyi dzin dze ko dwumadzi ahorow ase, osiande wommpede wobonya amandze onam atam edzin a wonnyi ho nyimdzee biara no ntsi.

Nhwehwemu ama ada edzi de atam n'ahosu a wodze yee no n'enyi da ho, na demara so na no bo no da famu. Binom so kyere de nnye tam ne dzin nko na oma ne fura ye few na mbom mbre odzepamnyi no so besi apam no ma onyia no a orufura no n'ahom ka no ho.



ƆFA A ƆTO DO ENUM

EWIEI: MBUBUDO NA ADWENKYERƐ

5.0 Nyienyim

Dem Ɔfa yi na ƆkyerƐ dƛ dwumadzi no reba ewiei. Ɔfa yi na nhwehwɛmufo no bɔbɔ nhwehwɛmu dwumadzi a Ɔyɛ mpɛnsampɛnsamu a Ɔfa Akan atam edzin ho wɔ kasa mbra nhyehyɛ kwan do na sohyiolengwesteks kwan do yi nyinara tɔw. Adwenmusem a nhwehwɛmufo no gyina do dze yɛ dwumadzi no mu mpɛnsampɛnsamu no yɛ Kasa Mfeefeemu Mpɛnsampɛnsamu. Bio, Ɔfa yi n'ewiei yi mu ara nhwehwɛmufo no dze n'adwen na ne nsusui bɔto gua.

5.1 Nhwehwɛmu no mbubudo

Nhwehwɛmu yi gyina kasa mbra na sohyiolengwesteks kwan a Akan atam edzin no bi wɔ. Nhwehwɛmu dwumadzi yi ada ndzɛmba pii edzi akyerƐ. Ɔnam dɛm dwumadzi yi do ma nhwehwɛmufo no etum ehu Akanfo atam edzin ahorow no mu bi. Bio, Ɔda edzi pefee dɛ Akanfo mmfura hɔn tam biarabiara na mbom wɔ tɔ dɛ wɔhwɛ dwumadzi bi do dze fura tam. Nyimpakuw ahorow a nhwehwɛmufo no nye hɔn dzii dwuma no nkaanka ndɛ mber yi mu mba no ma Ɔda edzi dɛ nnyɛ aber nyinara na wɔhwɛ tam edzin ho ansaana woefura na mbom wɔhwɛ ahosu so ka ho. Ɔda edzi dɛ mbɛ binom tum hwɛ tam edzin na nkyerɛasee na bea wɔdze kɔ no, hɔn dze wɔnnhwɛ no dɛm.

Bio, nkitahodzi a nhwehwɛmufo no nye nyimpa binom dzii no daa no edzi dɛ, nna nyimpa dodow ara hwɛ atam edzin ho na ne nkyerɛasee ho ana woefura, tsitsir mpanyimfo. Ɔda edzi dɛ hɔn dze wonyim atam ara yie ntsi wɔnntɔ dɛ wobofura atam

bi a ɔdze asem bi beba daakye anaa ne fura ekyir. Tam bi tse de, “Medze mese abo adwe ma kwasea bi abefa”. Tam a okitsa dzin bi tse dem no panyin biara remmfura nko ayeforhya ase naaso nde mber yi mu mba fo no dze wonnhwe iyi ho na mbom ma ohia hon ara nye de wobotum efura onam n’ahosu ntsi. Nhwewemu no ma oda edzi de, se mpo se obi fura tam a onnye koben anaa tuntum a, otum fa akatado tuntum anaa koben dze fura ne tam no do ma afofor hu de oroko eyi ase. Otum so dze koogyan so bo ne tsirmu anaa ɔdze twa ne yamu dze kyere tsebea a wo mu.

Nhwewemu no gyina kasa mbra na sohyiolengwesteks nyehyee kwan do na ɔdze pensampensam Akan atam edzin no mu. Kasa mbra kwan do no, nhwewemufo no hwee atam edzin a oye nsentow tsiaba, dza oye nsentow mboho, dza oye nsentow kuntann. Bio, nhwewemufo no hwee nsentow ne dwumadzi de oye asem bisa, nyee anaa asenka. Kasa mbra nhwewemu mu yi ara so ma oda edzi de Akan atam edzin no bi ye nyimpa dzin, mbowa edzin, nduadzewa na pii a okeka ho.

Bio so, oda edzi pefee de atam no fura roko famu, mekyere de mbaa bofura kaba na nsi asee no abeye hen maame mpanyimfo no dze na mbom nde mber yi mu mba dze dzaa woto ye nye de wodze atam no pam ntar na wohye. Iyi da no edzi de, Akan atam ahorow a yewo no nyinara no nde mber yi mu mba dzaa hon nsa beka biara no wotum dze pam atar hye dze ko bebiara.

Atam edzin a wakyerew no atam no mu no pii mfom wo ho, mekyere kwan a wofa dze asoper no nndzi mu ntsi se atamyefo no botum enya nyimpa a wowo nyimdzee wo

Akan kasa ho ma aber biara wɔahwɛ nkasafua akyerɛw no mu ansaana wɔdze egu atam no mu a, nkyɛ ɔbɔboa ara yie.

5.2 Dza ɔtɔ gua

Nhwɛhwɛmu dwumadzi yi hwɛɛ Akan atam edzin ne nhyehyɛɛ wɔ kasa mbra kwan do na sohyiolengwesteks kwan do. Dza ɔbɔtɔ gua no bi nye dɛ Akan atam edzin no bi wɔ hɔ a, nna n'akyerɛw wɔ atam no mu no nndzi mu nnwie, osiandɛ wɔansopɛr no yie. Bio, atam edzin no bi so wɔ hɔ a ɔba no dɛ yɛrobɔ a, yetwitwa do ma otum yɛ asɛntɔw tsiaba naaso nna ɔyɛ asɛntɔw mboho. Atam no bi so wɔ hɔ a wokitsa dzin ebien. Tam bi tse dɛ, **“Kora tse dɛ nantwi bin”** iyi ara so wɔfrɛ no **“Gramofone apaawa anaa prɛtse”**. Demara so na tam a wɔfrɛ no **“Nkampor ahaban”** no so wotum frɛ no **“Dua wusuuw”**.



Bio, nhwɛhwɛmu maa ɔda edzi pefee dɛ hɔn a wɔyɛ atam no tum ma atam no edzin ansaana ebodu gua do. Atamtɔmfɔ so tum ma atam edzin mbɛrɛ ɔbɛyɛ ma etum asa ntsem. ɔda edzi bio so dɛ, atamtɔmfɔ no binom so tum hwɛ nsɛnkyɛredze a ɔwɔ atam no mu no ho ma dzin.

ɔfa no atam edzin na ahosu dza no ho hia no, nyiano a ndɛ mber yi mu mba tsitsir dze maa me no bi nye dɛ, hɔn dze wɔnnhwɛ mbɛrɛ tam no ne dzin no tse, osiandɛ hɔn mu dodowara na wonnyim atam edzin. Iyi ntsi wɔhwɛ tam mbɛrɛ n'ahosu tse na wɔtɔ. Dza ohia hɔn ara nye dɛ tam no ahosu bɛfata dwuma a wɔdze roko ase no. Bio, wɔma metse

ase de se wobotum efura tam no ako mbea pii a ono woto amma wamambo kaw wo dza wobehye ho.

Mpanyimfo binom so dza wokaa nye de atam no bi wo ho a wokitsa ekutsia dzin na ne dem no ntsi onnye de obi bofura tam a otse dem dze ko ayefor anaa abadzinto ase, osiande atam edzin kasa kyere afofor. Woma mfatoho bi tse de, **“Kora tse de nantwi bin”, “Eserew kyere me kwa”** na pii a okeka ho.

5.3 Adwenkyere

De mbre dwumadzi yi mu yedzi kan aka no, tam ye biribi a yerunntum nnyi mmfi hen daadaa abrabo mu. Oye adze a yedze kata hen adagyaw do, osiande odasanyi runntum mmfa n’adagyaw nnto do ma afofor nnhwe.

Enyimdzefo binom aye nhwehwe mu afa atam ho na dza woye no bi fa atam ahorow a yewo, atam ahosu, nsonsonnee a oda abae for atam ho na ebibirmu dze ho. Woyinom nyinara annhwe de nkitahodzi a Akan atam edzin no nye ankorankor dzi. Mo nhwehwe mu dwumadzi yi mu no muhun de onam de nyimpa dodowara nnyi nyimdzee kese wo atam edzin ho no ntsi, nyimpa binom fura tam no biara biara wo aber a wonndwen dzin no ho na ne nkyereasee ho. Ahosu no so wonnhyedaa nnhwe no papa biara. Onam de nyimpa dodow noara na wommfa atam edzin nndzi dwuma ntsi, nkanka nde mber yi mu mba no tsitsir, ama binom ebu hon enyi egu iyi nyinara do. Dodow ara na wohye ntar a wopam no dada ma dem no ntsi ama atamfura roko famu.

Ne dem no ntsi dwumadzi yi ahwe kasa mbra no bi a Akan atam edzin no bi wo na aber kor noara so wواهwe nkitahodzi a Akan atam edzin na n'ahosu no nye ankorankor dzi. Mutum hu de nhwehwemufo binom so botum aye nhwehwemu afa atam ho wo aber a wo bohwehwe mbre Akan atam no furabew tse. Se oba no dem a, nyimpa dodowara na wobotum ennya nyimdzee afa atam furabew ho.

5.4 Nsusui

Mususu de enyimdzefo binom so beye nhwehwemu afa kwan a Akanfo fa do fura hon atam. Iyi no bema nkyirma ehu mbre atamfura tse na ma mbre atam edzin no si nye afofor dzi nkitaho.

Mo nsusui bio so nye de, hon a woto de woye amambra dwumadzi wo telebiyen na akasanoma do no botum dze Akan atam edzin no so dze aka ho dze akyerε mbre yebotum efura atam ako mbea a onnkεfa asem biara mmba onam dzin a okitsa ntsi. Bio so, mususu de abaatan bobo mbodzen akyerεkyerε hon mba atam edzin ahorow a wonyim na wokyere ase so dze ama hon ama mbofra no emmfura atam bi dze enya amandze.


Oto do bio no, owo de se odor afahye anaa guabo bi a, mpanyimfo tum twa tam bi a owo dzin ama nkyirma no so etum enya biribi dze egya hon mba mbanyin na mbaa. Megye dzi de onam nsuisui yi ntsi nsesa botum aba hen atamfura mu.

5.5 Ewiei

Nhwehwemu dwumadzi yi ada Akan atam binom edzin ho mpensampensamu. Nhwehwemufo no ye mpensampensamu no wo kasa mbra na sohyiolengwesteks mu. Nhwehwemu dwumadzi yi ye afa enum Enyimdzefo binom aye nhwehwemu afa atam ho na mbom nhwehwemu no bi gyina nsunsuando a amanadze atam enya no ebibir atam do, kwan a Ghanafo mbaa dze tam kasa, atam binom mu nsenkyeredze ho mpensampensamu, atam ahorow a Akanfo dze ye hon amandze, atam ahosu, atam ahorow a yewo. Nhwehwemu no ama ada edzi de Akan atam edzin no dzi kasa mbra nhyehyee do na afei so edzin no kasa kyere afofor. Nhwehwemufo no dze Kasa Mfeefeemu Mpensampensamu ti ori na odze yee ne mpensampensamu faa Akan atam edzin ho wo Kasa Mbra na Sohyiolengwesteks kwan do.

5.6 Tɔwɔ

Dem ofa yi a oɔ do enum yi dze dwumadzi yi ofi n'ahyeease dze kepem tsir anan no tɔwɔ no to gua. Bio, wo dem ofa yi mu ara so na nhwehwemufo no dze dza oɔ gua wo nhwehwemu dwumadzi yi mu to gua na afei so odze n'adwenkyere to gua. Dza odzi ewiei wo dem ofa yi mu nye tɔwɔ.



MBOAYE MBUUKUU

- Adams, F. & Osgood, C.E. (1973). A cross cultural study of the active meaning of Color. *Journal of cross-cultural Psychology*. 4: 135-156
- Adomako, K. (2017). *Morphophonological Analysis of Akan Female Names Formation*, Ghana Journal of Linguistics, 6(3), 1-32.
- Adjah, O. A. (2011). What is in a Name? Ghanaian Personal Names as Information Sources. *African Research and Documentation* 117,3-17.
- Adjei-Sakyi, D. (2016). Nkitahodie muduru a Akanfoɔ ntoma din wo. Mphil Thesis. University of Education, Winneba.
- Agbenu, K. D. (2011). *Ga and Adangbe Canoe Culture: A Composite Art Form for Studio Practical Exploration*. PhD Thesis, Kumasi: Kwame Nkrumah University of Science and Technology.
- Agyekum, K. (1995). *Introduction” Semiotics and Nonverbal Communication*. Aspect Of Akan Semiotics. 122-132.
- Agyekum, K. (2006). The Socio-linguistics of Akan Personal Names. *Nordic Journal of African Studies*, 15 (2), 206-235
- Agyekum, K. (2008). The language of Akan ideophones. *Journal of West African Languages*. 35(12), 101-129.
- Agyekum, K. (2010). *Akan kasa nhyehyeeɛ*. Accra: Dwumfour Limited.
- Agyekum, K. (2011). *Akan Kasadwini*. Accra, Dwumfour Publications.
- Akinwumi T. M. (2008), The “African Print” Hoax: Machine Produced Textiles Jeopardize African Print Authenticity. *The Journal of Pan African Studies*, Vol. 2, no. 5(July, 2008): 179-192.
- Amoako-Asare, L. (1998). *A Critical Survey of Akan (Ghanaian) Collection in the Natal Museum*. M.A. Thesis in University of Natal.
- Appenteng-Sackey, E. (1988). *The language of modern textiles in Ghana*. Mphil. Thesis. University of Education, Winneba, Ghana.
- Appiah, A. K. (1997). The art of Africa. Retrieved on 6th February, 2021 from <http://www.Nybooks.com/articles/1997/04/24/the-arts-of-africa>
- Andoh-Kumi, K. (1995). *Basic Akan Grammar*. Accra: Type Publisher Limited.
- Asangba, R. T. & Agoswin, M. (2015). Moving Poetics: a linguistic analysis of Inscriptions on vehicles. *The Dawn Journal*, Vol 4 No 2 pp 1126-1137 www.thedawnjournal.com accessed 4/ 12/ 20.

- Asare, M. (1998). *The Canoe's Story*. Sweden, 3 B C Publications Ltd.
- Asare-Poku, K. (1991). *Hearing and Keeping Akan Proverbs* (vol 2) Accra: Asompa Publishers.
- Asihene, V.E. (1978). *Understanding the traditional Art of Ghana*. Cranbury. New Jersey. Associated University Press. Inc.
- Asmah, A. E. & Okpottah, V. (2013). Sirigu Symbols. Metaphoric Element for Batik Prints. *Arts and Design Studies*. 40-57
- Bannerman, J. Y., Arthur, G. F., Krampah, D. E. K. & Dickson, K. A. (2012). *Mfantse Nkasafua na Kasambirenyi Nkyerewee*. Tema Centre for Indigenous Knowledge Systems. (CEFIKS).
- Barfuo, A. A. B. (1993). *Akwasidae Kεεε; a festival of the Asante, people with a Culture*. Accra. Dubois Centre, National Commission on Culture.
- Bennet, M. J. (1991). *American Cultural Patterns; A cross-cultural perspective*. London; Intercultural Press.
- Boham, I. (1979). *Mfantse Kasa Ho Mbra na Dwumadzi Buukuu*. Accra: Bureau of Ghana Languages.
- Bonsieh, C. (2020). Akanfoɔ daadaa ntama a yede di dwuma din a eyɛ mme ho Mpensempensemu wo lengwesteks kwan so. Mphil Thesis. University of Education, Winneba.
- Chomsky, N. (1965). *Aspect of Language*. 2nd Edition. New York: Harcourt Brace Jovanovich.
- Clarke, D. (2002). *The art of African textiles*. China: PRC Publishing Ltd.
- Coronel, M. A. (1979). *Fante Canoe Decoration*. African Arts Vol. 13 No 1 Pp. 54 59 & 99-100.
- Coupland, N. & Adam, J. (1997). *Sociolinguistics: Reader and Course book*. New York: Palgrave Press.
- Crayner, J.B. (1988). *Yeehyiahya oo*. Accra: Bureau of Ghana Languages.
- Creswell, J. W. (1994). *Research Design. Qualitative and Quantitative Approaches*. California Sage Publication.
- DeFleur, M. L., Kearney P. & Plax. G. (1998). *Fundamentals of Human Communications*. California: Mayfield Publishing Company.

- Dogoe, E. A. (2013). *A study on the rise in the use of African fabrics in Ghanaian and Western societies*. Undergraduate long essay. Ashesi University
- Dolphyne, F.A. (1988). *The Twi Fante Languages. Its Sounds System and Tonal Structure*. Accra: Woebi Publishing Services.
- Dormaar, J. (1993). *The language of Clothes: Curriculum evaluation of four fashion Design and merchandising programs*. M.phil thesis. University of Lethbridge, Canada.
- Dzramado, B. E. (2009). *Clothing and Fashion in Ghanaian Culture: a case study Among the Akans*. Unpublished thesis, KNUST.
- Dzramado, B. E. (2013). *The Relevance and Symbolism of Clothes within Traditional Institutions and its Impacts on the Ghanaian Culture*.
- Duje, K. (2019). *The Psychology of Clothing: Meaning of Colors, Body Image and Gender Expression in Fashion*.
- Fairclough, N. (1995). *Critical Discourse Analysis: The Critical Study of Language*. London: Longman.
- Finnegan, R. (2012). *Oral literature in Africa*. Open Book Publishers, New York. Okford University Press.
- Frank, M. G. & Gilovich, T. (1998). The dark side of self and social perception, black Uniforms and aggression in professional sports. *Journal of Personality and Social Psychology*.
- Khan, A. (2019). *Inscriptions As A Source of History*. The Centre for Theoretical Physics Jamia Milia Islamia; SSRN:Electrical journal. Accessed on 6/12/20.
- Howard, E.K., Sarpong, G.D. & Amankwah, A.M. (2013). Symbolic Significance of African Prints: A Dying phenomenon In Contemporary Print Designs In Ghana. / *international Journal of innovative research and Development*. Vol issue 11
- Khozyainova, N. (2017). *Freedom of Apparel Artifactual Communication as a Fundamental Human Right*. State University of New York: Empire State College thesis.
- Krampah, D. E. K. (1997). *Mfantse Kodzisem ho Adzesua*. Accra: Bureau of Ghana Languages.

- Kwon, Y. H. (1987). Daily Clothing Selection Interrelationship among Motivating Factors. *Clothing and Textiles Research Journal*, 5(2) pp 22-27.
- Longman Dictionary (2005) Pearson Education Limited.
- Lartey, A. A. (2018). The art of Nameology in Ghanaian culture. A thesis in the Department of Music Education. Retrieved on 29th August, 2021. From <http://ir.uew.edu.gh>. handle
- Manu, A. (2010). Hairstyle for Fabric Designing and Production. Thesis in the Department of Art. Retrieved on 6th May, 2021. <http://ir.knust.edu.gh>
- McLeod, M. D. (1981). *The Asante*. England: British Museum Publication Ltd.
- Mensah, S. (2008). Dwuma a atam edzin dzi wo Akan Kusum. M.A. thesis. University of Education, Winneba.
- Miller, D. (1996). Fashion and Ontology in Trinidad. *Cultural History*. 7, 49-77.
- Mireku-Gyimah, P. B. & Mensah, A. A. (2014). *Anglicised place names in Ghana*. The case of towns in the Tarkwa Mining Area. The extractive Industries and Society 2(1); 19-23, DOI: 10.1016/j.eexis.2014.11.005.
- Mohan, K., & Banerji, M. (2008). *Intimate relationship*. New York: McGraw Hills Companies.
- Neilson, R. (1979). The History and Development of Wax-Printed Textiles Intended For West Africa and Zaire, in *The Fabrics of Culture: The Anthropology Of Clothing and Adornment*, edited by Justine Cordwell and Ronald Schwarz 467-498. New York: Mouton, 1979.
- Ngo, T. A. (2017). *The Importance of Awareness of NonVerbal Communication in Leadership Success Focus on American Culture*. Aalto University thesis, 2017.
- Obeng-Gyasi, S. (1998). *Akan Death-Prevention Names: A Pragmatic and Structural Analysis*. In: *Names* 46(3): 163-187.
- Odoom, J. K. (2013). *Fonology na Nkasafua Dwumadzi for Senior High Schools*. Agona Swedru: Nkodzen Publications.
- Oslen, B. (2013). Traditional Wood Carving in Elmina: The Creation of a Fishing Canoe. *Independence Study Project (ISP) Collections*. 1679. https://digitalcollection.sit.edu/isp/edu/isp_collections/1679. Accessed 14/12/20.
- Owu-Ewie, C. (2014). A Morphosyntactic analysis of some Fante habitation names. *The International Journal of Humanities and Social Studies*. 2(5). Pp 232-243.

- Owu-Ewie, C. (2017). *Introduction to traditional and action research*. Accra: Dataedge Multimedia
- Owurasah, G. (2015). *Language of Customary Marriage Among Akans*. <https://ugspace.ug.edu.gh>. Accessed on 29/ 06/ 2020.
- Oxford Advanced Learners Dictionary (2000). Current Dictionary 6th Edition. Oxford New York: Oxford University Press.
- Panceira, S. (2012). *What is an Inscription/ Problems of Definition and Identity of Historical Source Zeitschrift Papyrologie and Epigraphik Purpita*
- Quartey, N. O. (2015). *The Names and the Meanings of the Wax Print designs on our African Print Fabric*. Retrieved on 10th June, 2020. <http://www.naaquartey.com>
- Quayson, A. W. & Ofori, E, A. (2016). *Thematic Analysis on Inscriptions on Shops. A Case Study of Amamoma Community*. University of Cape Coast.
- Quist, C. Z. (1995). *The human figure, A Major Determing Factor for the choice of Clothes*. Unpublished thesis, KNUST.
- Reed, J. (1973). *Clothing as a Symbolic indicator of the Self*. (Unpublished doctoral Dissertation). Purdue University, West Lafayette, IN; 197 Remenyi
- Rosenhouse, J. (2002). *Personal Names in Hebrew and Arabic*. Trends Compared to The Past. *Journal of Semiotic Studies*. 47(1).
- Ryan, M.S (1966). *Clothing: A study in human behaviour*. New York; Holt, Rinchart and Winston
- Sakyi-Baidoo, Y. (2000). *Learning and Communicating*. Kumasi: Willas Press Ltd.
- Salm, S. J & Falola, T (2002). *Culture and customs of Ghana*. The international *Journal of African Historical Studies* 35(2/3); 559
- Sarpong, P. (1974). *Ghana in retrospect: Some aspect of Ghanaian Culture*. Accra - Tema: Ghana Publishing Corporation.
- Sarpong, P. A. (1991). *Ghana In Retrospect – some social aspects of Akan Culture*. Accra: Sedco Publishing Ltd.
- Simona, F. (2018). *Verbal Communication As a Two-Way Process in Connecting People*. Retrieved on 28th November, 2020.
- Stephens, W. (1971). *The Family in Crises. Cultural Perspective*. New York: Holt.
- Sutherland, A.E. & Aminata, D. (2005). *Women Writing Africa*. West Africa & Sahel. New Jersey.

- Sylvanus, N. (2007). The fabric of Africanity: Tracing the Global Threads of Authenticity. *Anthropological Theory*, 7(2), 201-216. Taylor & Frank
- Tetteh, E. K. (2014). *Mfantse Kasa Mbra Mu Bi*. Study Guide for Students Manuscript.
- Tetteh, V.A. (2011). *National Commission for Civic Education*. Retrieved on 2nd April, 2020.
- Tettehio, L.A. (2009). The role of the indigenous Ghanaian textile industry in relation to the Presidents Special Initiative (PSI) on textile and garment. University of Education, Winneba (Kumasi Campus, an unpublished Masters Dissertation).
- Van Dijk, T. (1995). The Violence of Text and Talk. *Discourse and Society*. 6(3). 307-308.
- Wegryn, J. (2008). "What is a name: like the rules of cricket". Retrieved on 23th February, 2021. <http://www.jimwegryn.com>.
- Wendren, W. (2008). The story Behind African Wax Print Cloth. Retrieved on From <http://thewendesign.com/2008/07/10/the-story-behind-african-wax-print-cloth/trackback/>.
- Yankah, K. (1995). *Speaking For the Chief: Okyeame and the Politics of Akan Royal Oratory*. Bloomington. Indiana University Press.
- Yarwood, D. (1992). *Fashion in the Western World: 1500-1990*. London: B.T. Batsford Ltd.
- Zuckerman, M. (1991). *Psychology of personality*. Cambridge: Cambridge University Press.

NKEKAHO 1

ATAM EDZIN AHOROW

Angelina

Nkruma Pɛnsel

Aban Nkaba

Kora tse dɛ nantwi bin, enyin wesewese na ase pakya/ Gramophone apaawa

Senkye bregye

Ahwerpɔw

Asɔbayer dɔtɔ

Kwadu saw

Akyekyerɛ ekyir

Ebɛka moho asem a fa egua tsena do



ABCD

Nsubura

Owu atwer baako mmfow

Afa me nwa

Fie mbosea rutwa wo a, ɔsen seradaa

Sika tu dɛ anoma

Medze mese abɔ adwe ma kwasea bi abɛfa

Muoko nyina mmpetu mmbɔ mu mber

Ahondze pa nkasa

Dua kor gye ehum a, obu

Enyi ber a, onnsɔ gya

Okunpa, woana benya?

Ɔbaapa

Owu sɛɛ fie

Enyiwa

Afe bi ye esian

Felicia

Yaw Donko

Job enyinsuwa

Ebusua dɔ fun

Enyiwa nnyim awerɛhow

Pra wo fie

Na pa edze hɛn gyaa woana?

Dwen woho

Ɔtse win mu

Aman pɛ se

Papayɛ asa

Adasa pɛ mbɔbɔr



Kata wo dze do na bue obi dze do

Abofra bo nwa na ommbobo akyekyer

Gyae su na gyina pintsinn wo Nyame mu

Munnsuro kotoko na mesuroo ne nwoma

Toa noara na ope na ahoma sen no kon

Awar tse de nkatse a, nkye mobobo ahwe

Abowa bi beka wo a, ofi wo tam mu

Nnyi sika a, nntwa brog

Wo nsa ekyir beye wo daw a, onkweye de wo nsa yamu.

Obra rutwa wo a, otse de seradaa

Eroko awar a, bisa

Obaatan na onyim dza ne mba bedzi

Owu see fie

Ntsetsewudzi ye yaw

Dabi yebehya


Wo wu atsew hen nson mu

Ama asem aba fie

Bonsu

Nyame enyiwa

Dza Onyame aye ama me



Highlife

Akɔmfɛm

Ananse ntentan

Akyekyerɛ ekyir

Nkampɔr ahaban/ Dua wusuuw

Akuffo ahendzi

Kofi Annan adwen

